

Wam Korīt Pawre kot Korīt kām Jejus kôt hkwÿjê hwÿr kagà nê mēnh

Pawre na pre kagàja nhĩpêx. Jejus nhĩ hã kapêr jarēnh o pa xwÿnhjê hõ na pre. Na pre hipêx nê ma krĩ pê Korīt kām Jejus krajê hwÿr kumê. Nê kagàja kamã mē kām tanhmã mēmoj tã karõ hto. Na pre mē kot àhpumunh tÿx ã amnhĩ to jarkrar o pa nê mē kām kapêr. Nê tanhmã amnhĩ tomnuj to nê mē kām kapêr. Nê mē hprõ nê mē mjên xwÿnhjaja tanhmã wa kot axpên nhĩpêx to hã mē kām karõ. Nê mē kot Tĩrtũm mã mex o mex ã harēnh kaxyw axpên wÿr mē pikuprõnh nê tanhmã amnhĩ nhĩpêx to hã nhũm mē kām karõ. Æ na pre Pawre mē kām mēmoj tã karõ nê hã kagà anê. Nê mē kām:

¹ Pa Korīt kām Jejus kôt ixkwÿjjaja. Xà mē amex? Ot pa mē awÿr kagàja nhĩpêx nê kumê. Ixpê Pawre na pa Kris kôt mē pahtõ Sostenes mē wa awÿr ixpêr mē. Tã kagàja nhĩpêx nê mē awÿr kumê. Tĩrtũm na pre ixte Jejus Kris nhĩ hã mē ajahkre ho ri ixpa kaxyw ixãm.

² Tã ot pa mē awÿr kagà nhĩpêx nê mēnh mã. Korīt kām ixpyrà nê mē apê Tĩrtũm krajê hwÿr.

Tĩrtũm kot amnhĩ kaxyw mē axunhwÿr jakamã na ka prem amnhĩ tomnuj kaga nê Kris kôt amnhĩ xunhwÿ nê hkôt amnhĩ nhĩpêx mex o ri apa. Krĩ piitã hkôt mē kot amnhĩ to Jejus Kris wÿr o mē pa xwÿnhjê pyrà nê. Mē panhõ Pahihti Jejus Krisja ãm pixi mex na.

³ Nê Tîrtûm kêp Měpahpām maati nê Jejus Kris kêp mẽ panhõ Pahihiti jakamã na pa hte mẽ ato wa hwÿr rãhã o ri ixpa nê mẽ ato wa hwÿr o:

—Kwa Tîrtûm mẽ Jejus wa. Kêr ka wa Korîť nhõ xwÿnhjê kutã anojarêť rãhã ho wa ri apa. Nê mẽ ho mex rãhã nê. Kê mẽ amnhĩ tã war apumunh kôt ri hamakêtkati nê hkĩnh nê àmnhĩx tanhmã ri amnhĩ nhĩpêx to ho ri pa. Anê.

Tîrtûm kot Jejus Kris kukwak ri mẽ pahto mex ã harênh

Sikũn Pêtre 1.2; Wam Tesarõn 5.23-24

⁴ Nê mẽ ate amnhĩ kaxyw Jejus Kris kôt ajamaxpêr o ri apa jakamã na hte Tîrtûm mẽ ato mex nê. Tã pa hte kãm amnhĩ jarênh kaxyw nê kãm mẽ ajarênh o:

—Pa Tîrtûm. ãm hãmri na ka pre Korîť nhõ xwÿnh kwÿjê ho akra. Nà ja mex o mex. Anê.

⁵ Nê ra mẽ ate Kris kôt amnhĩ xunhwÿr jakamã na ka mẽ ra amex kumrêx nê ri apa. Nê aprĩ hã Kris kot amnhĩ nhĩpêx pumunh mex nê aprĩ hã akwÿjê mã harênh o ri mẽ hkôt apa.

⁶ Na pa pre mẽ awÿr mõi nê mẽ amã Kris kot amnhĩ nhĩpêx ã harênh o ri mẽ akôt ixpa. Ka prem inhma nê hkôt amnhĩ xunhwÿr tÿx kurê kumrêx.

⁷ Jakamã nhũm Tîrtûm mẽ ate kãm tanhmã amnhĩ nhĩpêx to ho apa kaxyw mẽ ato mẽ axihtÿx. Nê kaxyw mẽ amã mẽ ate axpên to mex xà piitã mẽ amã kugõ. Mẽ ate Jejus kot akupÿn mẽ pahwÿr wrÿk jamãr pê hapêr arît o apa pê tanhmã kãm axpên nhĩpêx to ho apa kaxyw.

⁸ Koja Tîrtûm tanhmã mẽ akrã hto ka mẽ hkôt pix mã ri amnhĩ nhĩpêx rãhã nhũm Pahihiti Jejus

Krisja akupÿn mẽ pahwÿr wry. Hãmri nẽ mẽ ate amnhĩ nhĩpêx ã mẽ apumu nẽ mẽ ajarênh o:

—Nà ãm hãmri na hte jajaja amnhĩ to mex pix o ri pa. Anẽ.

⁹ Nẽ koja Tĩrtũm ra kot amnhĩ jarênh xà hkôt mẽ ato mex nẽ. Ra kot mẽ ate Pahihti Jejus Kris kôt apa kaxyw amnhĩm mẽ axunhwÿr jakamã koja ra kot amnhĩ jarênh xà hkôt mẽ ato mex rãhã nẽ.

Mẽ pahte mẽmoj tă axpẽn pê pahpigrành kêt ã mẽ pamã karõ

Rômãn 15.5-6; Sikũn Korît 13.11; Epes 4.1-6; Piri-pos 2.1-4; Wam Pêtre 3.8

¹⁰⁻¹¹ E Kris kôt ixkwÿjaja. Na ka xep htem mẽmoj tă axpẽn mã axàkjêr pix o ri apa nhũm pre Krojre hkwÿjaja amnẽ ixwÿr pøj nẽ inhmã mẽ ajarê. Kwa nà mẽ ã amnhĩ nhĩpêx anhÿr kêt nẽ. Kêr ka mẽ axpẽn kôt ri amnhĩ nhĩpêx rãhã ho ri apa. Nẽ axpẽn kôt ri ajamaxpêr rãhã nẽ. Te ixkre tipxi kamã mẽ ri apa pyràk o mãn kêt mẽ axpẽn nhĩpêx o ri axpẽn kôt apa. Nẽ mẽ axpẽn kutã anojarêt rãhã ho ri apa. No mẽmoj tă axpẽn mã axàkjêr pê axpẽn pê apigrành kêt nẽ. Na pa Pahihti Jejus Kris nhÿ hã mẽ amã ã ja hã karõ anẽ.

¹² Nẽ na ka xep htem ahpÿnhã ri mẽ apê mẽ ixkwÿ hã amnhĩ jarênh o ri apa. Jao mẽ akwÿjaja pa ixkôt ri amnhĩ nhĩpêx xwÿnh ã amnhĩ jarê. Nẽ mẽ akwÿjaja axtem Apor kôt ri amnhĩ nhĩpêx xwÿnh ã amnhĩ jarê. Nẽ mẽ akwÿjaja axtem Simãw Pêtre hkôt amnhĩ nhĩpêx xwÿnh ã amnhĩ jarê. Nẽ mẽ akwÿjaja axtem Kris kôt amnhĩ nhĩpêx o ri apa xwÿnh ã amnhĩ jarê. ã na ka xep htem ahpÿnhã amnhĩ jarênh anhÿr o ri pa.

13 Kwa nà ka mẽ ã ahpÿnhã amnhĩ jarēnh anē nē te mẽ ate Kris o apigrānh pyrāk o hipêx. Kwa mon ka hte mẽ akwÿjaja apê ixkwÿ hã amnhĩ jarē? Xà pa na pa pre pĩ kahpa hã ajêt nē mẽ anē ty? Nà Kris pix na pre mẽ panê hã ajêt nē ty. Xà mẽ apê pa ixkwÿ hã amnhĩ jarēnh kaxyw na prem mẽ akrã kumrã? Nà mẽ apê Kris kwÿ hã amnhĩ jarēnh kaxyw na prem ã mẽ anhĩpêx anē. Mẽ kot ja hã mẽ apumunh xwÿnhjaja kot mẽ apê Kris kwÿ hã mẽ apumunh kaxyw. Tã na ka xep htem axtem nē ã ri ahpÿnhã mẽ kãm amnhĩ jarēnh anhÿr o ri apa.

14-15 Kop ãm ixte amnhĩ kôt mẽ axunhwÿr prãm ronhÿx pa mẽ ato mẽ axohtô nē mẽ akrã kumrã nē mẽ amã: “E ra mẽ apê ixkwÿ na ka mẽ.” Anē. Nom na pa pre ã mẽ amã ixkapêr anhÿr kêt nē. ãm hãmri na pa pre ãm mẽ ato grêre nē mẽ akrã kumrã. ãm Kripti mẽ Gajre wa pix.

16 Ku nē xep mãänēn Estepti nē kaxyw mẽ hkwyjaja. ãm jajê pixjaja. Nom ko apu axte mẽ hkwy ko. Ixte mẽ hkrã kumrãr xwÿnhjê mã ijamaxpêr tÿx kêt.

17 Na pre Kris ixte mẽ hkrã kumrãr o ri ixpa kaxyw ixãm kêt nē. ãm ixte mẽ kãm kapêr jarēnh o ri mẽ hkôt ixpa pix kaxyw na pre ixãm.

Nē na pa hte amnhĩ krã hkôt ri ixujarēnh o ri mẽ akôt ixpa hkêt nē. Kot pa ã amnhĩ nhĩpêx anē nhũm mẽ ixkapêr mex ã inhma nē pa ixkôt amnhĩ xunhwÿ. Ja pymaj na pa hte amnhĩ krã hkôt ri tanhmã ixujarēnh to ho ri ixpa hkêt nē. Na pa hte ãm ixprĩ hã Kris kot tanhmã mẽ panê amnhĩ nhĩpêx to hã harēnh o ri mẽ hkôt ixpa. Mẽ pahpiitã mẽ panê htyk ã harēnhja pa hte mẽ kãm harē. Mẽ

kot hprî hã mar nê hkôt amnhî xunhwÿr kaxyw. Jao amnhî krãm mẽ ujarënh mexta jagjênh nê hã no htÿx kaxyw. Pa ja hã mẽ omu nê ixkînh nê ijamaxpêr o:

—Na htem ixkapêr ma nê Jejus kôt amnhî xunhwÿr kurê kumrêx. Nà ãm hãmri na pa hte mẽ kãm ixkapêr kaprÿ ho ri ixpa hkêt nê. Anê.

¹⁸ No kêt mẽ pahte Tîrtûm kot mẽ pahto hkra xwÿnhjaja ra mẽ pahte Kris pî kahpa hã mẽ panê htyk ã harënh mar nê pahkînh nê papa xwÿnh na pu mẽ. Jakamã na pu htem pajamaxpêr o:

—Nà ãm hãmri na Tîrtûm Kraja htyk kukwak ri mẽ ixto mex nê mẽ ixto hkra. Mẽ ujarënhja mex kumrêx. Anê.

No kêt mẽ kêp hkra hkêt xwÿnhjaja na htem tee ri Kris tyk ã harënh ma nê hamaxpêr o:

—Tk. Tanhmã kot kêt we amnhî to nê mẽ panê ty? ãm amarî mẽ kot amnhî krã hkôt pî kahpa hã nhôr nê hpîr kênã. Anê.

Tîrtûm kra hkêt xwÿnhjê jarënh

Matêwre 11.25-26; Wam Korît 3.19

¹⁹ Nê Tîrtûm kapêr ã kagà htûm kot mẽ kêp hkra hkêt xwÿnhjê jarënh kot:

Mẽ kot htÿx ri àhpumunh tÿx ã amnhî to jarkrar o pa htã kot paj mẽ kêp ja ho ijapêx pa nhûm mẽ ã amnhî jarënh anhÿr kaprÿ. Anê.

²⁰ Jakamã mẽ àhpumunh tÿx ã mẽ kot amnhî to jarkrar xwÿnhjaja nê mẽ kot Mojes kapêr o mẽ ahkre ho ri mẽ pa xwÿnhjaja nê mẽ kapêr rûnh xwÿnhjaja. Mẽ kot Tîrtûm Kra hkôt amnhî xunhwÿr kêt jakamã te mẽ àhpumunh kêt pyræk. Tîrtûm kra hkêt xwÿnhjaja kot mẽ àhpumunh tÿx ã mẽ

harēnh tā no ām Tīrtūm noo mā te mē àhpumunh kêt pyrāk. Nē te htỳx ri mē kot amnhĩ nhĩpêx o pa pyrāk.

²¹ Tīrtūm àhpumunh o àhpumunh jakamā na pre ra mē hkukamā hamaxpêr o:

—Nà kot paj mē àhpumunh tỳx ã mē omunh xà hkôt mē ho ixkra hkêt nē. Ām mē kot ixkra Jejus kot mē nē htyk ã harēnh mar nē amnhĩ kaxyw hkôt hamaxpêr pix ã mē omunh xà hkôt kot paj mē ho ixkra. Anē.

²²⁻²⁴ No Ijaewjaja kām amnhĩ krā hkôt pix mā amnhĩ nhĩpêx prām jakamā na pa hte mē ixpê Jejus kwỳjaja mē hwỳr mra nē mē kām Kris kapêr jarēnh o ri ixpa nhũm mē inhma nē ãm mē inhma. Nē te mē kot mē inhmar kêt pyrà nē mē inhmā:

—Tk. Nà kot paj mē tokyx axujarēnh kôt amnhĩ nhĩpêx kêt nē. Kot kaj mē inhmā mē ixte aa mēmoj pumunh kêt ò ho anē pa mē ja hã apumu nē axihtỳx ã apumu nē rĩ kormā hkôt amnhĩ nhĩpêx.

Anhỳr o inhmā kapêr. Tã no pa mē kām ã amnhĩ nhĩpêx anhỳr kêt nē. Ām Kris kot mē panê pĩ kahpa hã htykja pix pa htem mē kām harēnh o ri ixpa. Ja kamā nhũm mē hkwỳjaja mē inhma nē ãm mē inhma nē Kris xihỳx kêt ã ãm amarĩ htyk ã harē. No mē hkwỳjaja. Tīrtūm kot amnhĩ kaxyw mē unhwỳr xwỳnhjaja na htem mē kurom mē inhma nē ra mē inhmar tỳx kuré kumrêx. Nē mē inhmā kapêr o:

—Nà ãm hāmri na Krisja Tīrtūm pyrà nē hihtỳx o hihtỳx. Ām hāmri na ka ã harēnh anē. Anē.

No Ijaew kêt xwỳnhjaja na Ijaew pyrà nē kām amnhĩ krā hkôt amnhĩ nhĩpêx o pa hprām kêt

ně. Ně mẽ kãm mẽ àhpumunh tỳx pix prãm o pa. Jakamã na pa htem mẽ kãm Kris kapêr jarênh o ri mẽ hkôt ixpa nhũm mẽ hkwỳjaja mẽ inhma nẽ Ijaew kwỳjê pyrà nẽ ãm mẽ inhma nẽ mẽ inhmã:

—Tk. Nà na ka htem ãm ri axêx o ri apa. Kot pa mẽ akapêr mar kêt nẽ. Kot paj mẽ axàhpumunh tỳx ã mẽ apumu nẽ rĩ kormã mẽ ama nẽ mẽ akôt amnhĩ nhĩpêx.

Anhỹr tã pa mẽ ãm arĩ Kris kot mẽ panê htykja pix pa mẽ kãm harênh o ri mẽ hkôt ixpa. Nhũm mẽ hkwỳjaja mẽ inhma nẽ mẽ inhmã:

—Nà mẽ axàhpumunh kêt jakamã na ka htem atỳx ri ã ja jarênh anẽ.

Anhỹr tã no nhũm mẽ hkwỳjaja. Tĩrtũm kot amnhĩ kaxyw mẽ unhwỳr xwỳnhjaja na htem mẽ inhma nẽ mẽ inhmã kapêr o:

—Nà ãm hãmri na ka mẽ ã Krisja jarênh anẽ. Tĩrtũm pyrà nẽ àhpumunh o àhpumunh kênã. Anẽ.

²⁵ Tĩrtũm mẽ Jesus wa mẽ pakurom àhpumunh o àhpumunh nẽ hihtỳx o hihtỳx.

Tĩrtũm mẽ parom hihtỳx o hihtỳx ã harênh

Matêwre 11.25; Sikũn Korît 12.7-10; Xiakre 2.5

²⁶ E Kris kôt ixtõ nẽ ixtõxjaja. Amnepê mã Tĩrtũm kot amnhĩm mẽ axunhwỳrta ã tanhmã na ka prem amnhĩ nhĩpêx to ho ri apa? Nà na ka prem axohtô nẽ jar mẽ noo mã axàhpumunh kêt nẽ ri apa. Nẽ mẽ apê pahi hkêt nẽ ri apa. Mẽ axohtô nẽ amnhĩ to hkryre nẽ ri apa.

²⁷ Tã nhũm Tĩrtũm amnhĩ kôt mẽ ate amnhĩ to hkryre xwỳnhjê xunhwỳ. Kojã nhỹrmã kot tanhmã mẽ pahpiitã mẽ pajarênh to xà hã arĩgrota kato hãmri nhũm mẽ àhpumunh tỳx ã amnhĩ to jarkrar

xwÿnhjaja Tĩrtũm kot mẽ kurom mẽ pahto hkra hã mẽ pahpumu hãmri nẽ tee ri amnhĩ kukamã hamaxpẽr nẽ amnhĩ kamã hpijaàm tÿx nẽ. Nẽ mẽ hihtÿx ã amnhĩ to jarkrar xwÿnhjaja haxwÿja. Nhũm Tĩrtũm kot mẽ kurom mẽ pahto hkra hã mẽ pahpumu nẽ tee ri amnhĩ kukamã hamaxpẽr nẽ amnhĩ kamã hpijaàm tÿx nẽ.

28 Na hte Tĩrtũm amnhĩ kaxyw mẽ kot amnhĩ to hkryre xwÿnhjê xunhwÿ. Nẽ mẽ kot mẽ kamã kahak o pa xwÿnhjê xunhwÿ. Jar pyka ja kamã mẽ hkwy kot mẽ hkaga htã nhũm Tĩrtũm amnhĩ mã mẽ unhwÿ. Mẽmo kaxyw na hte ã amnhĩm mẽ unhwÿr anẽ? Nà mẽ kot nhÿrmã tee ri mẽ àhpumunh tÿx ã amnhĩ jarẽnh xwÿnhjê pumunh nẽ axpẽn mã mẽ harẽnh o:

—Kwa mẽ pahte mẽ àhpumunh tÿx ã mẽ harẽnh tã nhũm Tĩrtũm mẽ pahpyrà nẽ amnhĩ kaxyw mẽ unhwÿr kêt nẽ. Nà te mẽ àhpumunh kêt pyràk.

Anhÿr o axpẽn mã mẽ harẽnh kaxyw na pre Tĩrtũm amnhĩm mẽ kot amnhĩ to hkryre xwÿnhjê xunhwÿ.

29 Jakamã kot puj mẽ nhÿrmã Tĩrtũm mã amnhĩ to jarkrar pẽ tanhmã kãm amnhĩ jarẽnh to hkêt nẽ. Rÿ kãm:

—Kwa ga ixpumu Tĩrtũm. Na pa hte ã amnhĩ nhĩpêx anẽ nẽ ã amnhĩ nhĩpêx anẽ. Kwa ja hã ixpumu nẽ ixto akra nà?

Anhÿr o amnhĩ to hwÿr kêt nẽ.

30 ãm Jesus pix kukwak ri na hte Tĩrtũm mẽ pahto hkra. Tãm na pre Tĩrtũm noo mã amnhĩm mẽ paxunhwÿ. Mẽ pahte uràk nẽ pahpê hkra kaxyw. Jakamã na pu htem ãm pix kukwak ri

amnhĩ nhĩpêx mex o ri papa. Nhũm mẽ pamã àhpumunh tỳx xà hkwy gõ. Tã ra kot mẽ pahte amnhĩ tomnuj pê mẽ papytãr jakamã kot puj mẽ nhỹrmã pahtyk tã no ãm akupỹm pahtĩr nẽ Tĩrtũm mẽ wa kuri pahtĩr tũm nẽ pamex kumrêx nẽ papa ho papa.

³¹ Tã ã Jejus kot mẽ panhĩpêx kot anhỹr jakamã Tĩrtũm kapêr ã kagã htũm kot ja jarênh kot:

Kot ka mẽ amã mẽmoj tã jarkrar prãm nom kêr ka mẽ kamjaja amnhĩ to jarkrar kêt nẽ. Mẽ panhõ Pahihti ra kot mẽ panê tanhmã amnhĩ nhĩpêx toja pix ã tanhmã ho jarkrar to ho ri apa. Anẽ.

2

*Pawre kot tanhmã Kris jarênh to hã harênh
Sikũn Korît 4.1-7; Wam Pêtre 3.15*

¹⁻² E Kris kôt ixtõ nẽ ixtõxjaja. Amnepê mã ixte mẽ awỳr inhmõrta ã na pa pre inhnojarêr nẽ ijamaxpêr o:

—Kot paj ma mẽ hwỳr mõ nẽ mẽ kãm Kris kapêr jarê. Kot amnhĩ grõnh kôt mẽ inhnê htykja pa mẽ kãm harê. ãm ja pix jarênh o ri mẽ hkôt ixpa. Nom kot paj mẽ kapêr japjê xwỳnhjê pyrã nẽ mẽ kãm ixkapêr japjê hkêt nẽ. Rỳ mẽ urak nẽ te ixàhpumunh tỳx o ri ixkapêr japjê pyrãk o ri mẽ kãm ixkapêr japjê hkêt nẽ. Kot paj ãm ixkatat kôt ri mẽ kãm tanhmã Jejus jarênh to pix o ri mẽ hkôt ixpa.

Anhỹr o mẽ akukamã ijamaxpêr. Hãmri nẽ ma mẽ awỳr mõ nẽ mẽ awỳr pøj nẽ mẽ amã Jejus kot mẽ panê htyk nẽ akupỹm htĩrja pix jarênh rãhã ho ri ixpa.

³ Na pa pre tee ri amnhĩ kukamã ijamaxpêr nê ijamaxpêr o:

—Hêxta waa nê. Tanhmã kot pa we mẽ kãm Tĩrtũm kapêr jarênh to nhũm mẽ inhmar tỳx nê hkôt amnhĩ xunhwỳr kurê kumrêx wehe? Kot paj amnhĩ krã hkôt mẽ kãm harênh kêt nê. Ja kaxyw ijamaxpêr tỳx kêt kênã. Kot paj amnhĩ krã hkôt mẽ kãm harê nhũm mẽ âm inhma nê hkôt amnhĩ xunhwỳr kêt nê. Nà kot paj Tĩrtũm nhỹ hã mẽ kãm tanhmã ixkapêr to kê tãm tanhmã mẽ hkrã hto kê mẽ inhma nê hkôt amnhĩ xunhwỳr japêr.

Anhỹr o ijamaxpêr.

⁴ Nê mẽ ate inhmar kaxyw na pa pre ixêx rom tanhmã mẽ ano kupyw to ho ri ixpa hkêt nê. Rỳ mẽ pajaja mẽ ixàhpumunh xà hkôt tanhmã mẽ amã ixkapêr to hkêt nê. Na pa pre âm Tĩrtũm Karõ nhỹ hã mẽ amã awjarê. Mẽ ate mar nê hihtỳx o hihtỳx ã omunh kaxyw.

⁵ Jakamã na ka prem Tĩrtũm xihtỳx ã omu nê amnhĩ kaxyw hkôt ajamaxpêr kurê kumrêx. No pa ixàhpumunh tỳx ã ixpumunh kôt ixkôt ajamaxpêr kêt nê. Na ka prem ixkapêr ma nê ajamaxpêr o:

—Nà Tĩrtũm na mẽ parom àhpumunh o àhpumunh nê hihtỳx o hihtỳx.

Anhỹr o ajamaxpêr kôt ajamaxpêr kurê kumrêx.

Tĩrtũm Karõ kot mẽ pamã àhpumunh xà nhõr ã harênh

Matêwre 7.6; Juãw 14.22, 16.13-15; Xiakre 3.13-18

⁶ Nê na hte Tĩrtũm kra hkwyjaja Tĩrtũm kot amnhĩ nhĩpêx ã omunh mex. Nê hamaxpêr ã omunh mex. Jakamã na pa hte mẽ ahkre japjê

ho mẽ hkôt ixpa. Nom jar pika ja kamã mẽ pa-jamexpêr tỳx xà ho mẽ ahkre hkêt nê. Rỳ pika piitã hkôt mẽ utàr xwỳnhjê jamexpêr tỳx xà ho ri mẽ ahkre ho ri ixpa hkêt nê. Koja nhỹrmã mẽ àhpumunh xàja mẽ kêp hapêx pa.

⁷ Jakamã na pa hte ãm Tirtũm xàhpumunh xà pix o mẽ ahkre o ri ixpa.

Amnepê mã kormã mẽmoj piitã hkêt ri na pre Tirtũm amnhĩ kukamã amnhĩ jarênh o:

—Mê kot amnhĩ kaxyw Ixkra hkôt mẽ hamexpêr o mẽ pa xwỳnhjaja kot paj mẽ ho ixkra nhũm mẽ mex kumrêx nê pa ho pa.

Anhỹr o mẽ harê. Nom mẽ kot hkôt amnhĩ xunhwỳr kêt xwỳnhjaja nhũm kormã mẽ kãm ja ho amnhĩrít kêt nê. Tã ja na pa hte ra mẽ kãm harênh rãhã ho ri mẽ hkôt ixpa nhũm mẽ Tirtũm kãm mẽ pahto hkra hprãm hã harênh ma.

⁸ Nom pika piitã hkôt mẽ ho amnhĩptàr xwỳnhjaja na mẽ kormã ja mar kêt nê. Kêp apu mẽ kot mar ronhỹx prem pĩ kahpa hã mẽ panhõ Pahшти nhôr nê hpĩr kêt nê. Mex o mex tã nhũm prem axtem nê ã hipêx anê.

⁹ Mẽ kot mẽmoj mex pumunh kêt tã Tirtũm kapêr ã kagà htũm kot mẽmoj mex jarênh kot:

Na pre Tirtũm mẽ kãm hkĩnh xwỳnhjê kutêp mẽmoj
mex kwỳ jaxwỳ nhũm mex o mex nê mẽ ahã
hikwỹ.

Aa mẽhõ kot mẽmoj mex o mexja pumunh kêt.

Nê aa mẽhõ kot ã mẽmoj kot anhỹr pumunh kêt.

Nê aa ã mẽmoj mex kot anhỹr kukamã hamexpêr
kêt.

Tã nhũm Tirtũm mẽ kutêp hkwy jaxwỳ.

Anhÿr o kot harënh tă no nhũm mẽ kot hkôt amnhĩ xunhwÿr kêt xwÿnhjaja ã kapër anhÿrja mar kêt nẽ.

¹⁰ Mẽ pamã na pre Tĩrtũm ja ho amnhĩrĩt. Na pre ra mẽ pamã Karõ gõ nhũm mẽ pamã gjêx o mẽ pamã mẽmoj to amnhĩrĩt mex nẽ. Tĩrtũm Karõja àhpumunh tÿx o àhpumunh tÿx. Nẽ kot hprĩ hã Tĩrtũm jamaxpër pumunh par.

¹¹ No mẽ papajaja na pu htem axpën jamaxpër kôt axpën pumunh kêt nẽ. Na pu htem papam amnhĩ jamaxpër ã amnhĩ pumu. Ja pyrã nẽ Tĩrtũm Karõ pix na hte Tĩrtũm jamaxpër pumunh.

¹² No mẽ pahpê hkrajaja na hte mẽ pahkarõja pix mẽ pakamã pa hkêt nẽ. Na hte mãânën Tĩrtũm Karõja mẽ pakamã pa nẽ mẽ pamã tanhmã mẽmoj to amnhĩrĩt to ho mẽ pahkôt pa. Nẽ Tĩrtũm kot mẽ pakutêp mẽmoj mex jaxwÿrja nhũm ja kukamã mẽ pamã harënh o amnhĩrĩt.

¹³ Jakamã na pa htem amnhĩ krã hkôt ri mẽ kãm ixujarënh kêt nẽ. ãm Tĩrtũm Karõ nhÿ hã na pa hte ixprĩ hã mẽ kãm kapër jarënh o ri mẽ hkôt ixpa. Ra Tĩrtũm Karõ kot mẽ amã gjêx xwÿnhjê mã pa ÿ hã ixkapër.

¹⁴ No mẽ kãm Tĩrtũm Karõ kapër mar prãm kêt xwÿnhjaja na htem Tĩrtũm kot amnhĩ nhĩpêx pumu nẽ hprĩ hã omunh kêt nẽ. Mẽ kãm kapër mar prãm kêt jakamã na htem ri kot tanhmã mẽ pahto mex to hã harënh ma nẽ hamaxpër o:

—Tk. Kwa mo kaxyw na htem ri ã Tĩrtũm jarënh anê? Tanhmã kot we amnhĩ to nẽ mẽ pahto mex? Nã kot anhÿr kêt. Anẽ.

¹⁵ Nom mẽ pahpê Tĩrtũm kra hkwy hã mẽ pahte Karõ kapër mar mex xwÿnhjaja na pu hte mẽ

kurom Tirtûm kot amnhĩ nhĩpêx ã omunh mex nê. Nê Karõ xô ri mar mex nê nhũm mẽ kot Karõ kapêr mar kêt xwỳnhjaja tee ri ã mẽ pahte amnhĩ nhĩpêx anhỹr ã mẽ pahpumu. Nom hprĩ hã mẽ pahte Tirtûm kôt amnhĩ nhĩpêx pumunh kêt nê.

¹⁶ Tirtûm kapêr ã kagà htũm kot ja jarênh kot:

Mêhõ na kot Tirtûm jamaxpêr pumunh?

Nê mêhõ na pre we kãm hamaxpêr gõ?

Nà amrakati kumrêx. Tapxipix na àhpumunh tỳx o àhpumunh tỳx. Anê.

Tã mẽ papajaja mẽ pahte Tirtûm Karõ kapêr mar tỳx xwỳnhjaja na pu htem Kris xô ri pahprĩ hã hamaxpêr kôt omunh mex nê.

3

Mê kot Tirtûm mã tanhmã amnhĩ nhĩpêx to xwỳnhjê jarênh

Wam Korît 14.20; Karatas 5.16-21; Epes 4.14; Eprêw 5.11

¹ E Kris kôt ixtõ nê ixtõxjaja. Pa mẽ amã mẽmoj jarê ka mẽ inhma nê kãm ajamaxpêr. Nà amnepê mã kormã mẽ ate Kris kôt amnhĩ nhĩpêx tohtuj anhỹrta ã tanhmã na ka prem amnhĩ nhĩpêx to ho ri apa wehe? Na ka prem arĩ ajamaxpêr tũm kôt pix mã amnhĩ nhĩpêx. Kormã mẽ ate Tirtûm Karõ hkôt amnhĩ nhĩpêx mex kêt jakamã na ka pre htem mẽhprĩre kot amnhĩ nhĩpêx pyràk o amnhĩ nhĩpêx. Nê mẽ uràk nê kormã mẽmoj piitã omunh kêt nê. Jakamã na pa pre mẽ amã ixujarênh kaxyw nê te mẽ ate kormã Tirtûm kapêr mar kêt xwỳnhjê pyràk o mẽ anhĩpêx nê mẽ amã tanhmã ixujarênh to.

² Mě hkaràre na htem mẽ hkà kagô pix kaô nê kormã mẽ apkur xà mex kur kêt nê. Ja pyrà nê na pa pre te ixte mẽ ato hpijaôr pyrà nê mẽ amã Tĩrtũm kapêr piitã harênh par kurê kumrêx kêt nê. ãm mẽ amã hkwȳ pix jarê ka prem ama nê Jejus kôt amnhĩ xunhwỳ. Tã na pa hte arĩ mẽ amã hkwȳ pix jarênh o ri ixpa nê kormã piitã ho mẽ ajahkre jatur xàm mênh kêt nê.

³ Na ka htem arĩ te mẽ apê Kris kwỳ hkêt pyræk o amnhĩ nhĩpêx o apa. Nê mẽmoj kôt axpên kãm agryk axpên mã axàkjêr o apa. ã amnhĩ nhĩpêx anhỹr jao arĩ mẽ ate amnhĩ nhĩpêx tũm kôt amnhĩ nhĩpêx rãhã nê.

⁴ Na hte mẽ akwỳjaja amnhĩ jarênh o: “Ixpê Pawre hkwȳ na pa.” Anê. Nê mẽ akwỳjaja amnhĩ jarênh o: “Pa na ixpê Apor kwỳ na pa.” Anê. Kwa na ka htem ã amnhĩ jarênh anhỹr o te mẽ apê Kris kwỳ hkêt pyræk.

⁵ Apor mẽ pa ãm wa ixte Tĩrtũm kapêr o mẽ ajahkre xwỳnh pix na pa wa. Wa ixpê mẽ anhõ pahihtĩ hkêt kênã kot ka kêt mẽ axtem nê mẽ apê ahpỹnhã wa ixkwỳ hã amnhĩ jarê. Na pa pre wa mẽ amã Tĩrtũm kapêr jarênh o ri mẽ akôt ixpa ka prem wa inhma nê amnhĩ kaxyw hkôt ajamaxpêr tỳx nê. Nê hkôt amnhĩ xunhwỳ nom wa pa wa ixkôt amnhĩ xunhwỳr kêt nê. Na pa wa ãm Tĩrtũm kapêr o mẽ ajahkre nom amnhĩ kôt mẽ axunhwỳr kêt nê.

⁶⁻⁹ E pa ixprĩ hã mẽ amã war amnhĩ jarê ka mẽ inhma. Te wa ixpê Tĩrtũm pur kãm wa ixapênh xwỳnh pyræk no mẽ kajaja te mẽ apê hpur pyræk. Na htem hpur karê nhũm hirã nhũm mẽ kamã

ahkre ho pa. Ja pyrà nê na pa pre ixkumrêx mē awÿr ixpa nê mē amã Tĩrtũm kapêr jarênh o ri mē akôt ixpa. Te mē kot pur kãm ahkre ho ri pata pyræk. Tã nhũm Apor ixpãnhã ma mē awÿr pa nê te mē kot pur karêrta pyræk o mē anhĩpêx nê mē amã Tĩrtũm kapêr o mē ajahkre mex o ri pa. Xà na hte pur karêr xwÿnhja rÿ kamã ahkre xwÿnhja tãm tanhmã mēmo hy hto nhũm ra higrôt nê hprêk nê ô? Nà na htem ãm ahkre hpa nhũm arĩ hikwÿ. Nhũm Tĩrtũm tãm tanhmã hyta to nhũm higrôt nê hprêk nê ô. Ja pyrà nê na hte Tĩrtũm mē ho hkra nê tanhmã mē ho nhũm mē amnhĩ kaxyw hkôt hamaxpêr tÿx nê hkôt amnhĩ nhĩpêx mex o pa. Nom mē kãm harênh o pa xwÿnhhta kôt amnhĩ xunhwÿr kêt nê.

Nê na hte pur karêr xwÿnh rÿ kamã ahkre xwÿnhja tãm tanhmã hyta to nê ho htĩr kêt nê. Tĩrtũm pix na hte tanhmã ho nhũm higrôt. Ja pyrà nê na pa hte Tĩrtũm kapêr o mē ajahkre o ri mē akôt ixpa nom pa tanhmã mē ato ka mē apê Tĩrtũm kra nê ri apa hkêt nê. Tanhmã kot pa mē ato ka mē apê hkra? Tapxipix na kot mē pahto hkra kaxyw àhpumunh. Nê tapxipix na hte tanhmã mē pahkrã hto pu mē kãm hprãm xà hkôt amnhĩ nhĩpêx mex o ri papa.

Nê pur karêr xwÿnh mē pur kãm ahkre xwÿnhja wa. Hamê wa àpênh mex jakamã koja hamê wa kot pur kãm àpênh pãnhã amnhĩm ujamÿnh rax nê. Ja pyrà nê kot paj mē ixte Tĩrtũm kapêr o mē ajahkre ho ri mē akôt ixpa xwÿnhjaja nhũm Tĩrtũm nhÿrmã mē ixàpênh pãnhã mē inhmã amnhĩrer mex nê.

Nê te mē ate Tĩrtũm nhõ ixkre pyræk.

10 Nê pa te ixpê Tĩrtũm mã ixkre hã ixapênh xwỳnh pyràk jakamã na pre Tĩrtũm mẽ akaxyw tanhmã ixto pa mẽ amã tanhmã kot amnhĩ nhĩpêx to hã harênh o ri mẽ akôt ixpa. Te ixte õ ixkre kaxyw âm xà maati xãm pyràk o mẽ anhĩpêx. Jao mẽ amã kapêr jarênh o ri mẽ akôt ixpa. Mẽ ate amnhĩ kaxyw hkôt ajamaxpêr nê hkôt amnhĩ xunhwỳr kaxyw. Tã na ka prem hkôt amnhĩ xunhwỳ nhũm ixpãnhã Tĩrtũm kapêr o mẽ ahkre ho mẽ pa xwỳnh kwỳjaja mẽ awỳr mra nê mẽ amã kapêr jarênh jatur xàm kurê. Nê hprĩ hã ho mẽ ajahkre ho ri mẽ akôt pa. Te ho mẽ kot ixkre krax nhĩpêx pyràk o mẽ anhĩpêx.

Nê kwa mẽ ate mẽ ahkre o mẽ apa xwỳnhjaja kêr ka mẽ akatàt kôt mẽ ahkre mex rãhã ho ri mẽ hkôt apa.

11 Nê Jejus Kris tapxipix na pu htem hkôt amnhĩ xunhwỳ nhũm mẽ panê mẽ pahte amnhĩ tomnuj o hapêx. Jakamã te kêp kỳxpê ixkre nhĩmõk ã nør xà maatita pyràk.

12 Nê na htem tõhã ixkre nhĩpêx kaxyw nê pĩ htỳx jakà nê ho hipêx nhũm kritpêm mẽ kãm mex ry nê kuhê. No na htem tõhã nojarêť kãm ixkre hã apê nê pĩ rerek o hipêx nhũm mẽ kãm mex ry hkêť nê. Kojã rờr nhyre hwỳr mra nê mẽ kêp hapòk nê homnu. Ja pyrà nê na hte Tĩrtũm kapêr o mẽ ahkre ho ri mẽ pa xwỳnh kwỳjaja te mẽ kot katàt kôt pĩ htỳx o ixkre nhĩpêxta pyrà nê katàt kôt mẽ ahkre ho ri mẽ hkôt pa. No nhũm mẽ hkwỳjaja axtem nê te mẽ kot pĩ rerek o ixkre nhĩpêxta pyràk o amnhĩ nhĩpêx nê htỳx ri Tĩrtũm kapêr kwỳm ri tanhmã mẽ ahkre hto ho pa. Jao hkwỳm ri amnhĩ nhĩpêx rãhã ho ri pa.

13 Nē koja mēhō pī htỳx pix o amnhīm ōrkwỹ nhĩpēx hāmri nhūm mēmo arĩgro hā tanhmā amnhĩ to nē kēp pōr. No ãm hā pōja pix xēt pa nhūm kām hikwỹ xà nē ōkwa êja arĩ piitā mex nhūm ixkre hpām axte hā pô janhōr o nyw. No koja pī rerek o hipēx nhūm mēmo arĩgro hā kēp pōr hāmri nē piitā kēp kaxàr pa. Ja pyrà nē koja nhỹrmā Krisja akupỹn mē pahwỳr wrỳ hāmri nē mē pahte kām tanhmā amnhĩ nhĩpēx to ho papaja piitā hā mē pahpumunh kōt tanhmā mē pajarēnh to. Koja mē pahkwỳjaja mē pahte mē kot pī htỳx o ixkre nhĩpēxta pyrà nē Tĩrtũm mā mē pahte amnhĩ nhĩpēx mex o mē papa xwỳnhjē xàpēnh pumu nē mē pahte amnhĩ to mex xwỳnh ã mē pajarē. Hāmri nē hpānhā mē kot pī rerek o ixkre nhĩpēxta pyrà nē mē kot kām amnhĩ nhĩpēx mex kēt xwỳnhjē pumu nē mē kot amnhĩ to mex kēt xwỳnh hā mē harē.

14 Nē pī htỳxja na hte tanhmā amnhĩ to nē hpōr no ãm arĩ mex nē kuhē nhūm mē piitā arĩ mex ã omu. Ja pyrà nē koja Krisja mē kot kām tanhmā amnhĩ nhĩpēx mex to ho mē pa xwỳnhjē pumu nē mē kot tanhmā kām amnhĩ nhĩpēx to hpānhā mē kām amnhĩre nhūm mē piitā mē kot amnhĩ to mex ã mē omu.

15 No pī rerekja na hte pōr nē kaxàr pa. Ja pyrà nē mē kot Kris mā amnhĩ nhĩpēx mex hkēt xwỳnhjaja koja Tĩrtũm mē kām amnhĩrer kēt nē. Nom arĩ mē kēp hkra jakamā koja mē arĩ kuri htĩr tũm nē pa. No ãm mē kot Tĩrtũm mā amnhĩ nhĩpēx mex kēt jakamā koja mē hkwỳjē hkĩnh ã amnhīm mēmoj mex kwỳ jamỳnh kēt nē. Te mēhō nhōrkwỹ kēp hpōr nhūm mē hkukrēx kwỳ jamỳnh kēt nē ỹ kamā kurũm hapōx pyrāk.

16-17 E pa mẽ amã mẽmoj jarẽ. Ra mẽ ate mar tã mãn ka mẽ ra tanhmã amnhĩ to nẽ hã ano hkêt rỳ ko. Nà te mẽ pahpê Tĩrtũm nhõrkwỹ pyràk. Tĩrtũm nhõrkwỹja õ na. Tã mẽ pahpê hkra nhũm Karõ kot mẽ pakaxwỳnh mã gjêx jakamã te mẽ pahpê õrkwỹ pyràk. Jakamã mẽ kot kapêr kwỳm ri mẽ ajahkre o ri mẽ pa xwỳnhjaja te mẽ kot Tĩrtũm nhõrkwỹ grành xwỳnh pyràk. Kojã mẽ nhỹrmã amnhĩ xà htỳx kamã hamak o pa.

Mẽ pahte amnhĩ to jarkrar kêt ã mẽ pamã karõ
Wam Korît 1.10-25

18 Nẽ kot kaj mẽ atõ axàhpumunh tỳx o amnhĩ to jarkrar o ri apa japêr. Kwa mẽ jam anhũre nẽ axte ri ã amnhĩ nhĩpêx anhỹr kêt nẽ. Nẽ te mẽ ate amnhĩ nê axàhpumunh tỳx xàja nhãm rẽn par pyràk o amnhĩ nhĩpêx. Mẽ paxàhpumunh xàja pika kamã mẽ àhpumunh pix jakamã kêt ka mẽ te amnhĩ nê nhãm rẽn pyrã nẽ hpãnhã Tĩrtũm xàhpumunh xà hkôt pix mã amnhĩ nhĩpêx o ri apa.

19 No pika kamã mẽ àhpumunh xwỳnhjaja Tĩrtũm noo mã te mẽ hkrã pipãnh nẽ htỳx ri pata pyràk. Tĩrtũm kapêr ã kagà htũm kot mẽ harẽn kot: Pika ja kamã mẽ àhpumunh tỳx ã mẽ kot amnhĩ to jarkrar xwỳnhjaja Tĩrtũm noo mã te mẽ kot amnhĩ to hêx o pa pyràk. Anẽ.

20 Nẽ mãânẽn mẽ harẽn kot: Mẽ kot amnhĩ xàhpumunh tỳx ã amnhĩ to jarkrar o ri mẽ pa xwỳnhjaja na hte Tĩrtũm mẽ omu nẽ mẽ kot ã amnhĩ jarẽn anhỹr kaprỳ hã mẽ harẽ. Anẽ.

21-22 Jakamã kwa kêt ka mẽ axte mẽ apê ixkwỳ rỳ mẽ apê Apor kwỳ hã amnhĩ jarẽn o ri apa hkêt nẽ. Mẽ apê wa ixkwỳ hkêt kênã. Nẽ mẽ apê nhãm

mêhõ hkwỳ hkêt. Mẽ pahpiitã mẽ pahpê Kris kwý na pu mẽ.

Nẽ kot puj mẽ nhỹrmã pahtyk tã akupỹm pahtĩr nẽ Tĩrtũm mẽ Jejus wa kuri pamex nẽ pahtĩr tũm nẽ ri papa. Jakamã kwa mẽ tee ri amnhĩ kukamã ajamaxpêr kêt nẽ.

Nẽ jarãhã mẽmoj piitã mẽ panhõõ. Nẽ kormã mẽmoj kot amnhĩrĩt kêt xwýnhjaja haxwýja mẽ panhõ na. ãm mẽmoj piitã mẽ panhõ jakamã te mẽ pahpê mẽmoj piitã mẽõ pahi pyræk.

²³ No mẽ papajaja axtem Kris kêp mẽ panhõ Pahihti. Nẽ Tĩrtũm kêp Kris nhõ Pahihti.

4

*Tĩrtũm pix kot tanhmã mẽ pajarênh to xwýnh ã harênh
Eprêw 13.17*

¹ Nẽ mẽ pajaja mẽ ixpê mẽ anhõ pahi hkêt. ãm mẽ ixte Kris mã tanhmã amnhĩ nhĩpêx to ho ixpa xwýnh pix jakamã Tĩrtũm kormã kapêr kwý ho amnhĩrĩt kêtja na pa htem mẽ amã ho amnhĩrĩt o ri mẽ akôt ixpa. Ja kaxyw na pre mẽ ixunhwý.

² Na pre Kris tanhmã mẽ inhmã kapêr to nẽ mẽ inhmã:

—E kêr ka mẽ ixkapêr pix o mãn mẽ ahkre ho ri mẽ hkôt apa. Anẽ.

³⁻⁴ Kumã pix mã ixte amnhĩ nhĩpêx o ri ixpa jakamã koja tapxipix ixte kãm amnhĩ nhĩpêx ã ixpumunh kôt tanhmã ijarênh to. Ixte kãm amnhĩ nhĩpêx mex ã ijarê rý ixte kãm amnhĩ nhĩpêx mex kêt ã ijarê. ãm tapxipix koja tanhmã ijarênh to. No koja nhãm mẽhõ rý mẽ atõ ã ijarênh anẽ pa

ama nẽ ãm ama. Rỳ papam tanhmã kãm ixte amnhĩ nhĩpêx mex to hã kãm amnhĩ jarênh japêr hãmri nẽ ãm ixtỳx kãm ã amnhĩ nhĩpêx anhỳr ã amnhĩ jarênh kaprỳ. Pahihti Kris pix kot hprĩ hã mẽ pahte amnhĩ nhĩpêx kôt pahpumunh jakamã tapxipix koja tanhmã mẽ pajarênh to.

⁵ Jakamã kwa kêr ka mẽ ri mẽ kot Tirtũm mã tanhmã amnhĩ nhĩpêx to hã mẽ omunh xà hkôt tanhmã mẽ harênh to hkêt nẽ. Koja nhỹrmã Pahihti Krisja akupỹn mẽ pahwỳr wrỳ nẽ rĩ tãm tanhmã mẽ pahte amnhĩ nhĩpêx to hã mẽ pahpumunh xà hkôt tanhmã mẽ pajarênh to. Nẽ mẽ kot hpimxur pê tanhmã amnhĩ tomnuj to ho mẽ pa xwỳnhjaja nhũm mẽ piitã mẽ noo mã mẽ kãm ja ho amnhĩrĩt nhũm mẽ ja hã mẽ omu. Nẽ mẽ pahpiitã mẽ pajamaxpêr xà ho amnhĩrĩt nhũm mẽ piitã hprĩ hã ja hã axpên pumu. Hãmri nhũm Tirtũm rĩ kormã mẽ pahte kãm tanhmã amnhĩ nhĩpêx mex to ho pa xwỳnhjê jarê.

⁶ E Jejus kôt ixkwỳjaja. Nà na pa ã mẽ amã Apor mẽ wa amnhĩ jarênh anẽ. Mẽ ate inhmar nẽ Tirtũm kapêr ã kagà hkôt tanhmã wa ijarênh to kaxyw. Kot kaj mẽ ã amnhĩ nhĩpêx anẽ hãmri nẽ ahpỹnhã tanhmã mẽ ixte Kris kapêr jarênh xwỳnhjê jarênh to hkêt nẽ. Nẽ axpên mã mẽ ijarênh o:

—Nà tãm kot Kris kapêr jarênh mex o kot hkwỳjê jakrenh jakamã kot paj hkôt pix mã mãn ri ixpa.

Anhỳr o axpên mã mẽ ixtõ jarênh kêt nẽ. Kot kaj mẽ ã mẽ ixtõ jarênh anẽ nẽ te mẽ ixto jarkrar pyræk o amnhĩ nhĩpêx.

⁷ Kwa mēhõ na pre mẽ amã tanhmã ri mẽ ijarênh to ka mẽ mar xà hkôt ã mẽ ijarênh anẽ? Nẽ mẽ ixkapêr mex ã mẽ ixkwỳjê jarê nẽ mẽ ixkapêr mex

kêt ã mẽ ixkwỳjê jarê. Nà na ka mẽ ãm amnhĩ krã hkôt ã mẽ ijarênh anê nom Kris xàhpumunh xà ho ã mẽ ijarênh anhỹr kêt nê. ãm mẽ ixte Tĩrtũm kapêr o mẽ ajahkre xwỳnhjaja na pa prem mẽ amã mẽmoj jarê ka mẽ ama nê mẽ inhỹ hã hkôt axàhpumunh mex nê. No amnhĩ krã hkôt mẽ axàhpumunh kêt kênã kot ka kêt mẽ ã ahpỳnhã tanhmã mẽ ixto jarkrar anhỹr to ho ri apa.

⁸ Te mẽ ate Apor mẽ wa ixrom Tĩrtũm kapêr mar par nê hkôt amnhĩ nhĩpêx mex pyràk. Te wa ixrom mẽ ate Jejus nhĩhkô hã mẽ ho amnhĩptàr pyràk. Hêxta waa nê. Kop apu ãm hãmri mẽ ate ãhkô hã mẽ ho amnhĩptàr ronhỹx pa ijaxwỳja mẽ apyrà nê ã amnhĩ nhĩpêx anê. Hãmri nê ixkĩnh tỳx kumrêx.

⁹ Nom ja kot anhỹr kêt.

*Jejus nhỹ hã mẽ ahkre xwỳnhjê jarênh
Sikũn Korit̃ 4.8-10; Eprêw 12.1*

Nê mẽ ixpê Jejus nhỹ hã mẽ ajahkre ho mẽ ixpa xwỳnhjaja te Tĩrtũmja axtem tanhmã mẽ inhĩpêx to pyràk pa mẽ inhmex kêt nê ixpa. Te mẽ ixte gyw kãm amnhĩ rênh nhũm mẽ kot mẽ ixkamã ôkre kahak pyràk o na htem mẽ inhĩpêx. Jakamã na hte mẽ hkwỳjaja mẽ ixpumu nê mẽ ixkapêr ma nê ãm mẽ inhma nê axpên mã mẽ ijarênh o:

—Tk. Kot mẽ ahkreja mexti hã. Kwa pu mẽ himex ri.

Anhỹr jakamã te ra mẽ ixtyk nê mẽ inhĩkwỹ nhũm mẽ piitã mẽ ixtã htu nê mẽ ixpumunh nê ma pa pyràk o amnhĩ nhĩpêx. Jakamã na htem mẽ ixte mẽ ahkre ma nê ãm kuma nê ma pa. Nom Tĩrtũm kapêr o mẽ wrỳk xwỳnhjaja na htem ja hã mẽ pahpumu nê axpên mã mẽ pajarênh o:

—Kwa mẽ kot Jejus ã mẽ hipêx kati htã nhũm mẽ arĩ hkôt amnhĩ nhĩpêx mex nẽ aa hkaga hkêt nẽ. Hêxta waa nẽ. Nà ãm hãmri na htem ã amnhĩ nhĩpêx anhỹr o pa. Anẽ.

¹⁰ Na hte mẽ kot mẽ ixkapêr mar xwỳnh kwỳjaja kãm mẽ ixkĩnh kêt nẽ tanhmã mẽ ixto kapêr punuj to. No mẽ kajaja nhũm mẽ ã mẽ ato kapêr anhỹr kêt nẽ. Na htem mẽ ixkrã pipãnh ã mẽ ijarẽ no mẽ kajaja nhũm mẽ Kris nhỹ hã mẽ axãhpumunh tỳx ã mẽ ajarẽ. Nẽ mẽ ixte Tĩrtũm kapêr kôt amnhĩ nhĩpêx mex kêt ã mẽ ijarẽ no mẽ kajaja na htem Tĩrtũm kôt mẽ ate amnhĩ nhĩpêx mex ã mẽ ajarẽ. Nẽ mẽ kot mẽ ixkamã òkre kahak tỳx tã mẽ akamã òkre kahak kêt nẽ mẽ kãm mẽ akapêr mar prãm nẽ.

¹¹ Na pa htem arĩ Kris ã ixpunuj nẽ ixpa. Nẽ mẽ inhmã prãm nẽ mẽ inhmã kôr nẽ ri ixpa. Nẽ mẽ ixê pikaxônhre nẽ ri ixpa. Nhũm htem Kris ã mẽ ixtak rũnh nẽ. Pa mẽ inhõrkwỹ hkêt nẽ nhãm ri ixpa nẽ nhãm ri ixpa. Na pa htem arĩ ã amnhĩ nhĩpêx anhỹr o ri ixpa.

¹²⁻¹³ Nẽ ixàpkur xà kaxyw ixàpênh rũnh o ri ixpa. Nhũm hte mẽ kãm Jejus prãm kêt xwỳnhjaja mẽ ijaprỳ ho pa htã pa mẽ amnhĩ kurom mẽ kãm ixkapêr mex nẽ mẽ kãm:

—E kê Tĩrtũm mẽ ato mex nẽ ka mẽ amex nẽ apa. Anẽ.

Nẽ mẽ kot mẽ inhĩpêx kati htã pa htem mẽ kutã amnhĩ to htỳx nẽ arĩ mẽ hkôt ixpa. Na htem te mẽ kot ahpunuj nhĩpêx pyrãk o mẽ inhĩpêx nẽ mẽ ixwỳr mrrar kêt nẽ. ã na htem mẽ ixte Jejus nhỹ hã mẽ ahkre o mẽ ixpa xwỳnhjê nhĩpêx anẽ.

*Pawre te kêp mẽ hpãm pyræk ã kot amnhĩ jarẽnh
Wam Tesarõn 2.11-12*

¹⁴⁻¹⁵ E Kris kôt ixkwỳjaja. Na pa ã mẽ amã kagà nẽ mẽnh anẽ. Nom mẽ ate inhmar nẽ amnhĩ kamã apijaàm kaxyw kêt. Inhmã mẽ ajapê jakamã na pa ã mẽ amã ixkapêr nẽ hã kagà nẽ mẽnh anẽ. Na mẽ ra ohtô nẽ ixpãnhã mẽ awỳr pa nẽ mẽ amã Tĩrtũm kapêr o mẽ ajahkre. Nom ixkumrêx na pa pre mẽ amã kapêr jarê ka prem inhma nẽ Kris hkôt amnhĩ xunhwỳ nẽ amnhĩ kaxyw hkôt ajamaxpêr tỳx nẽ. Jakamã paxipix te ixpê mẽ apãm nhũm te mẽ apê ixkra pyræk.

¹⁶ Jakamã kwa mẽ ixte amnhĩ nhĩpêx kôt ixpumu nẽ ixkôt mãn kêt mẽ amnhĩ nhĩpêx o ri apa.

¹⁷ ã mẽ ate amnhĩ nhĩpêx anhỳr kaxyw na pa pre ijamaxpêr nẽ ma mẽ awỳr Ximotre mẽ. Haxwỳja Kris kôt te kêp ixkra pyræk. Nẽ inhmã hapêê. Na hte jar Kris mã tanhmã amnhĩ nhĩpêx mex to ho pa. Tã pa pre mẽ awỳr kumẽ. Koja ma mẽ awỳr mỗ nẽ pøj nẽ mẽ amã Kris kapêr jarẽnh o ri mẽ akôt pa. Nẽ mẽ amã tanhmã ijarẽnh to nẽ mẽ amã:

—Nà Pawre na hte Jejus Kris jamaxpêr kôt hamaxpêr o pa. Nẽ kot amnhĩ nhĩpêx kôt amnhĩ nhĩpêx o pa. Nẽ krĩ piitã hkôt mẽ kot uræk nẽ ã amnhĩ nhĩpêx o pa anhỳr kaxyw mẽ ahkre mex o pa. Anẽ.

¹⁸ Nẽ na xep mẽ akwỳjaja te ra àhpumunh tỳx pyræk nẽ tanhmã ijarẽnh to nẽ ijarẽnh o:

—Pawreja akupỳn mẽ pahwỳr mỗr ã amnhĩ jarẽnh tã koja akupỳn mỗr kêt nẽ kãm ga. ãm kapêr kati xwỳnh na.

¹⁹ Anhỳr ã ijarẽnh tã koja Tĩrtũm kãm tokyx ma mẽ awỳr inhmỗr prãm hã kot pa ma mẽ awỳr

inhmõr kurê kumrêx. Hāmri nê pōj nê ixprī hā ã mē kot ixto kapēr anhÿr xwÿnhtajê pumu. Nê mēhō kot ã mē kām ijarēnh anhÿr xwÿnhta ã ahkukja.

²⁰ Tirtūm krajaja na htem hkôt pix mā amnhī nhīpêx jakamā na htem hkôt tanhmā amnhī nhīpêx to hā mē omu nê rī kormā kēp hkra hā mē harē. Tā kot paj nhÿrmā mē awÿr pōj nê ã ixto kapēr anhÿr xwÿnhjê pumu nê ixprī hā mē kot amnhī nhīpêx ã mē omu nê rī kormā tanhmā mē harēnh to. Jao Tirtūm nhÿ hā mē kot mē ajahkre hā mē omu rÿ amnhī krā hkôt mē kot mē ajahkre hā mē omu nê rī kormā tanhmā mē harēnh to.

²¹ Jakamā kwa mē tokyx ixkutêp tām amnhī nhīpêx o ri apa. Kêr pa mō nê mē awÿr pōj nê mē ate tām amnhī nhīpêx ã mē apumu nê ixkīnh nê. Nê mēmoj tā mē amā ixàkjêr kêt nê. Nê mē amā ixkapēr mex pix o ri mē amā ixkapēr. Te mē hipêxà kot hkrajê mā kapēr mex pyrāk o mē amā ixkapēr mex nê. Hāmri pu mē axpēn pumu nê pahkīnh nê.

5

Mēhō kot tanhmā amnhī tomnuj to hā harēnh Sikūn Korît 2.5-11

¹ Nê kwa na pa pre tee ri mē anhīōja jarēnh ma nê ixkaprī htÿx nê. Na xep hte amnhī tomnuj tÿx pē nā puro hā hpijaàm kêt o pa. Kwa mē pahpê Kris kwÿjaja mē pahte ã amnhī nhīpêx anhÿr kêt nhūm mē kot Kris kôt amnhī xunhwÿr kêt xwÿnhjaja haxwÿja ã amnhī nhīpêx anhÿr kêt tā nhūm ra mē anhīōja kot Kris kôt amnhī xām tā ã amnhī nhīpêx anē. Kwa ja omnuj tÿx kumrêx.

² Na xep ri ã amnhĩ nhĩpêx anhÿr o pa ka mẽ ja hã omu nê ãm omu nê nê tanhmã kãm nê hkêť nê. Amarĩ hã omunh o ri hkôť apa. Mẽ ate Tĩrtũm kôť axàhpumunh tÿx ã amnhĩ jarênh tã no ãm ja hã omu nê ãm hã omu nê nê tanhmã kãm nê hkêť nê. Kwa nà. Mẽ tee ri kot ã amnhĩ nhĩpêx anhÿrja ã omu nê akapřĩ nê hkêť wehe. Nê mẽ tokyx amnhĩ nê hano kê mẽ akôť Tĩrtũm mã amnhĩ jarênh xà hã ixkre hwÿr axte mřar kêť nê.

³⁻⁵ Ixte mẽ apê awry htã ã kot amnhĩ nhĩpêx anhÿr ã harênh ma nê hkukamã tanhmã ija-maxpêr to. Nà ra ixte mẽ awÿr ixpôx ronhÿx pa mẽ ato akupřô. Pahiťi Jejus nhÿ hã mẽ ato akupřô nê mẽ amã kot amnhĩ tomnuj xwÿnhťa jarê nê mẽ anê hanor kurê kumřêx. Jakamã e kêr ka mẽ mãmřĩ ã amnhĩ nê hipêx anê. Mẽ panhõ Pahiťi Jejus nhÿ hã amnhĩ nê hano nê te Satanasti mã rer pyràk kê tee ri ja hã amnhĩ pumu nê tokyx kãm urer japêr. Hãmri nê akupÿm tãm amnhĩ nhĩpêx. Kê nhÿrmã Pahiťi akupÿn mẽ pahwÿr wrÿ nhũm ma mẽ pahkôť ô krĩ hwÿr api.

⁶ Mẽ ate Tĩrtũm kapêr jarênh mar mex ã amnhĩ jarênh tã kormã amnhĩ nê ã kot amnhĩ nhĩpêx anhÿr xwÿnhťa janor kêť nê. Kwa mẽ tokyx amnhĩ nê hano. Na htem pãwti nhĩpêx kaxyw nê kamã kot ho hikot xà ho hkryre nê kamã kurê nê gaa nê řĩ ho piitã hikot pa. Ja pyrà nê kot ka mẽ amnhĩ nê kot amnhĩ tomnuj xwÿnhťa janor kêť nê hãmri nê gaa nê ra uràk nê apiitã ã amnhĩ nhĩpêx anhÿr o ri apa.

⁷ Kwa mẽ tokyx amnhĩ nê hano. Kêr ka mẽ arĩ amnhĩ to mex pix o ri axpêň kôť apa nê tãm ri amnhĩ nhĩpêx o ri axpêň kôť apa. Na pre ra Jejus

Kris mẽ pahte amnhĩ to mex o papa kaxyw mẽ panê ty. Mẽ pahpiitã mẽ panê ty.

⁸ Jakamã na pu htem ãm amnhĩ to mex pix o ri papa. Nẽ tãm amnhĩ nhĩpêx o ri papa. Jao tanhmã amnhĩ tomnuj to ho ri papa hkêt nẽ.

⁹ Nẽ wam ixte mẽ awÿr kagà nẽ mênhta kamã na pa pre mẽ amã:

—Kêr ka mẽ nhãm mẽ kot mênijê kamã hpijaàm kêt o mẽ pa xwÿnhjê hkôt ri apa hkêt nẽ. ãm ri mẽ hkàx ã apa.

Anhÿr o mẽ amã hã karõ.

¹⁰⁻¹¹ Nom na pa pre mẽ piitã ã mẽ nê mẽ akurê anhÿr kêt nẽ. ãm mẽ kêp Kris kwÿ hã amnhĩ jarênh tã ã ri amnhĩ tomnuj anhÿr xwÿnh pixjaja na pa pre mẽ nê mẽ akurê. Koja mêmõ kêp Kris kôt mẽ pahtõ rÿ mẽ pahtõx ã amnhĩ jarênh tã mẽ kamã hpijaàm kêt o ri pa ka mẽ ja hã omu nẽ hkôt ri apa hkêt kurê kumrêx.

Nẽ mẽ kãm nhãm mẽ hkukrêx kĩnh o kãm ho õ hprãm o ri mẽ pa xwÿnhjaja.

Nẽ sãnti kutã hkõn krã ho rôrõk nẽ hkrĩ nẽ kãm mex ã harênh o ri mẽ pa xwÿnhjaja.

Nẽ mẽ kot axpên to kapêr punuj o ri mẽ pa xwÿnhjaja.

Nẽ mẽ pipãnh o ri mẽ pa xwÿnhjaja.

Nẽ axpên pê ri mẽ àhkĩnh o mẽ pa xwÿnhjaja.

Koja mêmõ kêp Kris kwÿ hã amnhĩ jarênh tã ã amnhĩ nhĩpêx anhÿr o ri pa ka mẽ ja hã mẽ omu nẽ hkôt ri apa hkêt kumrêx. Nẽ mẽ kutã axàpkur kêt nẽ. ãm mẽ hkàx ã ri mra.

No mẽ kêp Kris kwÿ hkêt xwÿnhjê nê na pa pre ã mẽ akurê anhÿr kêt nẽ. Mẽ piitã ã mẽ kot

amnhĩ nhĩpêx anhÿr o pa kênã. Na htem axpên kãm hpijaàm kêt o ri pa.

Nê mẽ kãm axpên kukrêx kĩnh o kãm ho õ hprãm o ri pa.

Nê sãnti kutã hkõn krã ho rôrôk nê hkrĩ nê kãm amnhĩ jagrer pê amnhĩ to hwÿr o pa.

Nê mẽ axpên pê àhkĩnh pix o pa.

Kris kwÿ hkêt xwÿnhjaja na htem ã amnhĩ nhĩpêx anhÿr o pa. Tã tanhmã kot ka wem amnhĩ to nê mẽ hkàx ã ri apa? Mẽ piitã ã mẽ kot amnhĩ nhĩpêx anhÿr kênã. Kot puj mẽ nhÿrmã Tirtũm nhõ krĩ mex wÿr api nê rĩ kormã mẽ hkàx ã ri papa.

¹²⁻¹³ Nê mẽ kêp Kris kwÿ hkêt xwÿnhjaja na pa hte mẽ kot amnhĩ tomnuj ã mẽ omu nê ãm mẽ omu nê tanhmã hã mẽ kãm nê hkêt nê. Tirtũm tãm koja nhÿrmã ja hã tanhmã mẽ hipêx to. No koja Kris kôt mẽ pahtõ rÿ mẽ pahtõxjê hõ tanhmã amnhĩ tomnuj to ho pa pu mẽ pahtõ ja hã omu nê nê tanhmã kãm pakapêr to kurê kumrêx. Tirtũm kapêr ã kagã htũm kot ja jarênh kot:

Kêr ka mẽ amnhĩ nê Kris kôt akwÿjê hõ kot tanhmã amnhĩ tomnuj to ho pa xwÿnhjê jano. ã harênh kot anhÿr.

6

Mẽ pahte Kris kwÿjê ho pakapêr kêt

Matêwre 5:38-40

¹ Nê na ka xep htem Kris kôt atõ rÿ atõxjê hõ mẽ ka wa tanhmã axpên tomnuj to nê axtem nê juisti hwÿr axpên to mra. Mẽ apyrã nê kêp Kris kwÿ hkêt tã ka htem ma hwÿr amnhĩ to mra nhũm war axpên tã war ama nê tanhmã war ajarênh to. Kwa mon ka htem axtem nê ã Kris kwÿ hkêt xwÿnhjê

hwỳr mẽ amnhĩ to amrar aně? Kêt mẽ Kris kôt anhĩõ hwỳr măn kêt mẽ amnhĩ to mra ně kumã măn amnhĩ jarě kê axpẽn tã war ama ně axpẽn tã tanhmã war amã kapěr to.

² Ra mẽ ate ja mar tỳx tã hkôt amnhĩ nhĩpêx kêt ně. Měmoj ãm grire htã ka wa tokyx akupỹm hã tãm axpẽn xãm kêt ně. Rỳ Kris kôt war atõjê hõ hwỳr wa amnhĩ to atēm nhũm akupỹm tãm axpẽn tã war axãm kêt ně. ãm axtem ně mẽ kệp Kris kôt mẽ atõ hkêt xwỳnhjê hwỳr amnhĩ to mra. Kwa mẽ ã amnhĩ nhĩpêx anhỹr kêt ně. Mě pahpê Kris kwỳjaja kot puj mẽ nhỹrmã Kris nhĩhkõ hã mẽ kệp hkwỳ hkêt xwỳnhjê tanhmã mẽ harěnh to.

³ Ně Tirtũm kapěr o mẽ wrỳk xwỳnhjaja kot puj mẽ mẫnẽn nhỹrmã tanhmã mẽ harěnh to ho pahkrĩ. Jakamã kwa mãmri ã mẽ pahte amnhĩ nhĩpêx anhỹrja kukamã akupỹm tanhmã axpẽn xunhwỳr to ho apa. Měmoj tã mẽ atõjê hõ wa kot tanhmã axpẽn to hã wa omu ně tokyx akupỹm axpẽn tã wa kãm akapěr kê wa tokyx akupỹm tãm axpẽn nhĩpêx. ã mẽ kot axpẽn nhĩpêx anhỹr o paja na kêt mex.

⁴ No na ka xep htem arĩ Kris kôt mẽ akwỳ hkêt xwỳnhjê hwỳr axpẽn to mra ně mẽ kãm amnhĩ jarě. Kwa mẽ ri ã amnhĩ nhĩpêx anhỹr kêt ně.

⁵ Mě tokyx tee ri ja hã amnhĩ pumu ně amnhĩ kamã apijaàm kêt wehe. Xà mẽ akamã Kris kôt mẽ atõjê hõ pixire ně kot tãm akupỹm mẽ axunhwỳr kaxyw amrakati kumrẽx?

⁶ Na ka xep htem mẽmoj tã axpu. Kris kôt mẽ atõjê hõ mẽ mẽmoj tã axpu ně ra mẽ kệp Kris kwỳ hkêt xwỳnhjê hwỳr amnhĩ to mra. Kot tãm akupỹm

mě unhwỳr xwỳnhjê hwỳr amnhĩ to mra.

⁷ Mě apijapu ho apa jakamã na ka mẽ amnhĩ tomnuj tỳx nẽ. Hãmri nẽ te mẽ apê Kris kwỳ hkêt xwỳnh pyrã nẽ mẽ hwỳr amnhĩ to mra. Kwa kwãr Kris kôt anhĩõ mãmrĩ apê ahkĩ rỳ tanhmã anhĩpêx to. Ka mẽ ãm amnhĩ tã omu kê tapxipix tanhmã amnhĩ tomnuj to.

⁸ Ja mex tã mẽ ate ã amnhĩ nhĩpêx anhỹr kêt. Na ka htem axpẽn pê ahkĩ. Mě ate Kris kôt axpẽn to atõ nẽ atõx tã axtem nẽ ã axpẽn nhĩpêx anẽ. Te mẽ apijaãm kêt pyrãk o amnhĩ nhĩpêx o ri apa.

⁹⁻¹⁰ Mě kot tanhmã amnhĩ tomnuj to xwỳnhjaja koja mẽ nhỹrmã ma Tĩrtũm nhõ krĩ mex wỳr àpir kêt nẽ. Ra mẽ ate ja jarẽnh mar tỳx.

Měmyjê hõ kot nhãm mēnijê hõ ho amnhĩ kati xwỳnhjaja.

Nẽ mēnijê hõ kot nhãm mẽmyjê hõ ho amnhĩ kati xwỳnhjaja.

Nẽ mēnijaja axtem nẽ mẽ kot amnhĩõ ho mjên o ri mẽ pa xwỳnhjaja.

Nẽ mẽmyjaja haxwỳja axtem nẽ amnhĩõ ho hprõ ho ri mẽ pa xwỳnhjaja.

Nẽ mẽ àhkĩnh o ri mẽ pa xwỳnhjaja.

Nẽ mẽ kãm nhãm mẽ hkukrêx kĩnh o kãm ho õ hprãm o ri mẽ pa xwỳnhjaja.

Nẽ ri mẽ pipãnh o mẽ pa xwỳnhjaja.

Nẽ ri axpẽn to kapěr punuj o mẽ pa xwỳnhjaja.

Nẽ mẽ kot amnhĩ to sãnti hwỳr o mẽ pa xwỳnhjaja.

Ã mẽ kot amnhĩ nhĩpêx anhỹr xwỳnh piitã koja mẽ Tĩrtũm nhõ krĩ hwỳr àpir kêt nẽ.

¹¹ Kormã mẽ ate Kris kôt amnhĩ xunhwỳr kêt

ri na ka pre mẽ akwỳjaja ã amnhĩ nhĩpêx anhỹr o ri apa. Tã amnhĩ kaxyw Jejus kôt ajamaxpêr nê hkôt amnhĩ xunhwỳ. Hãmri nhũm Tĩrtũm Karõ mẽ Pahĩti Jejus Krisja wa mẽ anê mẽ ate amnhĩ tomnuj piitã rênh pa nê mẽ apê Tĩrtũm kra hã mẽ axunhwỳ nê amnhĩm mẽ ate amnhĩ to mex xwỳnh ã mẽ ajarẽ.

Mẽ pahte tãm amnhĩ nhĩpêx o papa hã mẽ pamã karõ

Matêwre 5.27; Rõmãn 12.1-2; Epes 5.3; Korosê 3.5; Wam Tesarõn 4.1-8

¹² Nê na ka hte mẽ akwỳjaja amnhĩ jarênh o:

—Nà na pa hte pa inhmã tanhmã amnhĩ nhĩpêx to hprãm xà hkôt amnhĩ krã hkôt amnhĩ nhĩpêx o ri ixpa. Anê.

Mẽ ate ã amnhĩ jarênh anhỹr tã no ãm mẽ ate amnhĩ jarênhja mex kêt. Mẽmoj piitã mẽ pamã mex kêt. Na pu htem pamã hprãm xà hkôt mẽmoj to anê nê gaa nê ra ho amnhĩ pyrà nê ho anhỹr pix o papa. Nê gaa nê kãm panhũrer kêt kumrêx. Jao ra pahpipãnh pix o ri papa. Rỳ paxêx pix o ri papa. Rỳ paxàhkĩnh pix o ri papa. Jakamã kêr pu mẽ pamã tanhmã amnhĩ nhĩpêx to hprãm xà hkôt tanhmã amnhĩ nhĩpêx to ho papa hkêt nê. ãm amnhĩ mẽ amnhĩ kaxyw Jejus mã pajamaxpêr pix nê.

¹³ Nê na htem amnhĩ jarênh o:

—Nà kot paj inhmã prãm nê mãmrĩ mẽmoj ku. Nê inhmã nhãm mēhõ kamã ixpijaàm kêt prãm nê mãmrĩ ã amnhĩ nhĩpêx anê. Ja tanhmã inhmã kute hkêt. Anê.

Tã koja nhỹrmã Tĩrtũm mẽ panhĩja o hapêx pa. Na pre mẽ pahte nhãm mẽ kamã pahpijaàm kêt

o papa kaxyw mẽ panhĩpêx kêt nê. ãm mẽ pahte mẽ panhĩpêx xwỳnh maatiya mã tanhmã amnhĩ nhĩpêx mex to ho papa pix kaxyw na pre mẽ panhĩpêx.

¹⁴ Nê na pre Pahihtija ty nhũm Tĩrtũm akupỹm ho htĩr. Ja pyrã nê kot puj mẽ nhỹrmã mẽ pajaxwỳja ty nhũm akupỹm mẽ pahto mẽ pahtĩr. Ja kaxyw tapxipix pix na àhpumunh tỳx o àhpumunh tỳx.

¹⁵ Na pu htem Kris kôt amnhĩ xunhwỳr kôt pahpê hkwỳ nê te pahpê ĩ pyrãk. Jakamã kwa mẽ ja hã anohtỳx nê axte nhãm mẽ hkuprỳjê hwỳr amrar nê mẽ ho amnhĩkati hkêt nê. Tĩrtũm kêp ja omnuj. Te mẽ pahte Kris nhĩ pyrãk jakamã kot kaj mẽ ã amnhĩ nhĩpêx anhỹr jao te Kris tãm kot ã amnhĩ nhĩpêx anhỹr o pa pyrãk. Kwa ja mex kêt. Xà kot we Krisja ã amnhĩ nhĩpêx anê? Nà koja ã amnhĩ nhĩpêx anhỹr kêt nê.

¹⁶ Tĩrtũm kapêr ã kagà htũm kot ja jarênh kot:

Kot ka mẽ atõ mênijê hõ ho aprõ nhũm kêp aprõ kumrêx. Hãmri nê te ra war atipxi pyrãk o axpên nhĩpêx. Anê.

ã kot aprõ mẽ wa ajarênh anhỹr jakamã kwa kêr ka mẽ atỳx ri nhãm mẽ hkuprỳjê hwỳr apa hkêt nê. Kot kaj mẽ ã amnhĩ nhĩpêx anê nê Tĩrtũm noo mã te ate aprõ kuhpa hã hkuprỳta o aprõ pyrãk. Te wam aprõta kuhpa hã war atipxi pyrãk.

¹⁷ Na pu htem Pahihti Jejus Kris kôt amnhĩ xunhwỳ nhũm amnhĩ tã mẽ pahpumu nê mẽ pamã Karõ gõ nhũm mẽ pamã agjê. Pu mẽ ra Karõja kôt te ra Jejus mẽ wa pahtipxi nê ri papa pyrãk o axpên nhĩpêx. Jao Kris jamaxpêr mẽ mẽ pajamaxpêrja te

wa kot axpën pyræk. Nê Kris kot amnhî nhîpêx mẽ mẽ pahte amnhî nhîpêxja te kot axpën pyræk.

¹⁸ Jakamã kwa kêr ka mẽ amnhî prô pix tânopxar o ri apa. Nê mẽ anijaja amjên pix tânopxar o ri apa. No mẽ nhãm mẽmyjê ho amnhîkati ho ri apa hkêt nê. Nê mẽ amyjaja nhãm mẽnijê ho amnhîkati ho ri apa hkêt nê. Kot ka mẽ nhãm mẽmoj tanhmã omnuj kute ho anê no âm amnhî nhî homnu hkêt nê. Nom kot kaj mẽ nhãm mẽnijê ho amnhîkati rÿ nhãm mẽmyjê ho amnhîkati hãmri nê ra amnhî nhî homnu hpa.

¹⁹ Mẽ panhî kamã na hte Tirtũm Karõ agjê nê kamã hkrî. Tirtũm na pre mẽ pahwÿr kurê nhũm mẽ pahkarõ mã agjê pu mẽ te mẽ pahpê òrkwÿ pyræk. Jakamã na pu htem amnhî krã hkôt pahtÿx ri mẽmoj tanhmã ho ho papa hkêt nê. Âm Tirtũm jamaxpêr xà hkôt pix mã na pu htem tanhmã mẽmoj nhîpêx to ho papa.

²⁰ Na pre ra Jejus mẽ pahte amnhî tomnuj pãnhã amnhîrer kaxyw mẽ pahpiitã mẽ panê ty. Te htyk o amnhîm mẽ pajaprôr pyræk o mẽ panhîpêx. Jakamã kwa kêr pu mẽ âm hkôt pix mã mãn ri amnhî nhîpêx rãhã ho ri papa. Kê mẽ pahkwÿjaja ja hã mẽ pahpumunh kôt Tirtũm mã mex o mex ã harênh o ri pa.

7

Mẽ mjên mẽ mẽ hprô wa kot axpën to mex ã mẽ pamã karõ

Epes 5.22; Korosê 3.18; Eprêw 13.4

¹ Nê ota mẽ ate ixwÿr kagà nê mẽnhta na pre ixwÿr pøj pa omu. Nê kamã mẽ ate mẽ aprõ hã

ixkukjêr xwÿnhta pa kamã harê nê omu. Tã kot paj mē amã tanhmã harênh to ka mē inhma.

Nà kot ka mē amyjê hõ amã aprõ hkêt nê ahte ri apa hprãm nê kam nê aprõ hkêt apa. Ja tanhmã kute hkêt. Nom kêr ka mē hkuprÿjê ho presija ho ri apa hkêt nê.

² Na htem tõhã kãm hprõ hprãm kêt nê ri pa nê gaa nê mē hkuprÿjê hõ pumu rÿ mē kêp mē hprõjê hõ pumu nê kamã hpijaàm kêt o ri pa. Ja pymaj kêr ka mē amyjaja mãmri aprõ nê mē anijaja mãmri amjên.

³ Nê mē anijaja. Koja mē amjên akamã hkurê ka mē mãmri kãm amnhĩ gõ kê mē anĩ. Nê mē amyjaja mãânên. Koja mē aprõ mē akamã hkurê ka mē mãmri mē anĩ.

⁴ Æm ka amã tanhmã amnhĩ nhĩpêx to hprãm xà hkôt pix mã amnhĩ nhĩpêx kêt nê. Mãânên amã aprõ kot kãm tanhmã amnhĩ nhĩpêx to hprãm xà hkôt mãânên hkôt kãm amnhĩ nhĩpêx.

⁵ Nê kot kaj mē mēmo arĩgro hã amã Tirtũm mã amnhĩ jarênh ryy hprãm japêr. Hãmri nê aprõ mã:

—E kot puj jarãhã axpên to amnhĩkati hkêt nê. Kot puj ãm Tirtũm pix mã amnhĩ jarênh o amÿkry. Anê.

Hãmri nê mãmri ã amnhĩ nhĩpêx anê. No kwa kêr ka mē ãm ja ho anhÿr o apkati pixi nê kãm anhÿre. Nhũm jãã ka mē amã axpên to amnhĩkati hprãm nê mãmri tanhmã axpên nhĩpêx to. No kot kaj mē ã amnhĩ nhĩpêx anhÿr kêt o hã atã apkati xohtô nê gaa nê ra akurê xaj axtem nê Satanasti jamaxpêr o ajamaxpêr. Jao nhãm mēhõ ni hwÿr mra nê aprõ kuhpa hã kamã akurê ho kamã apijaàm kêt. Rÿ nhũm mēnijaja nhãm mēmyjê hõ hwÿr mra nê

mjên kuhpa hã kamã hkurẽ ho war axpẽn kamã hpijaàm kêt.

⁶ E mẽ ate ja hã ixkukjêr jakamã na pa ã ixprĩ hã mẽ amã ja jarẽnh anẽ. Ka mẽ akwỳjaja amã aprõ hprãm nẽ mãmrĩ aprõ nẽ ri apa. Nẽ mẽ akwỳjaja amã aprõ hprãm kêt nẽ mãmrĩ aprõ hkêt nẽ ri apa. Nom kot pa paa mẽ amã mẽ aprõ hã ixàmnênh kêt nẽ. Ka mẽ kam amnhĩ krã hkõt ajamexpêr xà hkõt tanhmã amnhĩ nhĩpêx to.

⁷ Na pa hte ixprõ hkêt nẽ ri ixpa nom inhmã ja mex pa hte ahte ixpa.

Mẽ mjên kêt nẽ mẽ hprõ kêt xwỳnhjê jarẽnh

Nẽ kormã mẽ aprõ hkêt xwỳnhjaja. Ka mẽ ixpyrà nẽ aprõ hkêt nẽ ri apa ronhỹx inhmã ja mex nẽ. Na hte mẽmy hkwỳjaja hprõ kêt nẽ ri pa nhũm Tĩrtũm ja hã mẽ omu nẽ tanhmã mẽ ho nhũm mẽ mex nẽ ri pa nẽ mẽnijê kamã hkurẽ ho mẽ kamã hpijaàm kêt o ri pa hkêt nẽ. No na hte mẽ hkwỳjaja hprõ hkêt nẽ ri pa nẽ gaa nẽ ra hkurẽ xàj mẽnijê kamã hpijaàm kêt. ã mẽ ate amnhĩ nhĩpêx anhỹr pymaj kêr ka mẽ amã aprõ hprãm nẽ mãmrĩ aprõ. Tĩrtũm mã ja mex kênã.

⁸ E mẽ aprõ hkêt nẽ mẽ amjên kêt xwỳnhjaja. Nẽ ra mẽ apê mẽ aprõ htyk rỳ mẽ amjên htyk xwỳnhjaja. Pa mẽ amã mẽmoj jarẽ. Nà kot kaj mẽ ixpyrà nẽ mẽ aprõ hkêt nẽ ri apa rỳ mẽ amjên kêt nẽ ri apa nhũm ja inhmã mex nẽ.

⁹ No kot ka mẽ atõ ra akurẽ japêr nẽ mãmrĩ aprõ rỳ mãmrĩ amjên. Ja mããnên tanhmã kute hkêt.

*Mẽ pahte axpẽn kaga hkêt ã mẽ pamã karõ
Matêwre 5.31, 19.3-9; Makre 10.2*

10 E kot paj hpãnhã ra mẽ ate axpën to amjên nẽ axpën to aprõ xwýnhjê mã ixkapër. Nom kot paj amnhĩ krã hkõt tanhmã ixkapër to hkêt nẽ. Pahihti Jejus Kris kapër xà hkõt kot paj mẽ amã ixkapër. Jakamã e kêr ka mẽ anijaja mẽ amjên kaga hkêt nẽ.

11 Nom kot kaj mẽ tanhmã ajamaxpër to nẽ hkaga japêr hãmri nẽ ahte ri apa nẽ axte nhãm mẽhõ ho amjên kêt nẽ. Rý tee ri amnhĩ kukamã ajamaxpër nẽ mãmrĩ akupým amjênta wýr tẽ nẽ akupým hkõt ri apa. No kêr ka mẽ axte nhãm mẽhõ ho amjên kêt nẽ.

Nẽ ra mẽ amyjaja kêr ka mẽ ajaxwýja ã amnhĩ nhĩpêx anẽ nẽ mẽ aprõ kaga hkêt nẽ. E kêr ka mẽ ã amnhĩ nhĩpêx anhýr o ri apa.

12 Nẽ mẽ ate ixwýr kagà mẽnĥ kamã axpën tã ixkukjêrta kot paj hpãnhã mẽ amã harẽ. Na Pahihti Jejusja ja hã tanhmã inhmã nẽ hkêt nẽ. Âm amnhĩ krã hkõt kot paj mẽ amã tanhmã harẽnh to ka mẽ inhma.

Ka mẽ amyjê hõ ra Kris kõt amnhĩ xãm nom nhũm aprõ kormã hkõt amnhĩ xãm kêt japêr. Nom koja kãm arĩ ri akõt pa hprãm ka hkaga hkêt nẽ. Kê arĩ ri akõt pa.

13 Nẽ mẽ anijaja. Ka mẽ ajaxwýja ra apê Kris kwý hã ri apa nhũm amjên kêp hkwy hkêt tã arĩ ri akõt pa hprãm nẽ arĩ ri akõt pa ka hkaga hkêt nẽ.

14 Kêp Kris kwý hkêt tã koja akõt Kris kwýjê hkõt ri pa. Rý mẽ aprõ kêp Kris kwý hkêt tã koja akõt Kris kwýjê hkõt ri pa. Jao Tĩrtũm kapêr mar o pa nẽ gaa nẽ apyrà nẽ hkõt amnhĩ xãm japêr. Nẽ mẽ akra kêp Kris kwý hkêt xwýnhjaja haxwýja mẽ akõt

Kris kwỳjê hkôt ri pa nê Tĩrtũm kapêr mar o pa nê gaa nê akôt Jejus kôt amnhĩ xunhwỳr japêr.

¹⁵ Nom koja aprõ kêp Kris kwỳ hkêt ã kãm akaga hprãm nê rĩ tãm mãmrĩ akaga. Rỳ amjên kêp Kris kwỳ hkêt ã kãm akaga hprãm nê rĩ tãm mãmrĩ akaga. Kêr ka mẽ kot akaga nê tee ri kãm tanhmã akapêr to hkêt nê. Kwâr mãmrĩ akaga ka ahte ajamakêtkati nê axàmnhĩx ri apa. Mẽ pajamakêtkati nê mẽ pamex nê ri papaja na Tĩrtũm kãm hprãm.

¹⁶ No koja amjên kêp Kris kwỳ hkêt tã kãm mẽ akaga hprãm kêt nê ka mẽ hkaga hkêt nê. Rỳ aprõ kêp Kris kwỳ hkêt tã ka mẽ kam hkaga hkêt nê. Koja arĩ ate amnhĩ nhĩpêx ã apumunh o ri akôt pa nê gaa nê rĩ apyrà nê Kris kôt amnhĩ xãm japêr.

¹⁷ Jakamã kot ka mẽ aprõ rỳ amjên ra Kris kôt ahte amnhĩ xãm. Hãmri nê wa arĩ ri axpên kôt ri apa ho apa. Na pa hte krĩ piitã hkôt Jejus kôt mẽ pahkwỳjê mã ã ixujarênh anhỳr o ri ixpa. Tã kêr ka mẽ ã amnhĩ nhĩpêx anhỳr o ri apa.

Kris kôt amnhĩ xunhwỳr kêt ri tanhmã mẽ pakute hã mẽ pajarênh

¹⁸ Ja pyrà nê kot kaj mẽ ra amy kwryt kà jakàr japêr. Tã ra Kris kôt amnhĩ xãm nê arĩ arãhã ri apa. Rỳ amnhĩ jakàr kêt rãhã hkôt amnhĩ xãm japêr nê arĩ arãhã ri apa. Mo kaxyw kot ka kêt amnhĩ jakà?

¹⁹ Tĩrtũm na hte mẽ pahte amnhĩ my kwryt kà jakàr ã mẽ pahpumunh kôt tanhmã mẽ pajarênh to hkêt nê. Rỳ mẽ pahte amnhĩ jakàr kêt ã mẽ pahpumunh kôt mããnên tanhmã mẽ pajarênh to hkêt nê. ãm mẽ pahte hkôt amnhĩ nhĩpêx pix ã mẽ pahpumunh kôt na hte tanhmã mẽ pajarênh to.

20 Jakamã kêr pu mẽ pahte Kris kôt amnhĩ xunhwỳr kêt ri tanhmã mẽ pakuteja arĩ rãhã ri papa.

21 Ka mẽ akwỳjaja ate nhãm mẽ kãm mẽ axàpênh o apa htã Jejus kôt amnhĩ xunhwỳ. Tã kêr ka mẽ mãmri mẽ kãm axàpênh o ri apa. Nom koja anhõ patrãwja amnhĩ nê mẽ ajano ka mẽ mãmri ma mra nẽ amnhĩ mã tanhmã axàpênh to ho ri apa.

22 Nẽ koja mẽhõ Kris kôt amnhĩ xãm. Tanhmãn kêp mẽ õ patrãw rỳ kot mẽ kãm mẽ àpênh xwỳnhjê hõ. Tã Kris kôt amnhĩ xãm hãmri nẽ arĩ amnhĩ nhĩpêx tũm kôt ri amnhĩ nhĩpêx o pa hkêt nẽ. Ra Kris kôt amnhĩ nhĩpêx nyw o amnhĩ nhĩpêx o pa. Jao ra tanhmã amnhĩ tomnuj to hkêt nẽ. Te kot õ patrãw punuj kaga nẽ hpãnhã õ patrãw mex kapêr kôt amnhĩ nhĩpêx pix o pa pyræk.

23 Na pre Jejus mẽ pahte amnhĩ tomnuj piitã hpãnhã amnhĩrer kaxyw mẽ panê ty. Te htyk o kot amnhĩm mẽ pajaprôr pyræk o mẽ panhĩpêx. Jakamã kwa kêr ka mẽ jar mẽ anhõ patrãw kôt pix mã amnhĩ nhĩpêx o ri apa hkêt nẽ. Mẽ mãânẽn Tĩrtũm kapêr kôt amnhĩ nhĩpêx o ri apa.

24 Jakamã kêr pu mẽ pahte Kris kôt amnhĩ xunhwỳr kêt ri tanhmã mẽ pakuteta pu mẽ arĩ rãhã ri hã papa.

Ra mẽ pahte amnhĩ jakà rỳ mẽ pahte amnhĩ jakàr kêt.

Rỳ ra mẽ pahte nhãm mẽhõ mã paxàpênh o papa rỳ amnhĩ mã paxàpênh o papa.

Rỳ ra mẽ pahprõ nẽ ri papa rỳ mẽ pahprõ hkêt nẽ ri papa.

Pu mẽ pahte Kris kôt amnhĩ xunhwỳr kêt ri tanhmã mẽ pakuteta ãm arĩ rãhã hã ri papa. Jao

Tĩrtũm kãm hprãm xà kôt pix mã amnhĩ nhĩpêx o ri papa.

Mẽ hprõ nẽ mẽ mjên kêt xwỳnhjê jarēnh

Matêwre 19.10-12

²⁵ Nẽ mẽ ate ixwỳr kagà mēnh̄ta kamã na ka mẽ mãănēn kormã mẽ hprõ hkêt xwỳnhjê hã ixkukja. Tã kot paj mẽ amã tanhmã mẽ harēnh to. Nom Pahihti Jejus Kris na pre ja hã tanhmã inhmã nẽ hkêt nẽ. Ām pa kot paj am amnhĩ krã hkôt tanhmã hã mẽ amã ixkapēr to. Na pre Pahihti mẽ akaxyw tanhmã ixkrã hto pa hte ỹ hã tanhmã mẽ amã mẽmoj tã karõ hto ho ri ixpa. Jakamã e mẽ inhma nẽ inhmar tỳx nẽ.

²⁶⁻²⁷ Nà ra mẽ kãm mẽ pahkurê xwỳnhjaja Kris ã mẽ pahtomnuj o pa jakamã koja ixpyrà nẽ mẽ hprõ hkêt rãhã mẽ pa xwỳnhjaja ahte ri pa nhũm ja mex nẽ. Nhũm mẽ umaj amnhĩ pix tãnopxar o ri pa. Nẽ mẽ aprõ xwỳnhjaja kêt ka mẽ kãm mẽ pahkurê xwỳnhjê pymaj mẽ aprõ kaga hkêt nẽ. Ām pix tãnopxar o ri apa.

²⁸ Tã kot ka mẽ atõ amã aprõ hprãm nẽ mãmrĩ aprõ. Ja mãănēn tanhmã ixpê kute hkêt. Nẽ mẽ anijaja mẽ amã amjên prãm nẽ mãmrĩ amjên. Ja tanhmã ixpê kute hkêt. Nom kot ka mẽ akwỳjê pyrà nẽ aprõ rỳ amjên. Nẽ gaa nẽ akra. Hãmri nẽ tanhmã mẽmoj kute kamã ka tee ri wa mẽ amnhĩ kukamã ri ajamaxpēr o ri apa. Ja pymaj na pa hte mẽ amjên kêt nẽ mẽ aprõ hkêt ã mẽ amã awjarē.

²⁹ Nẽ Kris tokyx akupỹn mẽ pahwỳr wrỳk kaxyw jakamã kwa ra mẽ aprõ nẽ apa xwỳnhjaja. Kêt ka mẽ amnhĩ prõ nẽ amnhĩ kra pix kukamã ajamaxpēr o ri apa hkêt nẽ. Te ho mẽ hprõ hkêt nẽ mẽ

pa xwÿnhjaja kot amnhĩ nhĩpêx pyrà nê Kris kutêp kumrêx mã ajamaxpêr pê tanhmã amnhĩ nhĩpêx to ho apa nê arĩ kormã aprô nê akrajê ho hapu nê tanhmã mẽ kutã anojarêt to ho apa.

³⁰ Kris kot tokyx akupÿn mẽ pahwÿr wrÿk jakamã kwa mẽ ri amÿr o ri mẽ apa xwÿnhjaja. Kêr ka mẽ kutêp tee ri amnhĩ kaprĩ pix mã ajamaxpêr o akaprĩ nê ri apa hkêt nê. Nê mẽ akĩnh nê ri apikunhar o ri mẽ apa xwÿnhjaja kêr ka mẽ Kris kutêp amnhĩ kĩnh xà pix mã ajamaxpêr o ri apa hkêt nê. Nê ri mẽ axujaprôr o ri mẽ apa xwÿnhjaja kêr ka mẽ Kris kutêp tanhmã axujaprôr to pix kukamã ri ajamaxpêr kêt nê.

³¹ Nê mẽ apê mẽ ate mẽmoj to wênê ho ri mẽ apa xwÿnhjaja Kris kutêp ãm ri mẽ akukrêx pix kukamã ajamaxpêr kêt nê. Kojã mẽ panhõ pika piitã hkôt mẽ pakukrêxja nê mẽmoj piitã arĩ rãhã hkêt nê.

³² Jakamã kot kaj mẽ akukrêx pix kukamã ajamaxpêr nê amnhĩ pix kukamã ajamaxpêr nhũm ja apê omnuj nê. Kris kwÿpê mẽ hprô hkêt xwÿnhjaja na htem Pahihti Jejus Kris kãm hprãm xà hkôt pix mã kãm tanhmã amnhĩ nhĩpêx to ho ri pa hprãm. Jao ãm pix kutã tanhmã nojarêt to rãhã ho ri pa.

³³ No kêt ra mẽ hprô nê mẽ pa xwÿnhjaja na htem hprô pix kukamã kãm tanhmã amnhĩ nhĩpêx to ho pa hprãm. Jao pix kukamã amnhĩ nhĩpêx o pa.

³⁴ Mẽ kãm Tirtũm kapêr kôt amnhĩ nhĩpêx prãm tã no ãm mãânên kãm hprô kapêr mar nê hkôt kãm tanhmã amnhĩ nhĩpêx to ho ri pa hprãm.

Nê mênijaja kot Jejus kôt amnhĩ nhĩpêx nê kormã mẽ mjên kêt xwÿnhjaja na htem kãm Pahihti Jejus kãm hprãm xà hkôt pix mã kãm tanhmã amnhĩ

nhĩpêx to ho pa hprãm. Nê ãm pix mã hamaxpêr o pa. Nê ãm hkôt pix mã amnhĩ nhĩpêx o pa. No ra mẽ mjên nê mẽ pa xwỳnhjaja na htem arĩ ri mẽ hikukrêx tânopxar o pa. Nê mjên mã hprãm xà hkôt tanhmã kãm amnhĩ nhĩpêx to ho pa. Jakamã tanhmã kot wem amnhĩ to nê Jejus kãm prãm xà hkôt pix mã amnhĩ nhĩpêx o pa?

³⁵ E ixte mẽ ato ajuta kaxyw na pa ã mẽ amã ixkapêr anê. Jakamã na pa mẽ ate mēhō ho aprō nê mẽ akurê hkêt nê. ãm mẽ ate Tirtũm kapêr kôt pix mã amnhĩ nhĩpêx o apa hã na pa mẽ amã karō. Mẽ ate kumã pix mã ajamaxpêr o ri apa pix kaxyw. Nê kumã pix mã tanhmã ri amnhĩ nhĩpêx to ho apa kaxyw na pa mẽ amã tanhmã mẽmoj tã karō hto.

Mẽ kot mẽ hprō mã xwỳnhjê jarēnh

³⁶ E kot paj hpãnhã mẽ ate mēhō ho aprō mã xwỳnhjê mã ixkapêr ka mẽ ixkapêr ma. Nà kot kaj mẽ atō ate ho aprō mã xwỳnhhta kukamã ajamaxpêr o:

—Nà kot paj ho ixprō hkêt nê. Inhmã hkĩnh tỳx tã kot paj ho ixprō hkêt nê. Kot paj ãm ixprō hkêt nê ahte ri ixpa. Anê.

Hãmri nê ahte ri apa. Tã ra tee amnhĩ kurẽ kamã ama nê ajamaxpêr o:

—Hêxta waa nê. Mon pa pre ho ixprō hkêt nê ahte ri ixpa? Anê.

Hãmri nê mãmri ma hwỳr tē nê kãm amnhĩ jarē nê ho aprō. Ra ate aprō hkêt nê ahte ri apa hã amnhĩ jarēnh tã no ãm mãmri ho aprō. Ja tanhmã kute hkêt kēnã.

³⁷ Nom kot kaj ho aprō hkêt ã amnhĩ jarē nê mãănēn akurẽ hkêt nê ri apa. Hãmri nê mãmri ho

aprõ hkêt nẽ ri ahte ri apa. Ja mãånẽn tanhmã kute hkêt.

³⁸ Kot ka ho aprõ nẽ war amex nẽ apa. Rỳ kot ka ho aprõ kêt nẽ mãånẽn amex kumrẽx nẽ ri apa. Ja na mex o ate mẽhõ ho aprõ nẽ ho apata jakrenh.

Mẽ kệp mẽ mjên tyk xwỳnhjê jarẽnh

³⁹ E kot paj hpãnhã mẽ apê mẽ amjên tyk xwỳnhjê mã ixkapêr. Nà koja amjên arĩ htĩr ri ka ãm hkôt pix mã axkamẽ nẽ hkaga hkêt nẽ. No koja nhỹrmã apê ty hãmri ka tee ri amnhĩ kukamã ajamaxpêr hãmri nẽ amã axte amjên prãm nẽ mãmrĩ axte amjên. Nom kwa kêr ka mẽ amnhĩ pyrà nẽ Kris kôt akwỳjê hõ pix o amjên. No mamrĩ nhãm mẽhõ ho amjên kêt nẽ.

⁴⁰ No kot ka mẽ axte amjên kêt nẽ ahte ri apa hãmri nẽ axàmnhĩx ri ajamakêtkati nẽ apa. No na pa ãm amnhĩ krã hkôt mẽ amã ã ja jarẽnh anẽ. Mãn Tĩrtũm Karõ mã mãånẽn ja mex nẽ.

8

Sãnti hã mẽ apkur xà jarẽnh

Rõmãn 14.13-23; Wam Korīt 10.14-22, 13.2; Karatas 5.13; Wam Pêtre 4.8; Wam Juãw 3.18

¹ Nẽ mẽ ate ixwỳr kagà mẽnhta kamã na ka prem mãånẽn sãnti hã mẽ apkur xà hã ixkukja. Tã kot paj mẽ amã tanhmã ja jarẽnh to ka mẽ inhma.

Nà na hte Kris kôt pahkwỳ hkêt xwỳnhjaja mẽmo karõ ho sãnti nhĩpêx mã mẽõ hkwỳ nhĩpêx nẽ hwỳr o mra. Hãmri nẽ hpar pê haxwỳ nẽ kutã hkõn krã ho rôrôk nẽ hkrĩ nẽ kãm mex o mex ã harẽ nẽ kãm amnhĩ jagrer pê amnhĩ to kuwỳ. Hãmri nẽ kãm amnhĩ jagrer pa nẽ akupỹm amnhĩm mẽõta

jam̀ỳ nê ma o mra nê hkẁỳjê mã ho wênê. Na htem ã amnhĩ nhĩpêx anhÿr o pa. Tã na ka prem kagàta kamã mẽ ate mẽ kêp mẽõ japrôr nê hkur ã ixkukja. Nà ra mẽ ate sãnti pumunh mex. Æm mẽ kot ìhkra pix o hipêx ã omunh mex jakamã na pu htem hã pamã mẽ apkur xàta hkur prãm nê mãmrĩ paxàmnhĩx ri kuku. Ja tanhmã Tĩrtũm pê kute hkêt. Ra mẽ pahte ja pumunh mex. Tã nom kwa kêr pu mẽ ja hã Kris kôt mẽ pahkẁỳjê mã amnhĩ to jarkrar o ri papa hkêt nê. Nê ja hã mẽ kurom paxàhpumunh tÿx ã mẽ kãm amnhĩ to jarkrar hkêt nê. Kot pu mẽ ã amnhĩ nhĩpêx anhÿr o mẽ hamaxpêr o hihtÿx hkêt nê. Kêr pu mẽ ãm mẽ kamã paxukapĩrĩ pê tanhmã mẽ ho mex to ho papa. Nê Kris kôt mẽ hamaxpêr o hihtÿx o papa. Æ mẽ pa hte amnhĩ nhĩpêxja na Tĩrtũm kãm hprãm.

² No koja mēhō mēmoj pumunh tÿx ã amnhĩ to jarkrar o ri pa nê ãm tee ri ã amnhĩ jarēnh anhÿr kaprÿ.

³ No koja mēhō àhpumunh tÿx kêt tã kãm Tĩrtũm kĩnh nhũm amnhĩ tã omu nê kãm hapê nê ho hkra. Kêt ja na mex o mex.

⁴ E kot paj ixprĩ hã mẽ amã tanhmã sãnti hã mẽ apkur xàta jarēnh to ka mẽ inhma. Nà Mēpahpãmja pixii. Axtem hō hkêt. Nom mẽ kot sãnti nhĩpêxta ãm mẽ kot ìhkra o hipêx jakamã htĩr kêt. Ra mẽ pahte ja jarēnh mar tÿx nê omunh mex.

⁵ Na htem ohtô nê ri sãnti kêp Mēpahpãm ã hkamnhĩx o pa. Kaxkwa kamã mẽmo karō nhĩpêxja nê pika kamã mẽmo karō nhĩpêxja nhũm htem kêp Mēpahpãm ã harēnh ho pa. Nom ja kot anhÿr kêt.

⁶ Měpahpāmja ãm pixi ho pixi mex. Mě panhõ Tĩrtũmja. Tãm na pre mẽmoj piitã ho kator pa. Jakamã na pu htem kapěr kõt pix mã amnhĩ nhĩpêx o ri papa.

Ně mẽ panhõ Pahihti haxwỳja pixii. Pahihti Jejus Krisja. Na pre Tĩrtũm nhĩhkõ hã mẽmoj piitã ho kator pa. Na pu htem ja hã omunh xà hkõt ri pamex nẽ ri papa. Ra mẽ pahte ja jarẽnh mar tỳx nẽ omunh mex. Jakamã na pu htem paxãmnhĩx ri mẽmoj piitã hkur o papa. Tĩrtũm kot mẽmoj piitã ho kator par kẽnã.

⁷ Tã no ãm ham mẽ kot Kris kõt amnhĩ xunhwỳr xwỳnhjaja na htem mẽ pahkĩnhã kãm sãnti hã mẽ apkur xà hkur puma nẽ. Ham mẽ kot sãnti kaga nẽ amnhĩ kaxyw Kris kõt amnhĩ xunhwỳr jakamã kormã Tĩrtũm kõt amnhĩ nhĩpêx tohtuj anẽ. Jakamã na htem tee ri sãnti hã mẽ apkur xàja pumu nẽ hamaxpěr o:

—Nà kot paj ja kur kêt nẽ. Kot paj anẽ nhũm apu Tĩrtũmja pê ja omnuj nẽ. Anẽ.

⁸ Nom na kêt hte Tĩrtũm mẽ paxàpkur xà hã mẽ pahpumunh kõt mẽ pahte amnhĩ to mex xwỳnh ã mẽ pajarẽnh kêt nẽ. Kot puj mẽ mẽmoj ku rỳ mẽmoj kur kêt nẽ nhũm ja hã mẽ pahpumunh kõt tanhmã mẽ pamex ã pajarẽnh to hkêt nẽ. Jakamã na pu htem mãmri paxãmnhĩx ri mẽmoj tã mẽ apkur xà hkur o papa nẽ tanhmã amnhĩ to hkêt nẽ.

⁹⁻¹⁰ Nom kwa mẽ okora. Kêr ka mẽ sãnti mã amnhĩ jarẽnh xà hã ixkre hwỳr agjêx nẽ kamã axàpkur hkêt nẽ. Kot kaj mẽ atõ ã amnhĩ nhĩpêx anẽ nhũm mẽhõ kormã kot Kris kõt amnhĩ xãm tohtuj anhyr xwỳnhja ja hã mẽ apumu nẽ tee ri hamaxpěr. Axàhpumunh tỳx ã ate amnhĩ jarẽnh

tã sãnti nhõrkwỹ kamã axàpkur o nhỹ nhũm ja hã apumu nẽ tanhmã amnhĩ nhĩpêx to wehe? Koja ja kêp omnuj tã apyrà nẽ tẽ nẽ axà nẽ mẽ kutã apku. Hãmri nẽ apkur pa nẽ tee ri amnhĩ kukamã hamaxpêr o:

—Hêxta waa nẽ. Kwa mon pa axtem nẽ ri ã mẽmojja kur anẽ? Nà na pa anẽ nẽ ra amnhĩ tomnuj tỳx nẽ. Anẽ.

Hãmri nẽ hkaprĩ nẽ pa.

¹¹ Ate axàhpumunh tỳx ã amnhĩ jarênh tã amnhĩ kôt atõja mex kukamã ajamaxpêr kêt nẽ. Kris ra mỳrapê htyk tã nhũm ã ate sãnti hã mẽõ hkur ã apumu nẽ tee ri hamaxpêr o Jejus hkôt amnhĩ nhĩpêx mex kêt nẽ.

¹² Kormã kot Kris kôt amnhĩ xãm tỳx kêt tã tee ri ja hã mẽ apumu nẽ hamaxpêr mex kêt nẽ. Jakamã ka Kris noo mã amnhĩ tomnuj nẽ.

¹³ Tã ã ixte Kris kôt ixkwỳjê nhĩpêx anhỹr pymaj koja ixtõjê hõ kãm mẽmoj kur pyma nẽ. Nẽ htỳx ho Tĩrtũm kêp omnuj ã hkamnhĩx. Pa ja hã omu nẽ ijaxwỳja axte hkur kêt nẽ. Ixte mex ã omunh tã no ãm kot tee ri ja hã ixpumunh nẽ hamaxpêr o:

—Kwa Tĩrtũm kêp ja mex kêt tã nhũm Pawreja ri kuku. Jakamã kot paj ijaxwỳja uràk nẽ kuku. Omnuj tãã.

Anhỹr o hamaxpêr pymaj kot paj uràk nẽ mẽmota kur kêt nẽ. Na pa hte ã Kris kôt ixtõjê mex kukamã ri ijamaxpêr anhỹr o ixa.

9

Pawre kot amarĩ Tĩrtũm kapêr o mẽ ahkre hã

*amnhĩ jarẽnh**Atre 9.1-18, 20.33-35; Sikũn Korõt 11.7-9*

¹ Nẽ ixte Jejus nhỹ hã mẽ ahkre ho mẽ pa xwỳnhjê hõ jakamã na pa hte Tĩrtũm kapẽr o mẽ ajahkre ho ri ixpa. Na pa pre inhno ho mẽ panhõ Pahihti Jejus pumu nẽ mẽ amã harẽnh o ri mẽ akõt ixpa ka prem inhma nẽ hkõt amnhĩ xunhwỳ.

² Mẽ hkwỳjaja kot axpẽn mã ixpê Jejus nhỹ hã mẽ ahkre xwỳnh kêt ã ijarẽnh tã mẽ kajaja mẽ ate ja hã ixpumunh mex. Ixte mẽ amã mẽ ujarẽnh mexja jarẽnh nhũm mẽ ate mar nẽ hkõt amnhĩ xunhwỳrja kukwak ri na ka mẽ apê Jejus kwỳy.

³ Jakamã koja mẽ atã ixto kapẽr japêr kot paj ã mẽ kãm mẽ ajarẽnh anẽ.

⁴ Nẽ ixte Jejus nhỹ hã kapẽr jahkre o ixpa xwỳnh jakamã kot paj inhmã Kris kwỳjê kutã amarĩ ixàpkur prãm nẽ mãmrĩ mẽ kutã apku. Ja tanhmã kute hkêt tã kot paj ã amnhĩ nhĩpêx anhỹr kêt nẽ. Kot paj ixàpkur kaxyw nẽ amnhĩ pãnhã amnhĩre nẽ rĩ kormã apku. Na pa hte ã amnhĩ nhĩpêx anhỹr o ri mẽ akõt ixpa.

⁵ Rỳ kot pa ixkwỳjê pyrã nẽ inhmã Kris kõt ixkwỳjê hõ ho ixprõ hprãm nẽ mãmrĩ ho ixprõ. Nẽ wa ma krĩ piitã hkõt Kris kwỳjê kukwak ri ixàpkur o ixpa hprãm nẽ wa mãmrĩ ã amnhĩ nhĩpêx anhỹr o ixpa. Ja mex kẽnã. Na hte ã Simãw Pêtre mẽ Jejus tõ kot hapujaja amnhĩ nhĩpêx anhỹr o pa nhũm ja tanhmã kêp kute hkêt. No ãm mẽ hkĩnhã ixprõ hkêt na pa hte ri ixpa.

⁶ Nẽ ixkwỳjaja na htem apkur xà hpãnhã àpênh o pa hkêt nẽ. Na htem Jejus nhỹ hã kapẽr jarẽnh o ri pa nhũm hte Jejus kwỳjaja mẽ kãm mẽ apkur xà gõ nhũm mẽ amarĩ hkur o pa. Tã no pa na pa hte

Panãpe mẽ wa ã amnhĩ nhĩpêx anhỹr kêt nê. Na pa hte wa mry kà ho ixkre nhĩpêx nê mẽ kãm ho wênê nê hpãnhã amnhĩm awjaprô. Na pa hte wa ã amnhĩ pa kukwak ri ixujaprôr nê ho ixàpkur o ri ixpa anê.

⁷ Mẽ kãm pur kãm harôj jamýnh o mẽ pa xwýnhjaja na htem amarĩ hkwý jamý nê ho apkur o pa. Nê motre jamãr o mẽ pa xwýnhjaja haxwýja amarĩ hkà kagô janê nê ho hkôm o pa. Nê pôristijaja na hte mẽ ô pahija mẽ àpênh pãnhã mẽ kãm amnhĩrer o pa. Jajê piitã na htem mẽ àpênh pãnhã mẽ kãm amnhĩrer o pa. Ja pyrã nê te ixpê mẽ amã ixàpênh o ixpa xwýnh pyrãk jakamã ixte mẽ ajahkreta pãnhã kot ka mẽ inhmã inhõ ho apa nhũm ja mããnên mex nê.

⁸ No ãm papxipix na pa hte ja mex ã harênh kêt nê. Tĩrtũm kapêr ã kagà htũm haxwýja kot ja mex ã harênh.

⁹ Kamã na pre finat Mojesja Tĩrtũm nhỹ hã harênh kot:

Koja akrit amã àpênh o pa ka omu nê ho mex nê.

Kãm ô mex nê.

Anhỹr o kot harênh. Xà na pre Tĩrtũmja ãm mẽ pahkrit pix kukamã ukaprĩ nê ã harênh anê nà? Nà kot anhỹr kêt.

¹⁰ Mããnên mẽ pahpê panhĩ kaxyw na pre ã ja jarênh anê. Mẽ pahte mẽ hpur kãm paxàhkre xwýnhjaja nê mẽ pahte kamã paxujamýnh o papa xwýnhjaja. Jajê kaxyw mẽ pahte pur kukwak ri amarĩ paxàpkur o ri papa kaxyw ã pre ã ja jarênh anê.

¹¹ Tã ja pyrã nê na pa hte mẽ awýr mõi mẽ amã Tĩrtũm kapêr jarênh o ri mẽ akôt ixpa. Nê mẽ akôt

ho mẽ ajahkre ho ri ixpa ka htem inhmã ixàpênhta pãnhã amnhîrer kêt nê. Ixkwýjaja kot Tirtũm kapêr o mẽ ajahkre hpãnhã mẽ ate mẽ kãm amnhîrer tã pa inhmã amnhîrer kêt nê. Na pa pre mẽ ajahkreta pãnhã mẽmoj tã mẽ awýr kêt nê. ãm nhãm ixàpênh õta kukwak ri na pa hte ixàpkur o ri ixpa.

¹² Nê na hte mẽ ixkwýjaja mẽ awýr mra nê Tirtũm kapêr o mẽ ajahkre o ri mẽ akõt pa. Hãmri nê hpãnhã mẽ apkur xà hã mẽ awý ka mẽ kãm mẽmoj gõ. No kêt pa na pa hte mẽ uràk nê ixàpkur xà hã mẽ awýr kêt nê. Kot pa apu hã mẽ awý ka mẽ tanhmã ixto akapêr to nê axpên mã ijarênh o:

—Pêr ãm mẽ pahte kãm amnhîrer pix kaxyw na hte Pawre mẽ pahwýr mra nê mẽ pamã Jejus Kris kot tanhmã mẽ panê amnhĩ nhĩpêx to hã harênh o pa. Pêr ãm apkur xà pix prãm xàj ã kot mẽ pamã ujarênh anhýr o pa. Jakamã kot puj mẽ kuma nê ãm kuma.

Anhýr o axpên mã ijarênh pymaj na pa hte mẽ ajahkre hpãnhã mẽmoj tã mẽ awýr kêt nê. Na pa hte ãm mry kà ho ixkre nhĩpêx nê ho wênê nê ja pix kukwak ri ixàpkur o ri ixpa. Nê amarĩ ri mẽ ajahkre ho ri mẽ akõt ixpa.

¹³ Nê Tirtũm mã amnhĩ jarênh xà hã ixkre kamã mẽ àpênh xwýnhjaja na htem hwýr mẽ mrar xwýnhjaja mẽ àpênh pãnhã mẽ kãm amnhîre. Nê mẽ kot mẽ kãm Tirtũm mã mẽmoj nhõr o kuhê xwýnhjaja na htem mãânên mẽ àpênh pãnhã mẽ kãm amnhîre.

¹⁴ Nê Pahшти Krisja na pre ja hã mẽ pakukamã pahtã karõ kot:

—Kêr ka mẽ kot tanhmã mẽ amã ijarênh to ho ri mẽ pa xwýnhjê mã amnhîrer o ri apa. Anê.

¹⁵ Tã no na pa hte aa mẽmoj tã ixàhwỳr kêt nẽ. Nẽ mẽ ate inhmã amnhĩrer kaxyw pa mẽ amã ja jarẽnh kêt nẽ. Aa ixte mẽmoj tã mẽ awỳr kêt. Kot paj apu anẽ nẽ ixpijaam nẽ. Rỳ kot pa apu anẽ nẽ mẽ akukwak ri ixàpkur o ri ixpa hãmri nhũm mẽ akwỳjaja ja hã ixpumumu nẽ hã ijarẽnh o:

—Tk. Na hte amarĩ mẽ pajahkre o ri pa hkêt nẽ. ãm mẽ apkur xà pix prãm xàj na hte ã mẽ pajahkre ho pa anẽ. Anẽ.

Jakamã na pa hte mẽmoj tã mẽ awỳr kêt nẽ.

¹⁶ Ixte mẽ amã mẽ ujarẽnh mexja jarẽnh o ri ixpa htã na pa hte ja hã amnhĩ to jarkrar o ri ixpa hkêt nẽ. Pahihti Jejus na pre ja hã inhmã karõ pa hte kãm ho anhỳr o ri ixpa. Kot paj kãm ho anhỳr kêt nẽ ixpunuj nẽ ri ixpa.

¹⁷ Kêp ãm amnhĩ krã hkôt mãn tanhmã mẽ amã ixujarẽnh to ho mẽ akôt ri ixpa ronhỳx pa hpãnhã ixàmnhĩx kàxpore hã mẽ awỳ. No ãm ã ixte amnhĩ nhĩpêx anhỳr kêt. Tĩrtũm tãm kot inhmã ja hã karõ jakamã na pa hte amarĩ ixàmnhĩx ri mẽ amã kapêr jarẽnh o mẽ ajahkre ho ri mẽ akôt ixpa nẽ mẽmoj tã ixàhwỳr o ri ixpa hkêt nẽ.

¹⁸ Ixte amarĩ ri mẽ amã mẽ ujarẽnh mexta jarẽnh o ri ixpaja na inhmã hprãm. Ja na inhmã mex. Na pa hte ã amnhĩ nhĩpêx anhỳr o ri ixpa nhũm ja inhmã mex pa ixkĩnh nẽ ri ixpa. Jakamã na pa hte hpãnhã ixàhwỳr kêt nẽ. Nẽ inhmã mẽmoj prãm o ri ixpa hkêt nẽ.

¹⁹ Nẽ nhãm mẽ kãm tanhmã ixàpênh to ho ixpa hkêt tã pa hte mẽ piitã tanhmã mẽ kãm amnhĩ nhĩpêx to ho ri ixpa. Pê mẽ kãm Jejus kapêr jarẽnh o ri ixpa. Jakamã na mẽ ra ohtô nẽ ixujarẽnh ma nẽ

amnhĩ kaxyw Jejus kôt hamaxpēr nē hkôt amnhĩ xunhwỳ.

Pawre kot tām mẽ piitã mẽ hipêx o pa hã amnhĩ jarēnh

Wam Korīt 10.33

²⁰ Nē na pa hte Ijaewjê hwỳr ixpa nē mẽ kot amnhĩ nhĩpêx kôt amnhĩ nhĩpêx o ri mẽ hkôt ixpa. Ixte mẽ kurom Tĩrtũm kot finat Mojes mã mẽmoj tã karõ hkôt amnhĩ nhĩpêx o ixpa hkêt tã mẽ hkôt ri ixpa nē mẽ uràk nē hkôt amnhĩ nhĩpêx o ri ixpa. Mẽ kot ja hã ixpumunh nē ixte mẽ kãm Jejus jarēnh mar nē ixpyrà nē amnhĩ kaxyw hkôt hamaxpēr kaxyw.

²¹ Tã pa hpãnhã mẽ kêp Ijaew kêt xwỳnhjê hwỳr ixpa nē mẽ kot amnhĩ nhĩpêx kôt amnhĩ nhĩpêx o ri mẽ hkôt ixpa. Mẽ kot ja hã ixpumunh nē ixkapēr mar nē ixpyrà nē amnhĩ kaxyw Jejus kôt hamaxpēr kaxyw. Tĩrtũm mẽ Kris wa hamaxpēr xà hkôt na pa hte ahpỳnhã mẽ kot amnhĩ nhĩpêx xwỳnhjê hwỳr mra nē ã amnhĩ nhĩpêx anhỹr o ri mẽ hkôt ixpa.

²² Nē na pa hte kormã mẽ kot Kris kôt amnhĩ xunhwỳr tohtuj anhỹr xwỳnhjê hkôt ri ixpa nē te ixte ho mẽ uràk nē kormã hkôt amnhĩ xãm nyw pyràk o amnhĩ nhĩpêx o ri mẽ hkôt ixpa. Mẽ kot ja hã ixpumunh nē ixkapēr mar nē hkôt amnhĩ nhĩpêx mex kaxyw. ã na pa hte mẽ piitã mẽ hkôt ri ixpa nē mẽ hkôt amnhĩ nhĩpêx o ri ixpa anē. Mẽ kot ja hã ixpumunh nē inhmar nē ixpyrà nē Kris kôt amnhĩ nhĩpêx tỳx kaxyw.

²³ Mẽ kot mẽ ujarēnh mex mar kaxyw na pa hte mẽ piitã mẽ hkôt ã amnhĩ nhĩpêx anhỹr o ri ixpa.

Tîrtûm kot mẽ ho hkra nẽ mẽ ho mex kaxyw. Nẽ mããnẽn pa kot mẽ hã ixto mex kaxyw.

Pawre kot htỳx ri amnhĩ nhĩpêx kêt ã kot amnhĩ jarẽnh

Sikũn Ximotre 4.7; Eprêw 12.1-3

²⁴ Mẽ hprôt xwỳnhjaja na htem hprôt tỳx no nhũm mẽhõ pixi nẽ wam hkwỳjê re nẽ wam tẽn pøj nhũm htem ja hã omu nẽ kãm mẽ hkĩnhxà gõ. Ja pyrà nẽ kêr ka mẽ apiitã tãm amnhĩ nhĩpêx mex rãhã ho ri apa kê Tîrtûm mẽ apumu nẽ nhỹrmã ja pãnhã mẽ amã mẽmoj mex gõ.

²⁵ Nẽ mẽ hprôt xwỳnhjaja na htem mẽ hkĩnhxà hpyr prãm xàj mẽ hprôt xà hã arĩgro hwỳr apkati mẽ hprôt o kuhê. Prôt tỳx prãm xàj. Tã mẽ hprôt xà hã arĩgrota ã nhũm hkwỳjê pê amnhĩ to wa nẽ amnhĩm hkĩnhxà py. Nom koja hkĩnhxàja kritpêm kãm mex ry hkêt nẽ. Koja gaa nẽ hapêx tokyx anẽ. Tã nom kot puj mẽ Tîrtûm kapêr kôt amnhĩ nhĩpêx mex o ri papa. Nẽ mẽ hprôt xwỳnhjê kot hkĩnhxà hpyr prãm xàj apkati mẽ hprôt o kuhêta pyrà nẽ apkati mẽ hkôt amnhĩ nhĩpêx mex o ri papa. Hãmri nhũm amnhĩ tã mẽ pahpumu nẽ nhỹrmã mẽ pamã hkĩnhxà mex õ gõ. No ãm jar hkĩnhxà kurom koja aa mẽ pahpê hapêx kêt nẽ. Koja mẽ pamã mex rãhã ho rãhã.

²⁶ Nẽ na hte mẽ hprôt xwỳnhjaja htỳx ri tanhmã hprôt to ho pa hkêt nẽ. Na htem hkwỳjê pê amnhĩ to wa kaxyw hprôt nẽ nhỹri mẽ àhuk xàta pix pumunh pê hwỳr hprôt nẽ mra hãmri nẽ kamã ahtwỳ. Nẽ kamã àhuk pix kukamã hamaxpêr o hprôt tỳx nẽ mra. Ja pyrà nẽ na pa hte apkati mẽ

Tĩrtũm kôt pix mã amnhĩ nhĩpêx o ri ixpa. Nhỹrmã kot inhmã mẽmoj mex nhõr kaxyw.

Ně mẽ pijapu mex xwỳnhjaja na htem htỳx ri nhỹhỹnh axpẽn tak kêt nẽ. Na htem nhỹhỹnh kot mẽ htak o mẽ rẽn h xà pix kamã mẽ htak o mẽ rẽn kukamã hamaxpěr pê kamã mẽ htak. Ja pyrà nẽ na pa hte ixtỳx ri tanhmã amnhĩ nhĩpêx to ho ri ixpa hkêt nẽ. Na pa hte Tĩrtũm mã ijamaxpěr pê tanhmã amnhĩ nhĩpêx to rãhã ho ixpa. Kot nhỹrmã inhmã mẽmoj mex nhõr kaxyw.

²⁷ No na pa hte ixtỳx ri amnhĩ jamaxpěr xà hkôt tanhmã amnhĩ nhĩpêx to ho ri ixpa hkêt nẽ. Kot pa ã amnhĩ nhĩpêx anẽ nẽ ixte mẽ kãm Jejus kapěr jarẽn h o ri ixpa htã ãm ri ixtỳx ri ã amnhĩ nhĩpêx anhỹr kaprỳ nhũm Tĩrtũmja tee ri ja hã ixpumu nẽ inhmã mẽmoj mex nhõr kêt nẽ.

10

Ijaew kot amnhĩ nhĩpêx

Rõmãn 15.4; Eprêw 3.8-11; Jutre 5

¹ E Kris kôt ixkwỳjaja. Kot paj mẽ amã amnepê mã mẽ ixpê Ijaew hkukamã mẽ inhĩgêjtaja tanhmã mẽ harẽn h to ka mẽ inhma. Mẽ kot pahi finat Mojes kôt ri mẽ pa xwỳnhjaja kot paj mẽ amã harẽ. Mẽ pahte mẽ uràk nẽ pahtỳx ri amnhĩ nhĩpêx pymaj kot paj mẽ amã tanhmã mẽ harẽn h to ka mẽ inhma. Mãn ka mẽ arĩ mẽ harẽn ã anohtỳx japêr. Na prem piitã pika pê Ejit kamã pa htã kurũm kator pa. Hãmri nẽ ma kapôt ã kakrã pumunh o hkôt pa ho pa. Pry hkêt jakamã nhũm pre Tĩrtũm tanhmã kakrã hto nhũm ma mẽ hkukamã pa nhũm mẽ omu nẽ hkôt pa. Hãmri nẽ ra gô xujanãr mẽ kot kãm: “Gô kamrêk” anhỹr xwỳnhja

wỳr pòj nê tee ri rêr prãm xàj amnhĩ kukamã hamaxpêr. Hãmri nhũm Tĩrtũm mẽ kãm hkôt ã ho amgrà nhũm mẽ hkôt mex pê rêr pa nê axte kakrã hkôt pa ho pa.

² Finat Mojes kot mẽ o pa jakamã nhũm prem kêp hkwỹ hã amnhĩ jarẽ nê kãm amnhĩ jarẽnh o:

—Nà kot paj mẽ akapêr ma nê akôt ri amnhĩ nhĩpêx o ixpa. Anê.

Te mẽ pahpê Kris kwỳ hã amnhĩ jarẽnh kaxyw mẽ kot gôx kãm mẽ pahkrã kumrãr nhũm mẽ pahte Kris mã amnhĩ jarẽnhhta pyrãk.

³ Na prem kapôt ã ri pa nhũm Tĩrtũm tãm kaxkwa rũm mẽ hwỳr mẽ apkur xà rê nhũm mẽ hkawrà nê ho apkur o pa.

⁴ Tã ra kôr xàj hirot nhũm Tĩrtũm tanhmã mẽ kãm kên prêkja to nhũm kurũm mẽ kãm gô axkapĩ nhũm mẽ ho ixkô nê akupỹm hihtỳx. Æ Krisja mẽ hkôt mẽ ho mẽ hihtỳx o pa anê. Mẽ kot no ho omunh kêt tã nhũm mẽ hkôt mẽ ho mẽ hihtỳx o pa.

⁵ Tã no nhũm mẽ ohtô nê Tĩrtũm kôt amnhĩ nhĩpêx kêt nê. Kot mẽ ho mex kumrêx tã nhũm mẽ ãm amnhĩ tã omu nê ãm omu nê kapêr kôt amnhĩ nhĩpêx kêt nê. Æm kapêr kwỳm ri tanhmã amnhĩ tomnuj to ho pa nhũm tee ri amnhĩ tã mẽ omu nê tanhmã mẽ ho nhũm mẽ hkwỹja hpikaprãr pa. Hãmri nhũm arĩ mẽ htĩr xwỳnhjaja kapôt ã mẽ hãgênh pa nê axte ma pa.

⁶ Jakamã kwa kêr pu mẽ kot ã amnhĩ nhĩpêx anhỹr ã mẽ harênh ma nê hã pano htỳx nê ho papa hãmri nê ho mẽ uràk kêt nê. Mẽ uràk nê pahtỳx ri tanhmã amnhĩ nhĩpêx to ho ri papa hkêt nê.

⁷ Nê na pre mẽ hkwỳjaja sãnti kutã hkõn krã ho rôrôk nê hkrĩ nê kãm amnhĩ jagrer pê amnhĩ to kuwỳ. Tĩrtũm kapêr ã kagà htũm kot mẽ kot amnhĩ nhĩpêx anhỹr ã mẽ harênh kot:

Na prem sãnti kutã apkur o hkrĩ nê kãm amnhĩ jagrer o hkrĩ nê gaa nê pipãnh pix o pa. Jao axpẽn kamã hpijaàm kêt o pa.

Anhỹr jakamã kwa kêr pu mẽ ã mẽ kot amnhĩ nhĩpêx anhỹrja ã pano htỳx nê ho mẽ uràk hkêt nê.

⁸ Nê na pre mẽ hkwỳjaja htỳx ri mjên nê hprõ kuhpa hã nhãm ri mẽ kamã hpijaàm kêt o pa. Mỳrapê nhũm arĩgro pixi hã mẽ ohtô rax kumrêx nê axkaprã. Mẽ kêp 23.000 nê pikaprãr pa. Tã ã Tĩrtũm kot mẽ panhĩpêx anhỹr pymaj kêr pu mẽ ja hã pano htỳx nê ho mẽ uràk kêt nê. ãm kwarĩ ho kwarĩ.

⁹ Nê na pre mẽ hkwỳjaja axtem nê htỳx ri tanhmã axpẽn mã Tĩrtũm jarênh to nê harênh o:

—Nà Tĩrtũmja gryk tokyx anhỹr kêt jakamã kwa pu mẽ ã amnhĩ tomnuj anhỹr o papa. Kojã mẽ pahpumu nê tanhmã mẽ pahto hkêt nê.

Anhỹr tã nhũm tee ri ja hã mẽ kuma nê mẽ omu nhũm ja kãm mex kêt nê nhũm mẽ hwỳr kagã xoprê nhõ wenẽn xihtỳx kwỳ rẽ nhũm mẽ hwỳr mra nê mẽ hkamnhar o mẽ hkwỳjê pa. Tã ã kot mẽ panhĩpêx anhỹr pymaj kwa kêr pu mẽ ja hã pano htỳx nê mẽ uràk nê amnhĩ tã Tĩrtũm kamã pajamak o papa hkêt nê. Kwarĩ ho kwarĩ.

¹⁰ Nê na pre mẽ hkwỳjaja axtem nê Tĩrtũm o kapêr punuj nê nhũm tee ri amnhĩ tã mẽ kuma nê mẽ hwỳr kapêr o wrỳk xwỳnh mẽ nhũm ma mẽ hwỳr wrỳ nê ã hã mẽ hkwỳjê nhĩmex. Tã ã kot mẽ panhĩpêx anhỹr pymaj kwa kêr pu mẽ ja hã pano

htÿx nê ho mē uràk nê Tirtûm o pakapêr punuj kêt nê.

¹¹ Na pre mē ixpê Ijaew nhîgêtjaja ã htÿx ri amnhî nhîpêx o pa anê. Tirtûm kapêr ã kagà htûm kot ã mē kot amnhî nhîpêx anhÿr piitã harênh par. Mē panhō ejêp kaxyw. Mē pahte kamã harênh nê mē harênh mar tÿx nê mē uràk nê ã amnhî nhîpêx anhÿr kêt kaxyw. Ra Jejus akupÿn mē pahwÿr wrÿk xà hã arîgro hkukamã grêre jakamã kwa kêr pu mē kutêp mē kurom kapêr kôt pix mã ri amnhî nhîpêx mex rãhã ho ri papa.

Mē pahte mēmoj punuj nê amnhî to htÿx ã mē pamã karõ

Matêwre 4.1, 6.9-13; Wam Korît 1.8; Sikûn Pêtre 2.9; Jutre 24

¹² Tã kêr ka mē ã Ijaew kot amnhî nhîpêx anhÿr ã mē harênhja ma nê ã ajamaxpêr anhÿr kêt nê. Rÿ mē ajamaxpêr o:

—Nà mēmoj piitã kutã ixihtÿx kênã kot pa hkêt mē uràk nê ã amnhî nhîpêx anhÿr o ri ixpa.

Anhÿr o mē ajamaxpêr kêt nê. Kot kaj mē ã amnhî jarênh anê nê ra mē uràk nê tanhmã amnhî tomnuj to.

¹³ Nê na prem kapôt ã pare ri omnuj nê ri pa. Nhûm mēkarõmnuti tanhmã mē hkrã hto nhûm mē tanhmã amnhî tomnuj to ho pa. Ja pyrã nê na hte arî mē pahte amnhî tomnuj hprãm xàj tanhmã mē pahkrã hto ho pa. Mē pahpiitã ã mē pahto anhÿr o ri mē pahkôt pa. Nom nhûm Tirtûm ra kot mē pamã amnhî jarênh xà hkôt mē panê omunh mex rãhã ho pa. Jakamã na pu htem tanhmã amnhî tomnuj to hkukamã pajamaxpêr nhûm ja hã mē pahpumu nê mē panê mēkarõmnuti mã kapêr. Nê

kutã mẽ pahto paxihtỳx nẽ pu mẽ ỹ hã amnhĩ tomnuj kêt nẽ. Nẽ ãm kôt pix mã amnhĩ nhĩpêx mex o ri papa.

*Mẽ kot sãnti mã mẽmoj nhõr xwỳnhjê jarẽnh
Wam Korît 8.1-13; Karatas 4.8; Apokarip 9.20*

¹⁴ Jakamã e Kris kôt ixkwỳjaja. Kêr ka mẽ amnhĩ kaxyw sãnti hkôt ajamaxpêr o ri apa hkêt nẽ. Nẽ amnhĩ to hwỳr kêt nẽ. ãm kwarĩ ho kwarĩ.

¹⁵ E mẽ axàhpumunh tỳx ã amnhĩ jarẽnh jakamã kot paj mẽ amã mẽmoj jarẽ ka mẽ aprĩ hã inhmar tỳx japêr.

¹⁶ Nà na pu htem tõhã Jejus kot mẽ panê htyk mã pajamaxpêr kaxyw axpên wỳr akuprõ. Hãmri nẽ mẽmo kagô hkwy ru nẽ Tirtũm mã mex ã harẽ nẽ mẽmoj o pahkôm pê Jejus kot mẽ panê hkamrô pikapĩr mã pajamaxpêr. Nẽ hpãnhã pãwti hõ py nẽ axpên mã ho hkry nẽ mẽ kot Kris pĩr nẽ ĩ kamã hkamnhwỳr nhũm mẽ panê htykja mã pajamaxpêr pê kuku.

¹⁷ Pãwtita ãm pixire htã pu htem axpên mã ho hkry nẽ pahpiitã kuku. Mẽ pahpê Kris kwỳ hã mẽ pahte amnhĩ jarẽnh nhũm mẽ pahkwỳ kot ja hã mẽ pahpumunh kaxyw. Te mẽ pahtipxi nẽ ri mẽ papa pyrãk nẽ pãwti pixire htã pu mẽ pahpiitã kuku.

¹⁸ E kot paj hpãnhã mẽ amã amnepê mã Ijaew kot tanhmã amnhĩ nhĩpêx to jarẽ ka mẽ inhma. Na pre htem Tirtũm mã mex ã harẽnh nẽ kãm amnhĩ nhõr ã kot amnhĩ tã mẽ omunh kaxyw nhũm prem tanhmã amnhĩ nhĩpêx to. Jao kãm mẽ apkur xà hkwy gõ nẽ kãm mex o mex ã harẽ. Hãmri nẽ amnhĩ mã mẽmojta kwỳ xà nẽ hkur o hkrĩ. Jao ra

Tĩrtũm mã mex o mex ã harẽ nẽ kãm kêp hkra hã amnhĩ jarẽ.

¹⁹ Nom mẽ kot sãnti mã mẽmoj nhõr xwỳnhjaja na htem kãm mẽmo mẽ apkur xà hkwỳ gõ nom ãm kãm õr kaprỳ. Tanhmã kot we amnhĩ to nẽ amnhĩ tã mẽ omu? Mo rĩt kaxyw no? ãm mẽ ãhkra ho mẽ kot amnhĩm hipêx kênã. Jakamã na htem ãm kãm mẽ apkur xà hkwỳ nhõr kaprỳ.

²⁰ Mẽ kot sãnti mã mẽmoj nhõr xwỳnhjaja na htem Tĩrtũm mã õr kêt nẽ. Mẽkarõmnuti mã na htem kugõ. Jakamã kot kaj mẽ urak nẽ sãnti mã mẽmoj gõ nẽ apê mẽkarõmnuti hkwỳ hã amnhĩ to amnhĩrĩt nẽ apê hkwỳ hã ri apa. Jakamã mẽ ate sãnti mã mẽmoj nhõrta na inhmã hprãm kêt kumrẽx.

²¹ Kot kaj mẽ panhõ Pahihti Jejus kot mẽ panê htyk ã mẽmoj kagõ hkwỳ ho ixkõ hãmri nẽ ma mra nẽ hpãnhã sãnti pẽ mẽkarõmnuti hã mẽmoj to ixkõ. Hãmri nhũm Tĩrtũmja tee ri ja hã mẽ apumu nhũm ja kêp omnuy tỳx nẽ. Rỳ ka mẽ Pahihti Jejus kot mẽ panê htyk ã pãwti hkwỳ hku nẽ hpãnhã ma mra nẽ sãnti pẽ mẽkarõmnuti hã mẽmoj hku. Hãmri nhũm Tĩrtũm kêp ja omnuy tỳx nẽ. Mẽ pahte ã amnhĩ nhĩpêx anhỳrja na axpẽn kuhpa hã.

²² Jakamã kot ka mẽ ã amnhĩ nhĩpêx anẽ nẽ te ra mẽ amã mẽkarõmnuti hkĩnh nẽ mããnẽn amã Tĩrtũm kĩnh pyrak o amnhĩ nhĩpêx. Nẽ te Tĩrtũm kurom mẽ kajaja mẽ axàhpumunh tỳx pyrak o amnhĩ nhĩpêx. Nhũm tee ri amnhĩ tã mẽ apumu nẽ mẽ akamã gryk tỳx nẽ. Kwa mẽ okora. Koja Tĩrtũm akamã gryk ka amex kêt kumrẽx.

Mẽ pamã Kris kõt mẽ pahkwỳjê hkĩnh pẽ mẽ ho

*mex ã mẽ pamã karõ**Matêwre 20.28; Rõmãn 14.1-15.7; Piripos 2.1-4*

²³ Nê na htem tõhã amnhĩ jarênh o:

—Nà kot pa inhmã mẽmoj to anhÿr prãm nê ixàmnhĩx ã amnhĩ nhĩpêx anhÿr o ri ixpa. Anê.

Tã no ãm mẽmoj piitã mẽ pamã mex kêt. Na htem kãm mẽmoj to anhÿr prãm xà hkôt mẽmoj piitã tanhmã ho ho ri pa nê tanhmã amnhĩ tomnuj to. Hãmri nhũm mẽ hkwyjaja ja hã mẽ omu nê mẽ uràk nê tanhmã ri amnhĩ tomnuj to. Jao Kris kôt amnhĩ xunhwÿr tÿx kêt nê.

²⁴ Jakamã kwa kêr pu mẽ amnhĩ pix kukamã pajamaxpêr pê tanhmã amnhĩ nhĩpêx to ho papa hkêt nê. Mãânên amnhĩ kwÿjê hkukamã pajamaxpêr pê tanhmã mẽ ho mex to ho ri papa pê tãm ri amnhĩ nhĩpêx o papa.

²⁵ Nê kot kaj mẽ amnhĩ xàpkur xà japrôr kaxyw ma nhÿhÿm mra nê mãmrĩ axàmnhĩx ri amã mẽmoj prãm xà hkôt mẽmoj japrô. Nom kêr ka mẽ axujaprôrja kêp sãnti xàpkur xà hã mẽ hkukjêr kêt nê. ãm axàmnhĩx ri mẽ kêp mẽmoj japrôr o ri apa.

²⁶ Tĩrtũm kapêr ã kagà htũm kot ja jarênh kot: Pika piitã hkôt mẽmoj piitã kêp Tĩrtũm nhõ na. Anê. Jakamã mẽ mãmrĩ axàmnhĩx ri mẽmoj piitã haprô nê mẽmoj piitã hkur o apa.

²⁷ Tã koja mẽ kêp Kris kwÿ hkêt xwÿnhjê hõ ate kutã axàpkur kaxyw amnhĩ wÿr awÿ ka amã hwÿr amõr prãm nê mãmrĩ ma hwÿr mõ. Nhũm mẽmoj to amã anhõ ka axàmnhĩx ri mãmrĩ aku. No ri tee ri amnhĩ kukamã ajamaxpêr nê tanhmã hã hkukjêr to hkêt nê. Rÿ kãm:

—Kwa xà we mryja sãnti hã mẽ apkur xà na nà?

Anhÿr o hã mẽ hkukjêr kêt nê. Âm mãmrĩ axàmnhĩx hkur o akrĩ.

²⁸⁻²⁹ Nom koja Kris kôt mẽ kot amnhĩ xãm tohtuj anhÿr xwÿnhjê hõ mẽ awÿr axà nê tee ri ja hã apumu nê amã:

—Kwa sãnti hã mẽ apkur xà na ka ri mẽ kutã hkur o akrĩ.

Anhÿr o amã kapêr ka ama nê hkaga kurê kumrêx nê hkur kêt nê. Amã mex tã Kris kôt atõja kêp omnuj jakamã ka hkaga nê hkur kêt nê. No kot ka âm ama nê arĩ hkur o anhÿr japêr. Kot amã harênh xwÿnhnta kêp omnuj tã ka arĩ noo mã hkur japêr. Nhũm ja hã apumu nê tee ri Tĩrtũm kapêr kukamã tanhmã hamaxpêr to. Hãmri nê apyrà nê kuku nê gaa nê tee ri amnhĩ kukamã hamaxpêr nê amnhĩ mã:

—Hêxta waa nê. Sãnti nhõja mex kêt tã pa ri kuku. Kwa na pa pêr hkurja o amnhĩ tomnuj nê. Hêxta waa nê. Anê.

Hãmri nê tee ri amnhĩ kukamã hamaxpêr o hkaprĩ nê. ã kot amnhĩ nhĩpêx anhÿr pymaj koja mēhõ ã mẽmo mẽ apkur xà nê amã kapêr anê ka ama nê hkaga kurê kumrêx. Jao amnhĩ pix kukamã ajamaxpêr kêt nê. Mãñnēn Kris kôt atõ nê atõxjê mex kukamã ajamaxpêr. Nom koja amã kêp sãnti hã mẽ apkur xà hã harê ka ama nê ã ajamaxpêr anhÿr japêr nê ajamaxpêr o:

—Nà kêp omnuj tã kot paj mamrĩ kuku. Ja inhmã mex kênã.

³⁰ Ra ixte Tĩrtũm mã harênh nê ixàmnhĩx hkur o inhÿr kênã kot kêt ã nê inhmã kapêr anê. Anê.

Kwa mẽ ã ajamaxpêr anhÿr kêť. Kot kaj mẽ ã ajamaxpêr anê hãmri nê Kris kôt atõ rÿ atõx mex kukamã ajamaxpêr kêť nê.

³¹ Jakamã kêr ka mẽ tãm tanhmã amnhĩ nhĩpêx to ho ri apa. Nê axàpênh mex nê. Kêr kê mẽ piitã ja hã mẽ apumu nê mẽ apumunh kôt amnhĩm Tĩrtũm mex ã harê.

³² Nê kêr ka mẽ piitã mẽ noo mã tãm ri amnhĩ nhĩpêx o apa. Ijaew noo mã nê Ijaew kêť xwÿnhjê noo mã. Nê Jejus kwÿjê noo mã. Mẽ piitã mẽ noo mã tãm ri amnhĩ nhĩpêx rãhã ho ri apa. Mẽ kot tee ri mẽmoj tã mẽ apumunh nê hpijaàm pymaj ka mẽ tãm ri mẽ piitã mẽ noo mã tanhmã amnhĩ nhĩpêx mex to ho ri apa.

³³ Na pa hte ã amnhĩ nhĩpêx anhÿr o ri ixpa. No na pa hte pa amnhĩ pix kukamã ijamaxpêr kêť nê. Mẽ piitã mẽ mex kukamã na pa hte ijamaxpêr o ri ixpa. Pê tanhmã amnhĩ nhĩpêx to ho ri ixpa. Mẽ kot ja hã ixpumunh nê ixpyrà nê Jejus kôt amnhĩ xunhwÿr nê ãm kôt pix mã ri amnhĩ nhĩpêx o pa kaxyw.

11

¹ Na pre hte Kris ã ã amnhĩ nhĩpêx anê nê mẽ piitã mẽ mex kukamã hamaxpêr rãhã ho ri pa. Tã na pa hte uràk nê ã amnhĩ nhĩpêx anê. Jakamã kwa kêr ka mẽ ixpyrà nê ã amnhĩ nhĩpêx anhÿr o mãn ri apa.

*Mẽnijaja mẽ mjên ã hpijaàm ã mẽ kãm karõ
Epes 5.22; Wam Pêtre 3.1-6*

² Nê na ka xep htem arĩ ra ixte tanhmã mẽ amã ixkapêr toja mã ajamaxpêr tÿx o ri apa. Na pa pre Kris kôt mẽ pahtõ nê mẽ pahtõxjaja axpên

wÿr pikuprõnh nẽ tanhmã amnhĩ nhĩpêx to hã mẽ amã karõ ka prem inhma nẽ mẽ urak nẽ ã amnhĩ nhĩpêx anẽ. ãm hãmri na ka htem ã amnhĩ nhĩpêx anhÿr o apa. Ja na inhmã mex.

³ Na pa pre krĩ hõ kamã mēnijaja kot amnhĩ krã hpro hã mẽ amã mẽ harẽ. Ka prem inhma nhũm mẽ akwÿjaja kãm ja mex nẽ nhũm mẽ akwÿjaja tee ri ja kukamã ajamaxpēr. No mẽmo kaxyw na hte mēnijaja amnhĩ krã hpro? E kot paj ixprĩ hã mẽ amã ja jarẽ ka mẽ inhma. Nà Tĩrtũm kēp Kris jamār xwÿnh nhũm Kris kēp Tĩrtũm mã mẽ inhmyjē jamār xwÿnh. No mẽ anijaja mẽ amjēn kēp Kris mã mẽ ajamār xwÿnh. Na hte mēnijaja ohtõ nẽ ra mẽ mjēn ã amnhĩ to amnhĩrĩt kaxyw amnhĩ krã hpro nẽ ri pa. No mẽ inhmyjaja na pa htem ã amnhĩ nhĩpêx anhÿr kēt nẽ. Na pa htem amarĩ ixkrã hkēnh nẽ ixpa.

⁴ Jakamã na pa htem Tĩrtũm kapēr mar xà hã ixkre hwÿr axpēn wÿr akuprõ nẽ Tĩrtũm nhÿ hã mẽ anijē mã kapēr jarēnh o ixkuhē. Rÿ Tĩrtũm mã tanhmã mẽ pajarēnh to. No ãm amnhĩ krã hpro hkēt rãhã kãm mẽ ajahkre rÿ kãm mẽ pajarē. Kot pa mẽ amnhĩ krã hpro nẽ te mẽ apē ixprõjaja mẽ apē mẽ ijamār xwÿnh ã mẽ ajarēnh pyrak. Jao te mẽ ixte mẽ ijamār xwÿnh Kris ã ixpijaam kēt pyrak o amnhĩ nhĩpêx.

⁵ No mẽ anijaja mẽ ixte Kris mã mẽ ajamār xwÿnh jakamã na ka htem Tĩrtũm nhÿ hã mẽ inhmã kapēr jarēnh rÿ kãm mẽ pajarēnh kaxyw nẽ amnhĩ krã hpro. Mẽ ixte Kris mã mẽ ajamār xwÿnhjē hã apijaam kaxyw ã amnhĩ nhĩpêx anẽ nẽ mẽ amnhĩ krã hpro. Kot ka mẽ ã amnhĩ nhĩpêx

anhÿr kêt nê te mẽ ate mẽ ixtã apijaàm kêt pyrãk o amnhĩ nhĩpêx nhũm mẽ amjên tee ri ja hã apumu nê hpijaàm nê. Te ate amnhĩ krã hkênh nê ri apa nhũm tee ri apumunh nê hpijaàm pyrãk.

⁶ Kot kaj mẽ amnhĩ krã hkênh nê ri apa nê amnhĩ kamã apijaàm nê ri apa. Mẽ anijaja na ka htem akrã hkĩ japjê nê kamã amex nê ri apa. No kot ka mẽ amnhĩm akrã hkênh nê apunuj nê amnhĩ kamã apijaàm nê ri apa. Jakamã kêr ka mẽ Tĩrtũm mã amnhĩ jarênh kaxyw nê amnhĩ krã hpro. Nom kot ka mẽ amjên ã apijaàm kêt nê ri apa hprãm japêr nê mamrĩ amnhĩm akrã hkênh nê ri amnhĩ kuk ã apijaàm kêt nê ri apa.

⁷ No mẽ inhmyjaja na pa htem amnhĩ krã hpro hkêt nê. Te mẽ ixpê Tĩrtũm pyrãk nhũm mẽ anijaja te mẽ apê Tĩrtũm kra pyrãk o na pu htem axpên nhĩpêx. Tĩrtũm krajaja na htem mẽmoj tã Tĩrtũm mã karõ hkêt nê. Ja pyrã nê mẽ anijaja na ka htem mẽ inhmyjê mã mẽmoj tã karõ kamã axihtÿx o apa hkêt nê. Na ka htem mẽ ixtã apijaàm kãm mẽmoj tã mẽ ixwÿ.

⁸ Amnepê mã Tĩrtũm kot mẽmoj to kator krax rũm na pre myja kumrêx nhĩpêx hãmri nê kêp ôkwa i hõ kapa nê ho kãm hprõ nhĩpêx. No na pre nija kumrêx nhĩpêx nê ôkwa i ho kãm mjên nhĩpêx kêt nê.

⁹ Myja mã na pre hprõ nhĩpêx. No nija mã mjên nhĩpêx kêt nê.

¹⁰ Jakamã kêr ka mẽ anijaja amjên ã apijaàm ã amnhĩ to amnhĩrĩť kaxyw hãmri nê mẽ inhmã Tĩrtũm nhÿ hã tanhmã akapêr jarênh to kaxyw rÿ kãm amnhĩ jarênh kaxyw hãmri nê amnhĩ krã hpro nê akuhê. Hãmri nhũm Tĩrtũm kapêr o mẽ wrÿk

xwÿnhjaja ja hã mẽ apumu nẽ hkĩnh nẽ tee ri mẽ akukamã hamaxpêr kêt nẽ.

11-12 Nẽ wam ni kator xwÿnhhta na pre myja rûm kato. Tã na pa htem jarãhã mẽ inhmyjaja hpãnhã mẽ anijê rûm ijapôj. Tĩrtũm jamaxpêr xà hkôt. Tãm na pre ã mẽ pahte amnhĩ nhĩpêx anhÿr kaxyw ã mẽ panhĩpêx anê. Tã mẽ ixpê Pahihti Kris kwÿ hã mẽ inhmyjaja nẽ mẽ anijaja na pu htem ri ahte papa hkêt nẽ. Na pu htem axpên kutã pamã axpên hkĩnh o papa nẽ mẽmoj to axpên kutã panojarêt o ri papa. Nẽ axpên to presija ho papa. Na hte mẽ anijaja mẽ amjên o presija ho apa. Nẽ mẽ amyjaja na ka htem mẽ aprô ho presija ho apa. Tã kër ka mẽ anijaja mẽ amjên ã apijaàm o ri hkôt apa.

13 Jakamã kwa mẽ kot amnhĩ krã hproja kukamã ajamaxpêr tÿx nẽ. Xà mẽ anhõ krĩ kamã mênijaja mẽ mjên ã hpijaàm ã amnhĩ to amnhĩrĩt kaxyw amnhĩ krã hpro nà? Koja mẽ ja kaxyw ã amnhĩ nhĩpêx anhÿr japêr kê mẽ rĩ mẽ anoo mã Tĩrtũm mã amnhĩ jarênh kaxyw nẽ kupê xê hkwy ho amnhĩ krã hprô nẽ rĩ kãm amnhĩ jarê. Nom koja mẽ ã amnhĩ nhĩpêx anhÿr kêt nhũm mẽmyjaja tee ri ja hã mẽ omunh nẽ ho kapêr hkêt japêr hãmri kê mẽ rĩ amnhĩ krã hpro hkêt nẽ ri pa.

14 Mẽ kot mẽ pahte amnhĩ nhĩpêx ã mẽ pah-pumunh nẽ hkĩnh kaxyw na pu htem tanhmã amnhĩ nhĩpêx to ho ri papa. Na htem mẽ pahkrã hkĩ jarênh o: “Koja mẽmyjaja hkrã hkĩ japjê nẽ ri pa nẽ ra kamã omnajti.” Anhÿr jakamã na pa htem amnhĩ krã hkênh nẽ ri ixpa.

15 No mẽ anijaja na htem mẽ ajarênh o: “Mênijaja na htem hkrã hkĩ japjê nẽ ri pa nẽ kamã muxti.”

Anhÿr jakamã na ka htem akrã hkĩ japjê nê ri apa. Mẽ akĩ te kêp mẽ akrã hpro xà pyrãk. Na ka htem ã amnhĩ nhĩpêx anhÿr o apa.

¹⁶ E na pa ra mẽ amã krĩ hkwÿ kamã Kris kwÿ nijaja kot mjên ã hpijaàm ã amnhĩ to amnhĩrît kaxyw tanhmã amnhĩ nhĩpêx to hã mẽ harê. Tã koja mēhõ nija tee ri ja ma nhũm ja kêp omnuj japêr. Nhũm amnhĩ jarênh o:

—Kêt. Kot paj tanhmã inhmã amnhĩ nhĩpêx to hprãm xà hkôt tanhmã ri amnhĩ nhĩpêx to ho ri ixpa. Koja inhmjên ja hã ixpumu nê hpijaàm nê rĩ tãm.

Anhÿr ã amnhĩ jarê ka mẽ tee ri ã kot amnhĩ jarênh anhÿrja ã ama nê kãm:

—Kwa nã ã ri ajamaxpêr anhÿr kêt nê. Na hte Kris kwÿjaja ã hamaxpêr anhÿr kêt nê. Anê.

Jejus tyk mã mẽ pajamaxpêr pê tanhmã mẽ pahte amnhĩ to hã mẽ pajarênh

Matêwre 26.26-30; Makre 14.22-26; Rukre 22.19-20

¹⁷ Nê na ka xep htem Tĩrtũm mã amnhĩ jarênh xà hã ixkre hwÿr axpên wÿr akuprõ nê kamã amnhĩ to mex kêt nê. Na ka htem tanhmã amnhĩ tomnuj to pa tee ri mẽ ajarênh ma nê ixkaprĩ nê. Nê amnhĩm mẽ amex ã mẽ ajarênh kêt nê.

¹⁸ Na ka xep htem axpên wÿr akuprõ nê mẽmoj tã axpên mã akir nê axpên pê anhgrã. Nê ahpÿnhã mẽmoj mã ajamaxpêr jao ra mẽ amã axpên kĩnh kêt nê. Na pa tee ri ã mẽ ajarênh anhÿrja ma nê ixkaprĩ htÿx nê.

¹⁹ Xà na hte Tĩrtũm ahpÿnhã tanhmã mẽ pahte amnhĩ anhĩpêx to hã mẽ pahpumunh kôt kãm mẽ pajapê hkêt ã amnhĩ jarê? Nã na hte ã amnhĩ

nhîpêx anhÿr kêt nê. Kãm mẽ pajapê ho axpên pyrâk kênã.

²⁰ Nê na hte Kris kwÿjê piitã tõhã axpên wÿr akuprõ nê Jejus tyk mã hamaxpêr kaxyw pãwti hkwy hku. Tã mẽ kajaja na ka xep htem ja kaxyw axpên wÿr akuprõ nom axtem nê Jejus tyk mã ajamaxpêr pê axâpkur kêt nê. ãm mẽ axâpkur pix kukamã ajamaxpêr nê axtem nê axâpkur rÿnh o akrî.

²¹ Jao amnhî pix kukamã ajamaxpêr. Mẽ akwÿjaja wam mrar nê hpôx nê mẽ apkur xà hã mẽ hkrî xwÿnhjaja na xep htem hkwyjê rom mẽõta pinh pa. Nê wîhtija nhÿm mẽ mãânên hpenh pa nê axtem nê ho axpã. Jakamã nhÿm mẽ akwÿjaja kot amnhî to hapu nê hpôx xwÿnhjaja mẽmojta ã hprâr pa.

²² Kwa mon ka mẽ amã hprãm nê anhörkwÿ kamã axâpkur kêt nê? Mẽ kot Tÿrtÿm mã amnhî jarênh xà hã ixkre kamã na htem apkur rÿnh hkêt nê. Ka mẽ ã amnhî nhîpêx anê nhÿm mẽõ hkêt xwÿnhjaja amnhî to hapu nê mra nê mẽõ hã prã nê amnhî kamã hpijaàm nê. Kwa xà kot pa ã mẽ ate amnhî nhîpêx anhÿr ã mẽ ajarênh ma nê ixkÿnh nê mẽ ate amnhî nhîpêx mex ã mẽ ajarê? Nà kot paj ã mẽ ajarênh anhÿr kêt nê.

²³ Pahihti Jejus na pre ja hã tanhmã inhmã kapêr to nê inhmã:

–Kêr ka mẽ tõhã axpên wÿr akuprõ nê axâpkur pê ixtyk mã mãn mẽ ajamaxpêr pê ã amnhî nhîpêx anê nê ã amnhî nhîpêx anê. Anê.

Jakamã kot paj ixprî hã amnhî xô ri mẽ amã kot tanhmã inhmã kapêr tota jarê ka mẽ inhma. Nà Jejus kormã htyk kêt ri Jut Kariot ra kot pôristi mã

hã àmnênh kaxyw nhũm kamàt nhũm Jejus mẽ ÿ
hã mẽ ahkre xwỳnhjê mẽ apkur kaxyw hkrĩ hpa.
Hãmri nhũm Jejus pãwti hõ py nẽ o xa

²⁴ nẽ Tĩrtũm mã harẽ nẽ kãm:

—Pa Papaj. Nà ãm hãmri na ka hte mẽ inhmã mẽ
inhõ mex o apa. Anẽ.

Nẽ hpãnhã pãwja o hkry pa nẽ ho mẽ kot ÿ hã mẽ
ahkre ho mẽ pa xwỳnhjê nhĩpêx pa nẽ mẽ kãm:

—E na pa ã pãwti ho hkry nẽ mẽ amã òr anẽ.
Koja mẽ ã inhĩpêx anẽ nẽ te mẽ kot ixto hkry hpar
pyràk o inhĩpêx pa amnhĩ xà htỳx kamã ijamak
kãm ty. Nom mẽ anê kot paj ty. Jakamã e kêr ka
mẽ ixwakre kamã tõiã axpẽn wỳr akuprõ nẽ ixte
mẽ ate amnhĩ tomnuj pãnhã amnhĩrer kaxyw mẽ
anê ixtyk mã ajamaxpêr pẽ akĩnh nẽ pãwta kur o
akrĩ. E mẽ mãmri axàmnhĩx aku. Anẽ.

²⁵ Hãmri nẽ hpãnhã kop kãm wĩhtita py nẽ o xa nẽ
mẽ kãm:

—E kop kãm wĩhtija te kêp Tĩrtũm kot mẽ atã
amnhĩ jarênh nyw xà jarênh pyràk. Ixtyk kukwak
ri koja mẽ ato hkra. Kot paj ty nhũm ixkamrõ mẽ
anê axkapĩ. Jakamã e. Mẽ kopja kamã wĩhti ho
akõm o axpẽn nhĩpêx. Nẽ ho akõm pẽ ixte mẽ anê
ixtyk mã ajamaxpêr. Anẽ.

²⁶ Tã ã kot amnhĩ jarênh anhỳr jakamã na pu
htem axpẽn wỳr akuprõ nẽ pãwti hkwỳ hku nẽ
mẽmo kagõ hkwỳ o ixkõ. Nẽ ho pahkõm pẽ axpẽn
mã Jejus tyk jarênh o pahkrĩ. Tã kêr pu mẽ arĩ
ã amnhĩ nhĩpêx anhỳr o ri papa rãhã nhũm Jejus
akupỳn mẽ pahwỳr wrỳ.

²⁷ Jakamã kot kaj mẽ tõiã mẽmo arĩgro hã kot
mẽ panê htykja mã ajamaxpêr kaxyw axpẽn wỳr
akuprõ. Hãmri nhũm mẽ anhĩõ mẽ awỳr axà nẽ

nhÿ. Nom axtem nê Jejus tyk mã hamaxpêr kêt japêr. Nê htÿx pãwti kur o nhÿ. Nê hkôt amarĩ mẽmo kagô ho hkôm o nhÿ. Kojã ã htyk mã hamaxpêr kêt rãhã amnhĩ nhĩpêx anê nê te Jejus o kapêr pyrãk o amnhĩ nhĩpêx. Te ho kapêr o:

—Nà Jejus amarĩ htyk nhũm hkamrô amarĩ hpikapĩr kênã. Na pre mẽ panê htyk kêt nê.

Anhÿr o ho kapêr pyrãk.

²⁸ Jakamã kwa kêt ka mẽ ate pãwta kur kaxyw nê taxy kormã tanhmã ate amnhĩ nhĩpêx to mã ajamaxpêr nê ajamaxpêr o:

—Kwa mãn pa Tĩrtũm kapêr kôt amnhĩ nhĩpêx mex rãhã ho ri ixpa nà?

Anhÿr o mãn ajamaxpêr. Hãmri nê ate hkôt amnhĩ nhĩpêx mex ã amnhĩ pumu nê amarĩ axãmnhĩx aku. No kot ka mẽ kormã mẽmoj punuj kaga hkêt nê arĩ ri ho anhÿr o pa hãmri nê kãm ajamaxpêr nê hkur kêt nê. Rÿ tanhmãn tee ri tanhmã ate amnhĩ tomnuj tota mã ajamaxpêr nê akaprĩ nê. Hãmri nê tokyx Tĩrtũm mã amnhĩ jarê nê amnhĩ to mex prãm xaj amnhĩ to awÿ hãmri nê arĩ kormã axãmnhĩx pãwtita ku.

²⁹ Kojã mẽhõ mẽ akôt axà nê mẽmoj kukamã hamaxpêr pê htÿx pãwti nhĩrênhta õ py hkur o nhÿ. Hãmri nhũm Tĩrtũm tee ri ja hã omu nê hã tanhmã ho.

³⁰ Na ka mẽ ra axohtô nê ã amnhĩ nhĩpêx anê nê atÿx ri mẽmoj kukamã ajamaxpêr pê pãwta ku. Jejus kot mẽ panê htykja mã ajamaxpêr kêt pê atÿx tanhmã ajamaxpêr to pê hkwÿ hkur o akrĩ. Mÿrapê na ka mẽ ra ja hã axà nê ri apa. Nê mẽ akwÿjaja ra htyk rax nê.

³¹ Nom kot ka mẽ axpẽn wỳr akuprõ hãmri nẽ akupỹm tãm axpẽn kõt ajamaxpěr nẽ axpẽn kõt amnhĩ nhĩpêx nẽ rĩ kormã pãwtita ku. Hãmri nhũm Tĩrtũm ja hã mẽ apumu nẽ tanhmã mẽ ato hkêt nẽ.

³² Na hte mẽ pahte tanhmã amnhĩ tomnuj to hã mẽ pahpumu nẽ hã tanhmã mẽ pahto. Mẽ pahte ja hã amnhĩ pumunh nẽ axte ã amnhĩ nhĩpêx anhỹr kêt kaxyw na hte ã mẽ pahpê hkrajê nhĩpêx anẽ. Jakamã kot puj mẽ nhỹrmã mẽ kệp hkra hkêt xwỳnhjê hkõt kuwyta wỳr ma papa hkêt nẽ.

³³ Jakamã e Kris kõt ixtõ nẽ ixtõxjaja. Kêr ka mẽ axte Pahihti Jejus tyk mã ajamaxpěr kaxyw axpẽn wỳr akuprõ. Hãmri nẽ ra axpẽn wỳr apikuprõnh pa hã axpẽn pumu nẽ rĩ kormã pãwti hkwy hku nẽ hkur pê Jejus kot mẽ panê htyk mã ajamaxpěr o akrĩ.

³⁴ Nẽ ka mẽ atõ ra amã prãm japêr nẽ anhõrkwỹ kamã apku nẽ rĩ kormã mẽ hkõt tẽ. Jao ra anhõhy htu nẽ ajamakêtkati nẽ akwỳjê jamãr o nhỹ. Kê mẽ hpôx pa ka mẽ atipxi nẽ Pahihti Jejus tyk mã ajamaxpěr pê hkur o akrĩ. Hãmri nhũm Tĩrtũm ja hã mẽ apumu nẽ hkĩnh nẽ tanhmã mẽ ato hkêt nẽ.

Na ka prem mẽ ate inhmã kagà nẽ mẽnhta kamã mẽmoj tã ixkukjêr rax nẽ. Tã na pa ra kagà ja kamã mẽ amã hkwy jarênh rax nẽ. Nom kot paj piitã harênh par kêt nẽ. Kot paj ãm mẽ amã hkwy pix jarê. Hãmri nẽ nhỹrmã ma mẽ awỳr mỗ nẽ mẽ apumu nẽ kormã axte mẽ amã harênh jatur xãm kumẽ.

*Mê kot Tirtûm kapêr o hêx xwÿnhjê jarênh
Rômãn 12.6-8; Wam Korît 14.29; Wam Pêtre 4.10-
11; Wam Juãw 4.1-2*

¹ Nê kot paj hpãnhã mẽ amã tanhmã Tirtûm Karõ jarênh to ka mẽ inhma. Tanhmã kot mẽ pahkrã hto nhùm mẽ pahte ahpÿnhã tanhmã kãm amnhĩ nhĩpêx to ho papaja kot paj mẽ amã harê.

² Amnepê mã kormã mẽ ate Kris kôt amnhĩ xunhwÿr kêt ri na ka prem sãnti hkôt ri amnhĩ nhĩpêx o ri apa. Kapêr kêt tã ka prem hkôt ri amnhĩ nhĩpêx rãhã ho ri apa. Te kot mẽ ano kupyr pyrak ka mẽ kãm mex o mex ã harênh o ri apa. Nê kãm amnhĩ jagrer pê amnhĩ to hwÿr o ri apa. ã na ka prem amnhĩ nhĩpêx anhÿr o ri apa.

³ Tã ra hpãnhã Tirtûm kôt amnhĩ xunhwÿ.

Na htem ohtô nê Tirtûm nhÿ hã kapêr jarênh o pa hã amnhĩ jarênh tã no ãm mẽ hkwÿjaja ja hã amnhĩ to hêx. Tã kot paj ixprĩ hã mẽ amã tanhmã mẽ harênh to. Koja mēhõ mẽ kãm Tirtûm nhÿ hã kapêr jarênh o pa hã amnhĩ jarê hã koja Jejus o kapêr punuj o pa hkêt nê. Koja harênh o:

—Jesús kêp mẽ panhõ Pahihti jakamã kwa pu mẽ hkôt amnhĩ xunhwÿ nê hkôt amnhĩ nhĩpêx o ri papa.

Anhÿr o harê. Koja mēhõ ã mẽ amã kapêr anê ka mẽ ama nê mẽ kot Tirtûm nhÿ hã kapêr jarênh o pa xwÿnh ã omunh kurê kumrêx. No koja mẽ amã ã kapêr anhÿr kêt nê ka mẽ ama nê Tirtûm kapêr o hêx o pa hã omunh kurê kumrêx.

*Tirtûm Karõ kãm mẽ pahte axpên to mex prãm ã
harênh*

Rômãn 12.6; Epes 4.7; Wam Pêtre 4.10

4 Nê ahpÿnhã kot tanhmã mẽ panhÿpêx to xwÿnhja ãm pixii. Kêp Tÿrtÿm Karõ. Na hte mẽ pahkarõ mã agjê nê ahpÿnhã tanhmã mẽ pahte axpên to mex kaxyw tanhmã mẽ panhÿpêx to. Kot tanhmã mẽ panhÿpêx to xàja ohtôô. Mẽ pahte ahpÿnhã ri tanhmã kãm amnhÿ nhÿpêx to nê tanhmã axpên to mex to ho ri papa kaxyw na. Tÿrtÿm Karõ na hte ja kaxyw tanhmã mẽ pahkrã hto.

5 Nê mẽ pahte kãm tanhmã amnhÿ nhÿpêx to ho papa xwÿnhja haxwÿja ãm pixii. Kêp Pahihti Jejus. Tã na pu htem ahpÿnhã kãm tanhmã amnhÿ nhÿpêx to ho ri papa.

6 Nê kot mẽ pahto ajuta nhÿm mẽ pahte ahpÿnhã tanhmã axpên to mex to ho papa xwÿnhja haxwÿja ãm pyxii. Kêp Tÿrtÿm. Na pu htem ahpÿnhã tanhmã hkôt axpên xunhwÿr tÿx to kaxyw tanhmã axpên to mex to ho papa.

7 Nê Karõja na hte ahpÿnhã tanhmã axpên kaxyw mẽ panhÿpêx to pu mẽ axpên to ajuta mex o ri papa.

8 Jakamã na pu hte mẽ pahkwÿjaja Tÿrtÿm Karõ nhÿ hã mã mẽ pahkwÿjê mã Tÿrtÿm kapêr jarênh o ri mẽ hkôt papa.

Nê mẽ pahkwÿjaja ma ÿ hã paxàhpumunh mex pê ma ri kapêr o mẽ ahkre ho mẽ hkôt papa.

9 Nê mẽ pahkwÿjaja Karõ nhÿ hã Tÿrtÿm kot tanhmã mẽ pahto ajuta hto kaxyw hkôt pajamaxpêr tÿx nê.

Nê mẽ pahkwÿjaja akupÿm mẽ à xwÿnhjê ho mex o papa nhÿm mẽ akupÿm mex nê pa.

10 Nê mẽ pahkwÿjaja aa mẽ kot mẽmoj pumunh kêt kwÿ ho anhÿr o ri mẽ hkôt papa.

Ně mẽ pahkwỳjaja Tirtũm kapěr mar tỳx nẽ ô ri mẽ kãm harěnh o mẽ hkôt ri papa.

Ně mẽ pahkwỳjaja Tirtũm Karõ nhỹ hã tanhmã mẽ kot amnhĩ nhĩpêx to hã mẽ omunh o papa. Rỳ pahprĩ hã mẽkarõmnuti nhỹ hã mẽ kot amnhĩ nhĩpêx ã mẽ omunh o papa.

Ně mẽ pahkwỳjaja nhãm mẽ kapěr mar kêt tã ra mẽ kapěr o pakapěr.

Ně mẽ pahkwỳjaja mẽ kapěr o pakapěrja ma nẽ mẽ kot mar kêt xwỳnhjê mã harẽ. Kormã aa pahte mar kêt tã ra pahprĩ hã mar mex nẽ mẽ kãm harẽ.

11 ã na hte Tirtũm Karõ kãm hprãm xà hkôt tanhmã mẽ panhĩpêx to pu mẽ ahpỳnhã y hã ã axpẽn nhĩpêx anhỹr o ri axpẽn kôt papa.

Te mẽ pahpê Kris nhĩ pyràk ã mẽ pajarěnh Rõmãn 12.3-8; Epes 1.22-23, 4.11-16; Korosẽ 3.15

12 E pa hpãnhã mẽ amã mẽ panhĩ kamã tanhmã mẽmoj jarěnh to ka mẽ inhma nẽ hã anohtỳx nẽ. Mẽ panhĩja ãm pixi htã no ãm kamã mẽmoj xohtôô. Kamã mẽ pahte nẽ kamã mẽ pahpa nẽ kamã mẽ pajakwa. Ně mẽ panhĩnhu nẽ mẽ pano. ã mẽ panhĩ kamã mẽmoj xohtô kot anhỹr. Ja pyrã nẽ Kris nhĩja ãm pixi htã te mẽ pahpê ã kamã mẽmoj xohtôta pyràk. Mẽ pahkwỳjaja te mẽ pahpê hte pyràk. Ně mẽ pahkwỳjaja te mẽ pahpê ãhkra pyràk. Ně mẽ pahkwỳjaja te mẽ pahpê no pyràk.

13 Mẽ pahpê Kris kwỳjaja axpẽn kaxyw mẽ paxohtôô. Mẽ ixpê Ijaewjaja nẽ mẽ apê Ijaew kêt xwỳnhjaja. Ně amarĩ ri mẽ kãm mẽ axàpěnh o mẽ apa xwỳnhjaja nẽ amnhĩ mã ri mẽ axàpěnh o mẽ apa xwỳnhjaja. ã ahpỳnhã mẽ paxohtô kot anhỹr tã

nhũm Tirtũm Karõ te mẽ pahpê Kris nhĩ pixi pyræk o mẽ panhĩpêx. Nhũm Krisja mẽ pahpiitã mẽ pamã Karõ gõ nhũm mẽ pahkarõ mã agjê. Pixi htã mẽ pahpiitã mẽ pahkarõ mã agjê.

14 Nẽ mẽ panhĩja pixi tã kamã tanhmã mẽ pakute xàja ohtôô. Tã Kris nhĩja te kot mẽ panhĩja pyræk. Uræk nẽ kamã mẽ paxohtôô. Jakamã na pu htem ahpyñhã tanhmã kãm amnhĩ nhĩpêx to ho ri papa. Karõ kot tanhmã amnhĩ kaxyw mẽ panhĩpêx to xà hkôt.

15 Nẽ kop ãm mẽ pahparja kapêr ronhỹx tee ri mẽ panhĩhkra pumu nẽ amnhĩ mã:

—Hêxta waa nẽ. Kêp ãm ixpê mẽ ãhkra ronhỹx pa inhmex nẽ ijarir. No ãm ixpê mẽ hpar pix jakamã pêr ãm mẽ hkĩnhã ixpê mẽ hkwy hkêt ãm ixpê mẽ hatur xà pix na pa.

Anhỹr o amnhĩ jarênh japêr. Nom ja kot anhỹr kêt. Axtem nhỹhỹm kot mẽ pahto pa kaxyw na mẽ pahparja. Nẽ axtem mẽmoj tã mẽ paxapênh rỹ mẽmoj jamỹnh kaxyw na mẽ panhĩhkraja. Na pu htem hamẽ wa ho presija rãhã ho papa. Ja pyrã nẽ kot puj mẽ pahkwýjê hõ mẽ parom Tirtũm Karõ nhỹ hã mẽmoj tã apênh tỹx ã omu nẽ hkĩnhã mẽ pahte amnhĩ to warê hkêt ã amnhĩ jarênh o papa hkêt nẽ.

16 Nẽ mẽ pajamakja kapêr ronhỹx kapêr o:

—Hêxta waa nẽ. Kêp apu ixpê mẽ no ronhỹx pa inhmex nẽ ijarir. No ãm ixpê mẽ umar xà pix jakamã pêr ãm ixte ho warê hkêt kumrêx.

Anhỹr o amnhĩ jarênh japêr. Nom ja kot anhỹr kêt. Hamẽ wa mex kênã. Axtem ho mẽ paxumar kaxyw na mẽ pajamakja. Nẽ axtem ho mẽ parit kaxyw na mẽ panoja.

17 Kêp ãm mẽ pano pix ronhỹx pu mẽ parĩt pix nẽ paxumar kêt nẽ ri papa. Rỳ kêp ãm pajamak pix ronhỹx pu mẽ paxumar pix nẽ parĩt kêt nẽ mẽ paxupâr kêt nẽ ri papa.

18 Mẽ panhĩja pixi htã kamã hikukrêx xohtôô. Na pre Tĩrtũm amnhĩ krã hkôt kamã mẽmoj piitã hipêx nẽ hanhô.

19 Kêp ãm mẽ panhĩja kamã ãm mẽmoj pixi ronhỹx pu mẽ pamex kêt nẽ papa.

20 Tã no ãm kot anhỹr kêt. Mẽ panhĩja ãm pixi htã kamã hikukrêx xohtôô.

21 Jakamã na hte mẽ panoja amnhĩ nẽ mẽ panhĩhkra mã kãm:

—Tk kwa ma tẽ. Ixte ato presijare hã.

Anhỹr o kãm kapêr kêt nẽ. Rỳ mẽ pahkrãja amnhĩ nẽ mẽ pahpar mã kãm:

—Tk kwa ma tẽ. Na pa ato presija hkêt nẽ.

Anhỹr o kãm kapêr kêt nẽ. Ja pyrã nẽ kot puj mẽ nhỹri Kris kôt panhĩõ pumu nẽ pamex o pahte hakrenh ã amnhĩ jarênh kêt nẽ.

22 Nẽ mẽ panhĩ kamã mẽmoj kwỳ te hirerek pyrãk tã no pu mẽ arĩ pamã hapê nẽ. Ja pyrã nẽ kêr pu mẽ kormã mẽ kot Kris kôt amnhĩ xunhwỳr tohtuj anhỹr xwỳnhjaja pu mẽ pamã mẽ hkĩnh kãm tanhmã mẽ kutã panojarêt to ho ri papa.

23-24 Nẽ na pu htem mẽ panhĩ kamã mẽ pakukrêx kwỳ hã pahpijaàm nẽ hpro nẽ ri ho papa. Nẽ hkwỳ hã pahpijaàm kêt nẽ hpro hkêt nẽ ho ri papa. Nẽ hkwỳ mẽ pahpê omnajti htã pu mẽ ho mex nẽ ri ho papa. Tĩrtũm kot ã mẽ panhĩpêx anhỹr jakamã na pu htem mẽ pakamã mẽ pakukrêx kwỳ mẽ pahpê omnajti htã pu mẽ ho mex nẽ ri ho papa. Ja pyrã nẽ kêr pu mẽ Tĩrtũm

kôt mẽ pahtõ nẽ mẽ pahtõx piitã ho mex o ri papa. Nẽ tãm mẽ hipêx. Mẽ pahkwỳjaja muxre nẽ mẽ pahkwỳjaja omnajti htãã. Tanhmã mẽ kute htã pu mẽ kêp mẽ Jejus kôt mẽ pahtõ nẽ mẽ pahtõx ã mẽ ho mex o ri apa.

²⁵ Nẽ na hte mẽ panhĩ kamã mẽ pahpar nẽ mẽ panhĩhkra nẽ piitã axpẽn kôt àpênh mex o pa. No na hte mẽ pahparja nhỹhỹm ma mra nhũm ihõja hkwỳm nhỹhỹm ma mrar kêt nẽ. Na hte wa axpẽn kôt àpênh mex o pa. Ja pyrã nẽ kêr pu mẽ pahpê Tĩrtũm krajaja axpẽn kôt amnhĩ nhĩpêx rãhã ho ri papa. Nẽ axpẽn to mex rãhã ho ri papa. No ri axpẽn kwỳm ri tanhmã amnhĩ nhĩpêx to ho ri papa hkêt nẽ.

²⁶ Na pu htem tõhã nhỹhỹnh panhĩ kamã paxà nẽ ri papa. Pahkrã tãtãk rỳ pakatut gêk. Jao te mẽ panhĩ piitã kamã mẽ paxà pyrãk. Nẽ nhỹhỹnh akupỹm pamex nẽ te panhĩ piitã hkôt akupỹm pamex pyrãk. Ja pyrã nẽ koja Kris kôt panhĩõ nhỹhỹnh à nẽ ri pa. Rỳ tanhmã amnhĩ to nẽ ra hkaprĩ nẽ ri pa pu mẽ ja hã omu nẽ ÿ hã pahkaprĩ nẽ papa. No koja mẽmoj tã hkĩnh nẽ pa pu mẽ ja hã omu nẽ ÿ hã pahkĩnh nẽ papa.

Te mẽ pahpê Kris nhĩ pixi pyrãk ã mẽ pa jarênh

²⁷ Nẽ mẽ pahpê Kris kwỳjaja te mẽ pahpê Kris nhĩ pixi pyrãk. Ahpỹnhã mẽ pahte tanhmã amnhĩ nhĩpêx to ho papa htã mẽ pahpê Kris kwỳ jakamã te mẽ pahpê ì pixi pyrãk.

²⁸ Nẽ mẽ pahte Kris kôt tanhmã pahkwỳjê ho ajuta hto ho papa kaxyw na pre Kris ahpỹnhã tanhmã mẽ paxunhwỳr to.

Mě pahkwỳjaja mẽ pahte ỹ hã nhãm mẽ kãm kapěr jarēnh o papa kaxyw mẽ paxunhwỳ.

Ně mẽ pahkwỳjaja mẽ pahte ỹ hã tanhmã kapěr jarēnh to ho ri papa kaxyw mẽ paxunhwỳ.

Ně mẽ pahkwỳjaja Tĩrtũm kapěr jarēnh o mẽ ahkre ho ri mẽ papa kaxyw mẽ paxunhwỳ.

Ně mẽ pahkwỳjaja mẽ pahte aa mẽ kot mẽmoj pumunh kêt kwỳ ho anhỹr o ri papa kaxyw mẽ pa xunhwỳ.

Ně mẽ pahkwỳjaja akupỹm mẽ à xwỳnhjê ho mex o mẽ papa kaxyw mẽ pa xunhwỳ.

Ně mẽ pahkwỳjaja mẽ kapěr o mẽ hihtỳx o mẽ papa kaxyw mẽ pa xunhwỳ.

Ně mẽ pahkwỳjaja mẽ pahte tanhmã mẽ ho ajuta ho ho ri papa kaxyw mẽ pa xunhwỳ.

Ně mẽ pahkwỳjaja nhãm mẽ kapěr õ ho mẽ pakapěr o mẽ papa kaxyw mẽ pa xunhwỳ.

Ã na pre ahpỹnhã mẽ pahpê hkwỳjê piitã mẽ paxunhwỳr anẽ.

²⁹ No na pu htem pahpiitã axpẽn kôt Tĩrtũm kapěr o mẽ ahkre ho ri papa hkêt nẽ.

Ně mẽ pahpiitã ỹ hã tanhmã pakapěr to ho ri papa hkêt nẽ.

Ně mẽ pahpiitã kapěr jarēnh o ri papa hkêt nẽ.

Ně mẽ pahpiitã aa mẽ kot mẽmoj pumunh kêt kwỳ ho anhỹr o ri papa hkêt nẽ.

³⁰ Ně mẽ pahpiitã akupỹm mẽ à xwỳnhjê ho mex o ri papa hkêt nẽ.

Ně mẽ pahpiitã mẽ kapěr õ ho ri pakapěr o ri papa hkêt nẽ.

Ně mẽ pahpiitã ri mẽ kapěrja ma nẽ pakapěr kãm pahkwỳjê mã harēnh o ri papa hkêt nẽ.

Na pu htem ahpÿnhã tanhmã Kris kôt mẽ pahkwÿjê ho ajuta hto ho ri papa.

³¹ Tã kêr pu mẽ pahpiitã pamã axpën kÿnh pê tanhmã axpën to mex to ho ri papa. Ja na mex o kot mẽmoj piitã hakrenh par. E kot paj ixprÿ hã tanhmã mẽ amã ja jarënh to ka mẽ inhma.

13

Mẽ pahte axpën kamã paxukaprÿ ho papa hã mẽ pamã karõ

Juãw 13.31-35; Karatas 5.13-15; Korosê 3.12-14

¹ Kot pa ma mẽ piitã ahpÿnhã mẽ kapër kãm mẽ kãm Tÿrtũm kapër jarënh o ri ixpa japêr. Âm mẽ piitã mẽ kapër o ixkapër mex o mẽ kãm harënh o ri ixpa japêr. Nê Tÿrtũm kapër o mẽ wrÿk xwÿnhjê kapër o mẽ ahkre ho ri ixkwÿjê hkôt ixpa japêr. Tã inhmã mẽ hkÿnh kêt kãm ixte mẽ ahkre ho ri ixpa ronhÿx mẽ inhma nê âm inhma. Nhũm ixkapërja te ixte rat tatak pyræk o pa tee ri Tÿrtũm kapër o mẽ ahkre kaprÿ ho ri mẽ hkôt ixpa nhũm Tÿrtũm tee ri inhmã mẽ hkÿnh kêt ã ixpumu nê inhmã:

—Nà amã mẽ hkÿnh kêt jakamã na ka tee ri ixkapër o mẽ ahkre kaprÿ. Anê.

² Rÿ kot paj Tÿrtũm xàhpumunh tÿx o mẽ kãm kapër pimxur kwÿ jarënh o ri ixpa japêr. Rÿ Tÿrtũm mẽ kurom inhmã mẽmoj to amnhÿrÿt pa omu nê mẽ kãm harënh o ri ixpa japêr. Rÿ pa Tÿrtũm kot amnhÿ nhÿpêx piitã omunh par japêr. Rÿ ixte amnhÿ kaxyw hkôt ijamaxpër tÿx kôt ÿ hã kën krã hprêk õ mã ixkapër nhũm kot inhmar nê inhmar xà hkôt nhãm pikamënh japêr. Tã inhmã ixkwÿjê

hkĩnh kêt kãm ã amnhĩ nhĩpêx anê nhũm Tĩrtũm tee ri ja hã ixpumu nê inhmã:

—Nà amã mẽ hkĩnh kêt jakamã te axàhpumunh tỳx kêt kumrêx pyràk. Na ka tee ri ã mẽ kãm ixkapêr jarênh anhỹr o ri apa kaprỳ. Anê.

³ Rỳ pa mẽ kêp amrakati xwỳnhjê mã ixkukrêx nhõr par japêr. Rỳ Kris ã mẽ kãm amnhĩ grõnh kõt mẽ kãm xa nhũm mẽ hã ixpĩr japêr. Tã inhmã mẽ hkĩnh kêt kãm ã amnhĩ nhĩpêx anê nhũm Tĩrtũm tee ri ja hã ixpumu nê inhmã:

—Nà ã ate mẽ kãm amnhĩ nhĩpêx anhỹr o ri apa htã amã mẽ hkĩnh kêt jakamã na ka tee ri ã mẽ kãm amnhĩ nhĩpêx anhỹr kaprỳ. Anê.

⁴ Kot puj mẽ pamã axpên kĩnh hã kot puj mẽ kritpêm mẽ piitã mẽ kãm pahprĩ ho papa.

Jao axpên kãm pagryk tokyx anhỹr kêt nê.

Nê pamã axpên to mex pix prãm.

Nê mẽmoj tã axpên kamã pagryk kurê kumrêx kêt nê.

Nê mẽmoj tã amnhĩ to jarkrar o ri papa hkêt nê.

Kot puj mẽ pamã axpên kĩnh hã kot puj mẽ ã amnhĩ nhĩpêx anhỹr o ri papa hkêt nê.

⁵ Nê kot puj mẽ axpên kamã paxukaprĩ ho papa hã kot puj mẽ tãm axpên nhĩpêx rãhã ho papa. Jao amnhĩ pix kukamã pajamaxpêr o ri papa hkêt nê. Nê mẽ pagryk tokyx anhỹr kêt nê. Rỳ axpên kãm pagryk tokyx anhỹr hkêt nê. Rỳ koja mẽhõ tanhmã mẽ panhĩpêx kati hto pu mẽ ãm amnhĩ tã omu nê axte kot tanhmã mẽ panhĩpêx tota mã pajamaxpêr kêt nê.

⁶ Nê kot puj mẽ pamã axpên kĩnh o papa hã kot puj mẽ tee ri mẽhõ kot tanhmã amnhĩ tomnuj to

hã omu nẽ pahkaprĩ nẽ. Rỳ tanhmã kot amnhĩ to mex to hã omu nẽ pahkĩnh nẽ.

⁷ Nẽ kot puj mẽ pamã axpẽn kĩnh o papa hã kot puj mẽ arĩ Tirtũm kot mẽ pahto mex par jatur xà mẽn hã arĩgro jamãr rãhã ho ri papa. Nẽ mẽ kot Kris ã tanhmã mẽ pahto htã pu mẽ tee ri amnhĩ kukamã tanhmã pajamaxpěr to hkêt nẽ. ãm mẽ kutã amnhĩ to htỳx nẽ mẽ kãm pakuhê nẽ arĩ amnhĩ kaxyw Tirtũm mã pajamaxpěr tỳx rãhã nẽ.

⁸ Nẽ kot puj mẽ pamã axpẽn kĩnh o papa hãmri nẽ aa mẽ pahte ã amnhĩ nhĩpêx anhỹrja mã panhũrer kêt nẽ. Nẽ arĩ mẽ pamã axpẽn kĩnh rãhã ho papa ho papa. Jar pika ja kamã mẽ pahte Tirtũm nhỹ hã mẽ kãm kapěr jarẽnh o ri papa htã kot puj mẽ nhỹrmã ma õ krĩ hwỳr api hãmri nẽ kuri axte ã kãm amnhĩ nhĩpêx anhỹr kêt nẽ. Mo kaxyw kot puj mẽ axte ri mẽhõ mã kapěr jarẽ? Kot puj mẽ õ krĩ hwỳr api nẽ ra mẽ pahpiitã paxàhpumunh o axpẽn pyrãk.

Nẽ na pu htem tũhã mẽ kapěr õ ho pakapěr o ri papa. Nom kot puj mẽ nhỹrmã Tirtũm nhõ krĩ hwỳr api hãmri nẽ kuri axte nhãm ri mẽ kapěr o pakapěr kêt nẽ.

Nẽ na pu htem jar mẽ pahkwỳjaja mẽ paxàhpumunh mex kôt Tirtũm kapěr jarẽnh o ri papa. Tã kot puj mẽ nhỹrmã õ krĩ hwỳr api hãmri nẽ axte ã amnhĩ nhĩpêx anhỹr kêt nẽ. ãm mẽ pamã axpẽn kĩnh pixja kot puj mẽ arĩ õ krĩ kamã mẽ pamã axpẽn kĩnh tũm rãhã papa ho papa.

⁹ Jar mẽ pahpiitã mẽ paxàhpumunh tohtuj anhỹr o pakapěr jakamã na pu htem kormã Tirtũm kapěr jarẽnh tohtuj anhỹr o ri papa.

10 Tã kot puj mẽ nhỹrmã õ krĩ hwỳr api nẽ kuri paxàhpumunh jatur xàm mẽnh pa. Jakamã nhũm jar mẽ paxàhpumunh tohtuj anhỹr xwỳnhta mẽ pahpê hapêx.

11 E pa mẽ amã ja hã ejêp jarẽ ka mẽ inhma. Nà amnepê mã ixprĩre ri na pa pre ixtỳx ri mẽhprĩjê kot amnhĩ nhĩpêx o amnhĩ nhĩpêx nẽ mẽ hamaxpêr o ijamaxpêr. Nẽ mẽ kapêr mex kêt o ixkapêr o ri ixpa. Tã ra ixàptàr hãmri nẽ mẽ àptàrjê jamaxpêr o ijamaxpêr o ri ixpa. Te ra mẽ pahte kaxkwa kamã mẽ paxàhpumunh jatur xàm mẽnh parta pyràk mẽ aptàrjê jamaxpêr o ijamaxpêr o ri ixpa.

12 Ja pyrà nẽ na pu htem kormã Tĩrtũm kot amnhĩ nhĩpêx ã omunh tohtuj anhỹr. Te mẽ pahte amnhĩ pumunh xà pynajre kamã pahprĩ hã amnhĩ pumunh mex kêêta pyràk. Nom kot puj mẽ nhỹrmã õ krĩ hwỳr api hãmri nẽ pahprĩ hã paxàhpumunh jatur xàm kumẽ. Te Tĩrtũm kot hprĩ hã tanhmã mẽ pakute hã mẽ pahpumunh parja pyràk.

13 E arĩ mẽ pahte Tĩrtũm kôt amnhĩ nhĩpêx o papa xàja na axkrunêpxi. Mẽ pahte hkôt amnhĩ nhĩpêx o papa rãhã ho papa kaxyw. Wamta na ja: Kêr pu mẽ arĩ amnhĩ kaxyw Tĩrtũm mã pajamaxpêr mex rãhã ho ri papa. Nẽ hkôt ja: Kêr pu mẽ arĩ Tĩrtũm kot mẽ pahto mex par jatur xà mẽnh xà hã arĩgro jamâr rãhã ho papa. Nẽ hkôt ja: Kêr pu mẽ arĩ pamã axpên kĩnh pê tanhmã axpên to mex to rãhã ho papa. Ja na mex o kot wamta wa hakrenh. E kêr pu mẽ ã amnhĩ nhĩpêx anhỹr rãhã ho ri papa.

14

Tĩrtũm Karõ kot mẽ pahto mẽ paxihtỳx ã harẽnh Wam Korît 12.7-11, 12.27-31

¹ E kêr ka mẽ arĩ amã axpẽn kĩnh pê axpẽn to mex rãhã ho ri apa nẽ aa jam anhũrer nẽ ho ajamakêtkati hkêt nẽ. Nẽ amnhĩ to Tĩrtũm Karõ mãn amnhĩ to awỳ kê mẽ amã tanhmã mẽ ajamaxpěr to ka mẽ ahpỳnhã tanhmã axpẽn to mex to ho ri axpẽn kôt apa. Nẽ kêr ka mẽ ã ajamaxpěr anẽ nẽ ajamaxpěr o:

—Inhmã mẽ hkĩnh o ri ixpa hprãm tỳx. Nẽ Tĩrtũm Karõ kot tanhmã ixto nhũm ixte ahpỳnhã tanhmã mẽ ho ajuta hto ho ixpaja pa mããnẽn inhmã ho anhỹr prãm. Nẽ kot tanhmã ijakwa hto nhũm ixte ahpỳnhã mẽ kapěr õ ho ixkapěrja pa mããnẽn inhmã ho anhỹr hprãm. No kêt ixte Tĩrtũm nhỹ hã mẽ kãm kapěr jarẽnhja na inhmã ho anhỹr prãm tỳx kumrẽx. Anẽ.

²⁻⁴ Mẽ pakamã mẽ kapěr õ ho Tĩrtũm mã kapěr xwỳnhjaja na htem Tĩrtũm Karõ nhỹ hã ãm kumã pix mã kapěr õta o kãm kapěr nhũm tapxipix mẽ kuma. No mẽ papajaja na pu htem tee ri mar o pahkrĩ nom mar kêt nẽ. ãm kapěr xwỳnhhta pix koja mẽ pakurom amnhĩ ma. Nom koja mẽ pakapěr kãm Tĩrtũm mã amnhĩ jarẽ pu mẽ mar mex nẽ. Nhũm mẽ pakapěr kãm Tĩrtũm nhỹ hã mẽ pamã kapěr jarẽ pu mẽ pahprĩ hã kuma. Jao mẽ pamã kapěr kôt amnhĩ nhĩpêx prãm nẽ. Nẽ mẽmoj tã pahkaprĩ nẽ ri papa htã mẽ kuma nẽ amnhĩ kaxwỳnh kãm amnhĩ to paxihtỳx.

⁵ Mẽ apiitã mẽ ate nhãm mẽ kapěr õ ho Tĩrtũm mã amnhĩ jarẽnhja na mex. Nom mẽ ate mẽ akapěr

o mẽ akwỳjê mã Tĩrtũm kapěr jarėnh o ri mẽ apaja na mex o wamta jakre. Kot ka mẽ nhãm mẽ kapěr õ ho Tĩrtũm mã amnhĩ jarė nhũm mẽ akwỳjaja mẽ amar kėt jakamã ka mẽ ã akapěr anhỹrja o Kris kôt mẽ ho mẽ hamaxpěr o hihtỳx kėt nẽ. ãm kapxpix amnhĩ ma. Rỳ koja kapěr õja mar mex xwỳnhjê hõ amar japěr nẽ mẽ akapěr kãm akwỳjê mã harẽ. Hã koja ja mex nẽ. Nom kot kaj mẽ apiitã ma mẽ kapěr kãm mẽ kãm Tĩrtũm kapěr jarėnh o ri apa nhũm mẽ piitã hprĩ hã amar mex nẽ. Nẽ amar xà hkôt Tĩrtũm kapěr kôt amnhĩ nhĩpêx mex nẽ.

⁶ Jakamã e Kris kôt ixtõ nẽ ixtõxjaja. Kot paj apu nhỹrmã ma mẽ awỳr mõ hãmri nẽ nhãm mẽ kapěr õ ho mẽ amã ixkapěr japěr ka mẽ inhmar kėt nẽ. Nom kot paj mẽ akapěr o mẽ amã ixkapěr ka mẽ apiitã aprĩ hã inhmar mex nẽ. Pa Tĩrtũm nhỹ hã mẽ amã mẽmoj jarė rỳ tanhmã kot amnhĩ nhĩpêx toja pa mẽ amã harẽ. Rỳ Karõ nhỹ hã mẽ amã mẽmoj jarėnh o ã mẽ amã Tĩrtũm kapěr jarėnh anẽ ka mẽ aprĩ hã inhmar mex nẽ.

⁷ Nom mẽ kapěr õ ho mẽ kapěr o mẽ akôt ri mẽ pa xwỳnhjaja te mẽhõ kot htỳx ri wiorãwti kakrėnh xwỳnh pyræk. Koja htỳx ri hkakrėnh o xa nhũm mẽ tee ri kot grer mar mã. Rỳ nhũm mẽhõ htỳx ri pifti kakôr o xa nhũm mẽ tee ri mẽmo mẽ grer mar mã.

⁸ Pôristijaja na htem amarĩ ri tanhmã amnhĩ nhĩpêx to ho pa nhũm mẽ hkrãhtũmja mẽ kãm pifti kakô nhũm mẽ kuma nẽ mẽ pijapu mã hamaxpěr kurê kumrėx nẽ hwỳr hprõt. Nom koja kawax pê hkakô rỳ htỳx ri tanhmã hkakôr to nhũm mẽ kuma nẽ ãm kuma.

⁹ Ja pyrà nẽ kot kaj mẽ kapěr õ ho akwỳjê mã akapěr nhũm mẽ ama nẽ ãm mẽ ama. Ka te ãm mẽ

kãm ajakwa momok pyræk o axãm o amnhĩ nhĩpêx.

¹⁰ Nê ahpÿnhã mẽ pakapêr xohtôô. Na htem ahpÿnhã mẽ kapêr o amnhĩ kwÿjê mã kapêr nê xppên mar mex nê.

¹¹ Nom koja mēhō nhÿhÿnh pika hō rŭm ixwÿr mō nē mẽ kapêr o inhmã kapêr pa mar kêt nê. Nê amnhĩ xwar kutã ixkapêr o kãm ixkapêr nhŭm ixpyrà nê inhmar kêt nê.

¹² Jakamã kot kaj mẽ amã Tĩrtũm Karō xihtÿx xà ho amã tanhmã kãm amnhĩ nhĩpêx to ho apa hprãm hã kot kaj mẽ amnhĩ to awÿ nê kãm:

—Kwa amnhĩ kôt ijamaxpêr o axihtÿx Tĩrtũm. Pa anhÿ hã ixkapêr o ma Kris kôt ixkwÿjê ho mẽ hamaxpêr o ixihtÿx o ri mẽ hkôt ixpa. Kê mẽ akapêr ma nê Kris kôt amnhĩ xunhwÿr tÿx nê. Nê hkôt amnhĩ nhĩpêx mex o ri pa. Anê.

¹³ Nê kêr ka mẽ nhãm mẽ kapêr ô ho Tĩrtũm mã amnhĩ jarênh xwÿnhjaja amnhĩ to Tĩrtũm Karō wÿ nê kãm:

—Ixte mẽ kapêr ô ho ixkapêr tã ixte amnhĩ mar kêt. Jakamã kwa tanhmã ixto ijamaxpêr mex to pa amnhĩ mar mex nê ixkapêr kãm ixprĩ hã Kris kôt ixkwÿjê mã ja jarê kê mẽ inhmar tÿx nê. Anê.

¹⁴ Nom kot paj nhãm mẽ kapêr ô ho Tĩrtũm mã mex ã harênh tã amnhĩ mar kêt nê. Te xipimtir kãm ixkarō pix kapêr pyræk. No kot paj pam amnhĩ krã hkôt ixkapêr o kãm mex ã harê hãmri nê ra amnhĩ mar mex nê.

¹⁵ Nà ja na inhmã mex jakamã kot paj nhãm mẽ kapêr ô ho Tĩrtũm mã mex ã harê nê kãm gre. Nê mãânên ijamaxpêr xà hkôt ixkapêr o mãânên kãm mex ã harê nê kãm gre. Nà ja na inhmã mex.

¹⁶ Nom kot puj mẽ ma mẽ kot Tĩrtũm kapěr mar xà hã ixkre hwỳr mra nẽ kamã Tĩrtũm mã mex ã harẽ. Tã pa nhãm mẽ kapěr õ ho kãm ixkapěr japêr. Ka mẽ ate inhmar o akrĩ xwỳnhjaja tee ri inhma. Jakamã tee ri inhma nẽ ixkõt Tĩrtũm mã akapěr kêt nẽ. Rỳ kãm:

—Nà ãm hãmri na ã amex ã ajarẽnh anẽ Tĩrtũm.

Anhỳr o kãm akapěr kêt nẽ. Mẽ ate inhmaare hã kot ka mẽ ã kãm akapěr anẽ. Jakamã kot paj ri mẽ akamã mẽ kapěr õ ho ixkapěr kêt nẽ. ãm mẽ akapěr pix o mẽ anom Tĩrtũm mã mex ã harẽ.

¹⁷ Kot paj mẽ kapěr õ ho Tĩrtũm mã mex o mex ã harẽnh mex tã ka mẽ mẽmo mẽ kapěrja aprĩ hã mar kêt jakamã inhmar pẽ Tĩrtũm kõt amnhĩ xunhwỳr tỳx kêt nẽ.

¹⁸ Na pa hte tõhã mẽ arom nhãm mẽ kapěr õ ho Tĩrtũm mã amnhĩ jarẽ. Nom nhỹri ahte nhỹ nẽ ã kãm amnhĩ jarẽnh anẽ. ãm hãmri na pre Tĩrtũm ja kaxyw tanhmã ixto pa hte ã amnhĩ nhĩpêx anhỳr o ri ixpa.

¹⁹ Tã na pu htem Tĩrtũm mã mex o mex ã harẽnh kaxyw nẽ ma mẽ kot kãm amnhĩ jarẽnh xà hã ixkreta wỳr axpẽn wỳr mra pa mẽ pikuprõnh xwỳnhjê kapěr o mẽ kãm ixkapěr. Nom kot paj nhãm mẽ kapěr õ ho mẽ kãm ixkapěr ry rax kumrêx tã no nhũm mẽ inhmar kêt nẽ. Nom kot paj mẽ kapěr o ãm ixkapěr krãnre htã no nhũm mẽ inhmar mex kurê kumrêx. Ja na inhmã mex.

²⁰ Kwa mẽ ixkapěr ma nẽ mar tỳx nẽ. Nẽ mẽhprĩrejê jamaxpěr o ajamaxpěr kêt nẽ. ãm Kris kõt mẽ àptàr tũmjê jamaxpěr o mãn kêt mẽ ajamaxpěr o ri apa. ãm mẽmoj pixire hkõt kot kaj

mě ãm hãmri te mēhprījē jamaxpěr pyràk o ajamaxpěr. Mēhprījaja na htem mēmoj punuj kukamã hamaxpěr kêt nē. Na htem ãm htýx pa. Tã kêt ka mē uràk nē mēmoj punuj kukamã ajamaxpěr o ri apa hkêt nē.

²¹ Amnepēm na pre Tĩrtũm tanhmã Ijaewjē mã kapěr to. Mē kapěr o mē kãm kapěr tã no nhũm mē kuma nē ãm kuma. Jakamã nhũm tee ri ja hã mē omu nē amnhĩ tã tanhmã mē harēnh to. Tanhmã mē harēnh toja Tĩrtũm kapěr ã kagà htũm kamã na. Kot mē harēnh kot:

E kot paj ma mē hwỳr axtem pika hõ rũm pōristi hkwȳ rē kē mē ma mē hwỳr mra nē mē unē. Hãmri nē amnhĩ kapěr o mē kãm kapěr nhũm mē tee ri mē kuma no ãm hkôt mēmoj pumunh kêt nē.

Koja mē ã mē hipêx anhỳr tã nhũm mē arĩ kãm ixkapěr mar nē amnhĩ kaxyw ixkôt hamaxpěr prãm kêt nē. Anē.

Tĩrtũm kapěr ã kagà htũm kot ã mē harēnh kot anhỳr.

²² Jakamã kot kaj mē Tĩrtũm mã amnhĩ jarēnh xà hã ixkre hwỳr akuprō nē mē kapěr õ ho Tĩrtũm mã amnhĩ jarēnh japēr. Nhũm Kris kôt amnhĩ xunhwỳr kêt xwỳnhjaja mē akôt agjē nē hkrĩ nē tee ri mē akapěr ma nē Kris kôt amnhĩ xunhwỳr kêt nē. Tanhmã kot mē amnhĩ to nē hkôt amnhĩ xunhwỳ? Mē kot akapērta maare hã. No kot ka mē akapěr o Tĩrtũm nhỹ hã mē kãm akapěr nhũm mēhprĩ hã amar mex nē. Jao tanhmã hamaxpěr to nē mē apyrà nē Kris kôt amnhĩ xunhwỳr japēr.

²³ Nom kot ka mē apiitã nhãm mē kapěr õ ho Tĩrtũm mã mex ã harē nhũm amarĩ ri mē pa

xwÿnhjaja mẽ awÿr agjê nê mẽ akapêr ã mẽ ama nê hã mẽ apumu. Hãmri nê tee ri hamaxpêr nê mẽ akrã pipãnh ã axpên mã mẽ ajarê.

²⁴ Nom koja mẽ awÿr agjê ka mẽ akatàt kôt mẽ amnhĩ kapêr o Tĩrtũm kapêr jarênh o akuhê nhũm mēhpri hã mẽ amar mex nê. Hãmri nê amnhĩ kapêr o akapêr ma nê hamaxpêr o:

—Hêxta waa nê. Xep ixte amnhĩ tomnuj xwÿnh na pa. Nà ãm hãmri na mẽ Tĩrtũm kapêr jarê. Nà ãm hãmri na kêt ja. Anê.

²⁵ Hãmri nê mẽ amã tanhmã kot amnhĩ tomnuj to hã amnhĩ jarênh pa hãmri nê hkaga nê Jejus kôt amnhĩ xunhwÿ. Nê hkõnkrã ho htêm nê hkrĩ nê Tĩrtũm mã mex o mex ã harê. Hãmri nê mẽ amã:

—Nà ãm hãmri na hte Tĩrtũm mẽ akamã pa ho pa. Anê.

Tĩrtũm nhõrkwÿ kamã mẽ pahte tanhmã amnhĩ nhĩpêx to hã mẽ pamã karõ

Atre 2.42, 5.12-13; Eprêw 10.25

²⁶ E Jejus kôt ixkwÿjaja. Kot paj hpãnhã axtem mẽ amã mẽmoj tã karõ. Mẽ kot Tĩrtũm mã amnhĩ jarênh xà hã ixkre kamã tanhmã mẽ ate amnhĩ nhĩpêx to hã karõ ka mẽ inhma.

Nà kêt ka mẽ axpên wÿr akuprõ nê akrĩ ka mẽ atõ amã Tĩrtũm mã mex ã harênh ã mẽ grer o agrer prãm hãmri nê mãmri kãm ho gre. Hãmri nê agrer pa kê apãnhã mēhõ kànhmã xa nê Tĩrtũm kapêr kwÿ ho mẽ ajahkre. Nê ho anhÿr pa nhũm hpãnhã mēhõ kànhmã xa nê Tĩrtũm kot tanhmã ho mex to hã mẽ amã amnhĩ jarê. Nê amnhĩ jarênh pa hãmri nhũm mēhõ nhãm mẽ kapêr õ ho mẽ amã ujarênh japêr. Hãmri nê ujarênh pa kê mēhõ hpãnhã mẽ akapêr o hpri hã mẽ amã kapêrta jarê.

E kêr ka mẽ axpẽn wỳr akuprõ nẽ Kris kôt axpẽn to axihtỳx kaxyw ã axpẽn pãnhã amnhĩ nhĩpêx anẽ.

²⁷ Nẽ ka mẽ atõ amã nhãm mẽ kapêr õ ho mẽ kãm akapêr prãm japêr. Nom kêr ka mẽ axohtõ nẽ ã mẽ kãm amnhĩ nhĩpêx anhỳr kêt nẽ. ãm mẽ atõ wa axkrutre rỳ axkrunêpxire nẽ mẽ kapêr õ ho mẽ kãm akapêr. Hãmri nẽ axpẽn pãnhã akapêr pa kê mẽhõ kot hprĩ hã mẽ kapêr õta mar japêr nẽ mẽ apãnhã xa nẽ mẽ akapêr o mẽ kãm harẽ kê mẽhprĩ hã mar mex nẽ.

²⁸ Nom koja ja kaxyw mẽhõ amrakati japêr ka mẽ kapêr õ ho akapêr kêt nẽ. ãm kapxipix nhỹri ahte Tĩrtũm mã akapêr.

²⁹ Nẽ kê Tĩrtũm nhỹ hã kapêr jarênh xwỳnhjê hõ wa axkrut rỳ axkrunêpxi nẽ mẽ ajahkre ka mẽ aprĩ hã mar o akrĩ. Hãmri nẽ mar pa nẽ tanhmã mẽ harênh to. ãm hãmri Tĩrtũm nhỹ hã kapêr ã mẽ harẽ rỳ ho hêx ã mẽ harẽ.

³⁰ Nẽ koja mẽhõ Tĩrtũm nhỹ hã mẽmoj jarênh o xa. Rôm nhũm Tĩrtũm mẽ kaxyw mẽ atõ mã ajamaxpêr kwỳ gõ. Ka kapêr o ãm xwỳnhta mã kànhmã anhĩhkra pẽ kê apumu nẽ anhĩkrê. Hãmri ka hpãnhã xa nẽ mẽ kãm tanhmã ajamaxpêr tota jarẽ.

³¹ Nom kêr ka mẽ anhĩpê mẽ kãm akapêr hkêt nẽ. ãm axpẽn pãnhã Tĩrtũm kapêr o axpẽn jahkre nẽ ho axpẽn jamaxpêr o axihtỳx. Ja mex.

³²⁻³⁴ Nom kêr ka mẽ axpẽn wỳr akuprõ nẽ apiitã anhĩpê atỳx ri akapêr kêt nẽ. Ja na Tĩrtũm kêp hprãm nõkati. Mẽ ate axpẽn pãnhã axpẽn mã akapêrja na kãm hprãm. Jakamã kê mẽ kot Tĩrtũm

nhỹ hã mẽ kapêr jarênh o pa xwỳnhjaja taxy axpên jahkre hã axpên jamã. Nhũm mēhō kumrêx kapêr pa hãmri ka hpãnhã mẽ kãm akapêr.

Nê kê mēnijaja amarĩ mẽ ahkreja mar o hkrĩ. Ijaew kot amnhĩ nhĩpêx xà hkôt. Jakamã kwa mẽ anijaja. Kêr ka mẽ amarĩ akryk mẽ mar o akrĩ nê axpên mã akapêr o akrĩ hkêt nê.

³⁵ No kot kaj mẽ tee ri mẽmoj ma nê mar mex kêt japêr tã hã axpên kukjêr kêt nê. Âm akryk arĩ mar o akrĩ. Hãmri nê akupỹm anhōrkwỹ hwỳr tẽ nê rĩ kormã hã amjên kukja. Nom kot ka mẽ apikuprōnh xà hã ixkre kamã axpên mã akapêr o akrĩ nhũm mẽ amjênjaja tee ri ja hã mẽ apumu nê hpijaàm nê.

³⁶ E na pa ã Tĩrtũm mã amnhĩ jarênh xà hã ixkre kamã tanhmã mẽ pahte amnhĩ nhĩpêx to hã mẽ amã karō anê. Tã te mẽ apê ja mex kêt pyrak. Kwa mon ka wem ja ma nhũm mẽ apê omnuj nê? Xà mẽ ate Tĩrtũm kapêr mar mex o ijakrenh kôt na ka mẽ ã ajamaxpêr anê? Xà na pre Tĩrtũm mẽ akumrêx mã kapêr? Hã na ka mẽ ã ajamaxpêr anê? Rỳ xà mẽ kapxipix mã na pre kapêr? Hã na ka mẽ ixkapêr ma nhũm mẽ apê omnuj nê? Nà ixkumrêx na pa pre mẽ awỳr inhmōr nê mẽ amã Tĩrtũm kapêr jarênh kênã kot ka kêt mẽ axtem nê ã ajamaxpêr anê.

³⁷ Kot kaj mẽ atō ã ajamaxpêr anhỹr japêr nê ajamaxpêr o:

—Nà na pre Tĩrtũm tanhmã inhmã kapêr to pa ô ri mẽ kãm ixujarênh mex o ri ixpa.

Anhỹr o ajamaxpêr. Rỳ ajamaxpêr o:

—Nà na pre Tirtùm Karõ mẽ kaxyw tanhmã ixto pa ÿ hã tanhmã mẽ ho mex to ho ri ixpa.

Anhÿr o ajamaxpër. Kot kaj mẽ ã ajamaxpër anẽ hãmri nẽ mãânẽn pa ã ixte amnhĩ nhĩpêx anhÿr ã ixpumunh mex kurê kumrêx. Amnhĩ pyrà nẽ ixte Tirtùm nhÿ hã mẽ kãm ixkapër xwÿnh ã ixpumunh nẽ hã ijarẽn kurê kumrêx.

³⁸ Nom koja ja hã ijarẽn kêt ka mẽ ja hã omu hãmri nẽ tanhmã kot mẽ amã kapër toja ma nẽ ãm ama.

³⁹ E Kris kôt ixtõ nẽ ixtõxjaja. Kêr ka mẽ amnhĩ to Tirtùm Karõ wÿ kê ma mẽ ate mẽ kãm Tirtùm kapër jarẽn o ri apa kaxyw mẽ ato mẽ axihtÿx.

Nẽ koja mẽhõ kãm nhãm mẽ kapër õ ho kapër prãm ka mẽ ja nẽ kãm akapër kêt nẽ. Kwâr mãmrĩ ã amnhĩ nhĩpêx anẽ.

⁴⁰ Nom kêr ka mẽ ate Tirtùm mã amnhĩ jarẽn xà hã ixkre kamã axpẽn pãnhã axpẽn mã akapër nom anhĩpê kãm akapër hkêt nẽ.

15

Kris akupÿm htĩr kumrêx ã harẽn

Atre 2.23-36, 10.39-41; Wam Korît 6.14

¹ E Kris kôt ixkwÿjaja. Kot paj axte mẽ amã Jejus kot mẽ panê tanhmã amnhĩ nhĩpêx to hã harê ka mẽ inhma. Na pa pre ra mẽ amã ja jarê ka mẽ ama nẽ hkôt amnhĩ xunhwÿ. Nẽ hkôt amnhĩ nhĩpêx mex o ri apa.

² Na pa pre mẽ amã harê ka mẽ amnhĩ kaxyw kãm ajamaxpër tÿx nẽ nhũm Tirtùm mẽ ato hkra. Tã ka htem arĩ kapër kôt amnhĩ nhĩpêx mex o ri apa. Koja mẽhõ kot Tirtùm kapër mar tã amnhĩ

kaxyw hkôt hamaxpêr kêt nê nhũm Tĩrtũm tee ri amnhĩ tã omu nê ho hkra hkêt nê.

³ Na pa pre amnhĩ krã hkôt mẽ amã tanhmã Kris jarênh to hkêt nê. Ixte kapêr mar xà hkôt na pa hte amnhĩ xô ri mẽ amã tanhmã harênh to ho ri ixpa. Jejus jarênhja na mex o kot mẽ ujarênh piitã hakrenh par kumrêx. Tã tãm kot paj mẽ amã harê. Na pre Krisja mẽ pahte amnhĩ tomnuj pãnhã amnhĩrer kaxyw mẽ panê ty. Tĩrtũm kapêr ã kagà htũm kot hkukamã harênh xà hkôt.

⁴ Hãmri nhũm mẽ kên kre kamã haxà nhũm kamã nõr o apkati. Nê axte hã apkati. Hãmri nhũm Tĩrtũm akupỹm ho htĩr. Kapêr ã kagà htũm kot hkukamã harênh xà hkôt.

⁵ Tã nhũm Simãw Pêtre kumrêx akupỹm htĩr ã omu nhũm hpãnhã Jejus nhỹ hã mẽ ahkre ho mẽ pa xwỹnh maati jaja haxwỹja omu.

⁶ Hãmri nhũm mẽ kot hkôt mẽ pa xwỹnh pê 500 jakrenh xwỹnh piitã anhĩpê haxwỹja akupỹm htĩr kãm omu. Na pre ra mẽ hkwỹjaja ty nhũm mẽ hkwỹjaja arĩ htĩr nê pa.

⁷ Jakamã nhũm prem ra akupỹm htĩr kãm omu. Hãmri nhũm hpãnhã Xiakreja omu. Nhũm hpãnhã y hã mẽ ahkre o mẽ pa xwỹnh piitã omu. Akupỹm htĩr kãm omu.

⁸ Tã pa na pa pre ijaxwỹja amnhĩ to hapu nê akupỹm htĩr kãm omu. Te ixpê mẽ hkra kot hapu pyrà nê amnhĩ to hapu nê omu. Na pre kaxkwa kamã inhmã kapêr o xa pa ixprĩ hã omu.

⁹ No mẽ kot ixpyrà nê Kris nhỹ hã mẽ ahkre ho mẽ pa xwỹnh maati hkwỹjaja na mẽ mex o kot ijakrenh. Na pa pre hte mẽ hkĩnhã amnhĩ tomnuj tỳx nê. Jao Kris pê hkrajê homnuj tỳx o ri ixpa. Tã

hkôt amnhĩ xãm hãmri nẽ tee ri ã amnhĩ nhĩpêx anhÿr ã amnhĩ pumu nẽ amnhĩ kamã ixpijaàm tÿx nẽ. Jakamã na pa hte Kris nhÿ hã kapêr jarênh o ixpa hã amnhĩ pumu nẽ ixte hkôt amnhĩ xãm kêt ri tanhmã ixte amnhĩ nhĩpêx toja mã ijamexpêr nẽ ixpijaàm nẽ.

¹⁰ Na pa pre amnhĩ tomnuj tÿx o ixpa htã nhũm Tĩrtũm arĩ kãm ijapê nẽ. Nẽ ixkamã ukaprĩ nẽ. Pa pre hkôt amnhĩ xãm nhũm ixto hkra pa ra kãm tanhmã amnhĩ nhĩpêx to mex rãhã ho ixpa. Jakamã na hte tee ri amnhĩ tã ixpumu nẽ tanhmã hamexpêr to hkêt nẽ. Rÿ hamexpêr o:

—Hêxta waa nẽ. Inhmã Pawre japê nẽ ixte ho mex tã nhũm ixkôt amnhĩ nhĩpêx kêt kumrêx.

Anhÿr o tee ri hamexpêr kêt nẽ. Na pa hte kãm tanhmã amnhĩ nhĩpêx to ho ixpa rũnh o ÿ hã mẽ kapêr o pa xwÿnh kwÿjê jakre ho ixpa. Nom amnhĩ krã hkôt mẽ ahkre hkêt nẽ. Ja kaxyw na pre Tĩrtũmja ixto ixihitÿx pa ÿ hã kãm tanhmã amnhĩ nhĩpêx to ho ri ixpa nhũm ja hã ixpumu nẽ hkĩnh nẽ.

¹¹ Nẽ Jejus jarênhja ãm pixii. Axtem hõ hkêt. Nẽ ÿ hã mẽ ahkre ho mẽ pa xwÿnhjê kapêrja nẽ pa ixte mẽ amã harênhja kot axpên pyrãk. Harênh tipxi. Kris kot mẽ pahte amnhĩ tomnuj mÿrapê mẽ panê htyk nhũm Tĩrtũm kot akupÿm ho htĩr ã wa harênhja na pa hte pix jarênh o ri mẽ akôt ixpa. Ka prem inhma nẽ amnhĩ kaxyw hkôt ajamexpêr tÿx nẽ.

Tĩrtũm kot akupÿm mẽ pahto mẽ pahtĩr ã harênh Rukre 20.37

¹² Nẽ kwa ra ixte mẽ amã Kris htyk nẽ akupÿm htĩr ã harênh tã ka xep mẽ akwÿjaja axtem nẽ mẽ

htyk nẽ akupỹm mẽ htĩr kêt ã mẽ hkamnhĩx o ri apa.

¹³ Kwa mẽ ajamaxpěrja mex kêt. Kêp apu ãm hãmri mẽ ate ã mẽ harẽnh anhỹr ronhỹx pre Kris haxwỳja akupỹm htĩr kêt nẽ. Nhỹx pre htyk o ty.

¹⁴ Nẽ kêp apu Kris akupỹm htĩr kêt ronhỹx pa mẽ ãm mẽ amã kapěr jarẽnh o ixpa kaprỳ. Ka mẽ ajaxwỳja amnhĩ kaxyw hkôt ajamaxpěr kaprỳ.

¹⁵ Nẽ kêp ãm akupỹm mẽ htĩr kêt ronhỹx pa mẽ ixte mẽ amã Tĩrtũm kapěr jarẽnh o ri ixpa xwỳnhjaja mẽ amã ho ixêx o ri ixpa. Na pa htem mẽ amã Tĩrtũm ra kot akupỹm Jejus o htĩr ã harẽnh o mẽ akôt ixpa. Tã kêp apu akupỹm mẽ htĩr kêt ronhỹx pa mẽ ãm mẽ amã harẽnh o ixêx.

¹⁶ Nẽ kêp apu akupỹm mẽ htĩr kêt ronhỹx pre Kris haxwỳja akupỹm htĩr kêt nẽ. Nhỹx pre ãm amarĩ tyn hapêx.

¹⁷ Nẽ Kris amarĩ htyk nẽ hapêx ronhỹx kot pu mẽ ri amnhĩ kaxyw hkôt pajamaxpěr nẽ hkôt amnhĩ xunhwỳr kaprỳ.

Nẽ Kris amarĩ htyk nẽ hapêx ronhỹx pre Tĩrtũm Jejus kukwak ri mẽ panê mẽ pahte amnhĩ tomnuj o hapêx kêt nẽ. Nhỹx pu mẽ pahpiitã nhỹrmã ma kuwy hwỳr pajapêx pa.

¹⁸ Nẽ kêp apu Kris htyk nẽ hapêx ronhỹx ra mẽ kot amnhĩ kaxyw hkôt hamaxpěr tã ra htyk xwỳnhjaja ma mẽ kot amnhĩ tomnuj mỳrapê kuwyta wỳr hapêx.

¹⁹ Nẽ kêp apu Kris htyk kumrêx nẽ hapêx ronhỹx pu mẽ kormã pahtyk kêt xwỳnhjaja tee ri amnhĩ wỳr kamã pajamak o ri papa kaprỳ.

Ně pahpê hkra hã amnhĩ jarēnh kaprỳ. Jao pahkaprĩ htỳx o mẽmoj piitã hakrenh par kumrēx ně ri papa.

Kris kumrēx akupỹm htĩr ã harēnh

Atre 26.23; Sikũn Korĩt 4.14; Piripos 3.10-11; Wam Tesarõn 4.15-18; Apokarip 20.1-15

²⁰ Nà mẽ htyk ně nhỹrmã akupỹm mẽ htĩr kêt ã mẽ harēnhja kot anhỹr kêt. Ra Tĩrtũm kot akupỹm Kris o htĩr jakamã koja mããnēn hkra htyk xwỳnhjaja nhũm mẽ piitã Jejus pyrà ně nhỹrmã akupỹm mẽ ho htĩr pa. Jakamã na pu htem Kris akupỹm htĩrja mã pajamexpēr ně amnhĩ kukamã pajamexpēr o:

—Nà ra Tĩrtũm kot akupỹm Jejus o htĩr jakamã koja uràk ně nhỹrmã akupỹm mẽ pahte hkõt amnhĩ xunhwỳr xwỳnh piitã mẽ pahto mẽ pahtĩr. Nà koja ã mẽ panhĩpêx aně. Ja kaxyw àhpumunh tỳx kumrēx xwỳnh kēnã. Aně.

²¹ Ně amnepēm na pre Tĩrtũm my kot waja nhĩpêx. Hãmri nhũm kot tanhmã amnhĩ tomnuj to ho ra mẽ htykja o hkra. Tã nhũm wamta kõt my hõta wamta rom amnhĩ to mex o mẽ htyk tã akupỹm mẽ ho htĩr o hkra.

²²⁻²³ Tã mẽ pahpê wam my pē Atãw kanrēhã tàmnhwỳ jakamã kot puj mẽ uràk ně nhỹrmã ty. No ãm mããnēn mẽ pahpê Kris kraa. Kris kumrēx na pre akupỹm htĩr. Tã koja nhỹrmã akupỹn mẽ pahwỳr wrỳ hãmri nhũm Tĩrtũmja kot hipêx pyrà ně akupỹm mẽ pahto mẽ pahtĩr. Mẽ pahte hkõt amnhĩ xunhwỳr ã mẽ pahpumunh kõt akupỹm mẽ pahto mẽ pahtĩr pa. No ãm kormã.

*Kris nhÿrmã kot mẽ htyk o hapêx ã harênh
Juãw 11.25; Rõmãn 6.23; Wam Korît 15.54; Sikũn
Ximotre 1.10; Eprêw 2.14; Apokarip 20.14*

24-28 Nê koja Kris arĩ mẽ ho amnhĩptàr rãhã nhũm Tĩrtũm mẽ kot kutã amnhĩ xunhwÿr xwÿnhjê pè mẽ hihtÿx xà ho hapêx pa. Kapêr ã kagã htũm kot ja jarênh kot:

Koja nhÿrmã Tĩrtũm Kris kot kãm mẽ ho amnhĩptàr kaxyw ãm. Anê.

Jakamã Jejus tapxipix koja mẽ ho amnhĩptàr o pa. Koja Tĩrtũm pix mẽ ho amnhĩptàr kêt nê. Nom koja pahi hkwyjê hõ axte nhãm mẽ ho amnhĩptàr kêt kumrêx.

Tã mẽ kot mẽkarõmnuti hkôt kãm tanhmã amnhĩ to ho mẽ pa xwÿnhjaja koja Tĩrtũm ma amnhĩ nê kuwy hwÿr mẽ rênh pa. Nê mẽhtykja o hapêx nhũm mēhõ axte htyk kêt kumrêx. Jakamã koja Jejus Kris mẽmoj punuj piitã ho hapêx nê Měpahpãm Tĩrtũm nhĩhkram akupÿm mẽmoj piitã haxàr pa. Tĩrtũm jamaxpêr xà hkôt ã mẽmoj to anhÿr par anê hãmri nê ìhkram mẽmoj jaxàr pa. Nê mãânên tãm kãm amnhĩ gõ. Jakamã nhũm Tĩrtũm tapxipix mẽmoj piitã ho amnhĩptàr pa.

Mẽ htyk xwÿnhjê jarênh

29 Nê na hte mẽ pahkwÿjaja kormã kêp Tĩrtũm kra hkêt tã Jejus kôt mẽ kot amnhĩ xunhwÿr nê mẽ htyk xwÿnhjê mã hamaxpêr o pa. Hãmri nê mẽ kãm nhÿrmã axte mẽ omunh prãm xaj mẽ uràk nê Jejus kôt amnhĩ xunhwÿ nhũm mẽ hkrã kumrã. Tã akupÿm mẽ htĩr kêt ronhÿx mẽ ãm ã pajamaxpêr anhÿr kaprÿ.

³⁰ Nē paa. Na pa hte ma mẽ kãm Tĩrtũm kapēr jarēnh o ri mẽ hkõt ixpa. Nhũm mẽ hkwỳjaja ja hã inhma nē ixkamã gryk nē ixtã amỹnẽ pa mẽ mỳrapẽ xpunuj nē ri ixpa. No ãm amnhĩ to htỳx nē arĩ ri mẽ kãm Kris kapēr jarēnh o ri mẽ hkõt ixpa. Tã kệp ãm nhỹrmã akupỹm ixtĩr mã kêt ronhỹx pa tee ri ã amnhĩ nhĩpẽx anhỹr o ri ixpa kaprỳ.

³¹ Na htem apkati mẽ ixtã tanhmã àmnēnh to ho ri pa. ãm hãmri na pa mẽ amã ã mẽ harēnh anẽ. Nom na pa hte tee ri amnhĩ kukamã ijamaxpēr o ri ixkaprĩ nē ixpa hkêt nē. Mẽ kot ixpĩr mã tã pa hte mẽ ate Pahihti Jejus Kris kõt amnhĩ nhĩpẽx mex ã mẽ apumunh kõt ixkĩnh nē ri ixpa. Nhũm te ixkamã mẽmoj kêt pyræk pa hte ri ixpa.

³² Na pa hte jar Epes kamã mẽ oprẽ xwỳnhjẽ kutã amnhĩ to htỳx pẽ mẽ kãm Jejus kapēr jarēnh o ri mẽ hkõt ixpa nhũm mẽ kãm mar prãm kêt jakamã hã ixtomnuj tỳx nē. No nhỹrmã ixtyk nē akupỹm ixtĩr mã kêt ronhỹx pa mẽ kệp Kris kwỳ hkêt xwỳnhjẽ jamaxpēr o ijamaxpēr nē mẽ uræk nē ijamaxpēr o: Ixte ixtyk ã arĩgro pumunh kêt jakamã kot paj mãmri mẽmoj piitã hkur o ri ixpa.

Nẽ mãmri mẽmoj piitã ho ixkõm o ri ixpa.

Nẽ mãmri mẽmoj piitã ri tanhmã ho ho ri ixpa.

Ixtyk nē axte ixte ã amnhĩ nhĩpẽx anhỹr o ixpare kaxyw ã.

Anhỹr o nhỹx pa ijamaxpēr o ixpa. Kệp ãm Tĩrtũm kot akupỹm mẽ pahto mẽ pahĩr mã kêt ronhỹx pu mẽ ã mẽ kệp Kris kwỳ hkêt xwỳnhjẽ jamaxpēr anhỹrja kõt pajamaxpēr pix o ri papa. No ãm ja kot anhỹr kêt.

³³ Na htem mẽmoj jarēnh o:

—Mê kot htỳx ri amnhĩ tomnuj xwỳnhjê hkôt ri mẽ pa xwỳnhjaja koja mẽ gaa nẽ mẽ kot amnhĩ nhĩpêx kôt amnhĩ nhĩpêx o ri pa. Anẽ.

Ãm hãmri na ã mẽ harênh anhỳrja. Jakamã kwa mẽ okora. Kêr ka mẽ ã amnhĩ nẽ mẽ kot amnhĩ nhĩpêx anhỳr o mẽ pa xwỳnhjê pumunh mex o ri apa.

³⁴ Kwa mẽ tokyx mẽ ate tanhmã amnhĩ tomnuj to hã amnhĩ pumu nẽ axte ã amnhĩ nhĩpêx anhỳr kêt nẽ. Nẽ mẽ ate Tĩrtũm kot akupỹm mẽ ho htĩr kêt ã harênh xwỳnhjaja. Te mẽ ate Tĩrtũm kot amnhĩ nhĩpêx ã omunh kêt pyràk. Tã mẽ ate tokyx ja hã amnhĩ pumunh nẽ amnhĩ kamã apijaàm kaxyw na pa ã mẽ amã ixkapêr anẽ.

Mẽ panhĩ nyw jarênh

Rukre 20.34-36; Rõmãn 8.10-11; Sikũn Korît 5.1; Piripos 3.20-21

³⁵ Nẽ mãn ka mẽ atõ akupỹm mẽ htĩr ã mẽ harênh ma nẽ tee ri mẽ hkukamã ajamaxpêr nẽ hã ri tanhmã axpên kukjêr to nẽ axpên mã:

—Kwa tanhmã koja we Tĩrtũm akupỹm hkra htyk xwỳnhjê ho htĩr to? Ra mẽ htyk nẽ mẽ ã katõk nẽ hapêx par mã kênã. Tanhmã kot wem amnhĩ to nẽ akupỹm htĩr? Nẽ tanhmã koja we mẽ ã nywja kute wehe? Anẽ.

³⁶ Nà na ka mẽ atỳx ri ã ajamaxpêr anẽ nẽ tee ri mẽ hkukamã ajamaxpêr. E kot paj ixprĩ hã ja hã ejêp jarê ka mẽ inhma. Nà na htem mẽmo y hkre. Te mẽ kot mẽ htyk jaxàr pyràk o hipêx nẽ hkre nhũm hikwỹ nẽ gaa nẽ higrõt hapôj. Nom te kêp mẽmo yta pyràk kêt.

37 ãm hy pix na htem hkre. No higrôt kre hkêt nê. Rỳ tanhmãn pàr nywja kre hkêt nê. ãm hy pix na htem hkre. Tã nhũm higrôt hapôj nê hprêk nê gaa nê ô.

38 Tĩrtũm na hte hamaxpêr xà hkôt tanhmã ho nhũm higrôt hapôj nê hprêk nê ô. Tã ja pyrà nê kot puj mẽ Tĩrtũm jamaxpêr xà hkôt pahtyk tã koja akupỹm mẽ pahto mẽ pahtĩr nê mẽ pamã mẽ panhĩ nyw gõ.

39 Nê mẽmo hy piitã te kot axpên pyràk kêt. Ahpỹnhã na. Ja pyrà nê ahpỹnhã ri mẽmoj piitã ĩ. Na axtem mẽ panhĩ nê axtem mry nhĩ nê axtem àk nhĩ nê axtem tep nhĩ. Mẽmoj piitã ahpỹnhã ri ĩ.

40-41 Nê kaxkwa kamã haxwỳja mẽmoj piitã ahpỹnhã no ãm muxre. Myytija mex. Nê mytwrỳreja axte mã no ãm haxwỳja mex. Nê kanhêti haxwỳja mex. Haxwỳja axte mã. Kamã hkwy hpôk kryre nê kamã hkwy hpôk rũnhti no ãm piitã mex.

Nê jar pika ja kamã haxwỳja mẽmoj piitã mex. No ãm te kot kaxkwa kamã mẽmoj jarir xwỳnhja mex pyràk kêt. Axtem na raa.

42 Tã koja mẽ panhĩ nywja haxwỳja axte mã. Te kot panhĩ htũm pyràk kêt. Na htem ty nhũm mẽ ma mẽ o mra nê mẽ hagjê. Nhũm mẽ hikwỹ nê gaa nê ĩ rerek nê hapêx. Tã koja Tĩrtũm akupỹm tanhmã mẽ pahto mẽ pahtĩr to pu mẽ hpãnhã pamex kumrêx. Hãmri nê axte mã mẽ panhĩ nyw mex o mex jakamã koja axte htyk nê ĩ rerek kêt nê.

43 Na htem ty nhũm mẽ hagjê nhũm htyk xwỳnhta tanhmã amnhĩ to hkêt nê amari hikwỹ. Omnuj nê ĩ nhenhek nê hikwỹ. Tã koja Tĩrtũm

akupÿm mẽ ho mẽ htîr nẽ mẽ kãm mẽ ï nyw gõ nhũm mẽ hpãnhã mex kumrẽx nẽ hihtÿx nẽ Tîrtũm nhõ krî kamã pa ho pa.

⁴⁴ Mẽ htyk nhũm mẽ kot mẽ hagiênh xwÿnhjaja na htem arî ï htũm ã hikwÿ. ãm jar pika ja pix kãm ri mẽ papa kaxyw na mẽ panhî htũmja. No mẽ panhî nywja axtem Tîrtũm nhõ krî kamã ri mẽ papa kaxyw jakamã koja mẽ panhî nywja axte mã. Tîrtũm Karõ koja mẽ pamã kugõ.

*Mẽ panhî nyw te kot Kris nhî pyrãk ã harênh
Rukre 20.34-36*

⁴⁵⁻⁴⁶ Nẽ Tîrtũm kapêr ã kagà htũm kot Atãw jarênh kot:

Na pre Tîrtũm my kot wa Atãwja nhîpêx. Jakamã Atãw kêp pika nhõ xwÿnh na pre. Anê.

ã Atãw jarênh kot anhÿr. Ja pyrã nẽ na pu htem pakatorxà nhõhy rũm pajapôj nẽ Atãw pyrã nẽ pahpê pika nhõ xwÿnh. Tã nhũm Atãwja pa nẽ gaa nẽ hpigêt nẽ ty. Jakamã kot puj mẽ urak nẽ papa nẽ gaa nẽ ty. Nom nhũm Krisja Atãw kurom kêp akupÿm mẽ ho mẽ htîr xwÿnh jakamã kot puj mẽ pahpê hkwÿjaja Atãw pyrã nẽ nhÿrmã mẽ pahtyk tã nhũm Kris akupÿm mẽ pahto mẽ pahtîr. Hãmri nhũm Tîrtũm Karõ mẽ pamã mẽ panhî nyw gõ pu mẽ axte pahtyk kêt nẽ. Pãnhã axte mã mẽ pahpê kaxkwa nhõ xwÿnh.

⁴⁷ Nẽ Atãw na pre Tîrtũm pika ho hipêx nẽ ho htîr nhũm ri pa. Nom Kris na pre Atãw rom kaxkwa rũm mẽ pahwÿr wrÿ.

⁴⁸ Tã mẽ pahpê pika nhõ xwÿnhjaja te mẽ pahpê Tîrtũm kot wam my nhîpêx xwÿnhhta pyrãk. No mẽ pahte kaxkwa hwÿr ma papa mã xwÿnhjaja te mẽ

pahte kaxkwa rûm my kot mẽ pahwỳr wrỳk xwỳnh Krista pyràk.

⁴⁹ Tã kormã mẽ pahpê pika nhõ xwỳnh jakamã te mẽ pahpê my pika ho hipêx xwỳnhhta nhĩ pyràk. Nom kot puj mẽ nhỹrmã ty hãmri nẽ hpãnhã te pahpê kaxkwa rûm my kot mẽ pahwỳr wrỳk xwỳnhhta nhĩ pyràk.

Axte mẽ pahtyk kêt kumrêx ã mẽ pajarênh

Juãw 11.25; Sikũn Korît 5.4; Wam Tesarõn 4.13-

18

⁵⁰ Nẽ kot puj mẽ panhĩ htũm rãhã Tĩrtũm nhõ krĩ hwỳr paxàpir kêt nẽ. Panhĩ htũm na hte ty nẽ rerek nẽ hapêx. Jakamã koja Tĩrtũm Karõ mẽ pamã mẽ panhĩ nyw gõ pu mẽ rĩ kormã ma õ krĩ hwỳr pajapêx pa nẽ kamã papa ho papa.

⁵¹⁻⁵² E mẽ inhma. Na pre kormã Tĩrtũm mẽ amã mẽmoj to amnhĩrĩt kêt tã ra inhmã ho amnhĩrĩt. Jakamã kot paj y hã mẽ amã harê ka mẽ inhma. Nã kot puj mẽ pahpiitã mẽ pahtyk kêt nẽ. Koja nhỹrmã Tĩrtũm kapêr o mẽ wrỳk xwỳnhjê hõja mẽ pamã pifti kakô. Mẽ pajaêr pê hkakô. Hãmri nhũm Tĩrtũm kra ra mẽ htyk nẽ mẽ hikwỹ xwỳnhjaja akupỹm ã nyw o htĩr kurê kumrêx. Nẽ kormã mẽ pahtyk kêt xwỳnhjaja kot pu mẽ mẽ pahtyk kêt ri mẽ uràk nẽ panhĩ nyw kurê kumrêx. Hãmri pu mẽ pahpiitã pahĩr o pahĩr tũm nẽ papa.

⁵³ Koja Tĩrtũm mẽ panhĩpêx o te mẽ pahte paxê htũm o papinhĩpanh nẽ hpãnhã paxê nyw jagjênh pyràk. Jao mẽ panhĩ htũm o hapêx nẽ hpãnhã mẽ pamã mẽ panhĩ nyw gõ pu mẽ axte pahtyk kêt kumrêx nẽ ri papa ho papa.

⁵⁴ Tĩrtũm kapêr ã kagã htũm kot ja jarênh kot:

Na ra Tĩrtũmja mẽhtyk ho hapêx pa. Anẽ.
Te ra kot ho hapêx par pyræk o ã harẽnh kot anhỹr.
No ãm kormã. Jakamã kot puj mẽ nhỹrmã panhĩ
nyw nẽ ri papa nẽ mẽ pahtõ axte pahtyk kêt
kumrẽx.

⁵⁵ Mẽ pahtykja te mẽ kot makre par nhũm axte kot
mẽ hkamnhwỳr kêtja pyræk. Urà nẽ koja Tĩrtũm
akupỹm mẽ pahto mẽ pahtĩr pu mẽ axte pahtyk kêt
nẽ. Nẽ axte ri pamã ma hkêt nẽ papa. Nẽ axte paxà
hkêt nẽ.

⁵⁶ Tĩrtũm kapẽr ã kagà htũmja ã mẽ pakukamã
mẽ pajarẽnh kot anhỹr. Mẽ pahte amnhĩ tomnuj
xwỳnh jakamã kot puj mẽ nhỹrmã ty.

⁵⁷ Nom nhũm Tĩrtũm àhpumunh tỳx o àhpumunh tỳx
jakamã na hte Pahihti Jejus Kris kukwak ri mẽ
pahte hkõt amnhĩ xunhwỳr xwỳnhjê nẽ mẽ pahte
amnhĩ tomnuj rẽn pa. Pu mẽ nhỹrmã mẽ pahtyk
tã nhũm akupỹm mẽ pahto pahtĩr.

*Mẽ pahte Jejus mã tanhmã amnhĩ nhĩpêx mex to
hã mẽ pamã karõ*

Karatas 6.9; Korosẽ 1.10

⁵⁸ Jakamã e kwa Jejus kõt ixkwỳjaja. Kêr ka mẽ
arĩ Pahihti Jejus kõt mãn amnhĩ xunhwỳr tỳx rãhã
ho ri apa. Nẽ kapẽr kõt pix mã ri amnhĩ nhĩpêx
rãhã nẽ kãm tanhmã amnhĩ nhĩpêx mex to ho ri
apa. Kot kaj mẽ ã amnhĩ nhĩpêx anẽ hãmri nẽ kãm
tanhmã amnhĩ nhĩpêx to kaprỳ ho ri apa hkêt nẽ.
Ãm hãmri kãm mẽmoj to anhỹr mex rãhã ho ri apa.

Mê kêp amrakati xwÿnhjê jarênh
Atre 11.27-30; Rômãn 15.25-27; Sikÿn Korît 8.1-24, 9.1-5; Wam Ximotre 6.18

¹ Nê na pa pre krî pê Karatas kamã tanhmã Jerujarê kamã Kris kwÿjê jarênh to. Ijaew kwÿ kot mẽ pahpyrà nê Jejus kôt amnhĩ xunhwÿr ã mẽ harê nê mẽ kêp amrakati hã mẽ harê hãmri nê mẽ kãm:

—E. Kwa kêr ka mẽ kãm mẽ akàxpore hkwÿ ho akuprõ nê ma mẽ hwÿr amê.

Anhÿr o mẽ kãm ixkapêr. Jakamã kwa kêr ka mẽ uràk nê mẽ kaxyw mẽ kãm kàxpore hkwÿ ho akuprõ.

² Mẽ panhõ arĩgromnu pê sap ã hkwÿ ho akuprõ. Kot kaj mẽ akàxpore rax japêr nê mẽ kaxyw hkwÿ ho rax nê axi. Nom kot kaj akàxpore grire japêr nê mẽ kaxyw mẽ kãm ho grire nê agõ. Kêr pa mẽmo arĩgro hã ma mẽ awÿr mõi ka mẽ ra mẽ kaxyw ho apikuprõnh rax nê.

³ Nê ma mẽ kot mẽ kãm ho mõi mã xwÿnhjaja ka mẽ ixkutêp mẽ akwÿjê rê. Kêr pa pøj nê mẽ omu hãmri nê mẽ kaxyw kagã nhĩpêx nê kamã mẽ harê. Nê mẽ kãm kugõ nhũm mẽ ma Jerujarê hwÿr kàxpore mẽ ro hã amnhĩ kôt o mõi nê mẽ kãm kugõ. Mẽ kot kamã harênh nê mar hãmri nê mẽ kamjaja mẽ ate mẽ kaxyw mẽ rênh ã mẽ ajarênh ma.

⁴ Rÿ kot ka mẽ amã mẽ hkôt inhmênh prãm nê mãmri mẽ hkôt inhmê pa ma mẽ hkôt mõi.

Pawre kot amnhĩ kukamã amnhĩ jarênh
Atre 19.21-22

⁵ Nom kot paj tokyx mẽ awÿr inhmõi kêt nê. Kot paj ja rùm ixkato nê hpãnhã ma pika pê Masetõn

wÿr mō. Hāmri nē mē hkôt ixpa grire nē ma kormã mē awÿr Korît wÿr mō.

⁶ Hāmri nē pōj nē mē akôt ri ixpa ryy nē. Nē ixtã amgrà pixi nē hapêx nē rî kormã ma axte nhãm krî hō hwÿr mō. Nē inhnojarê ka mē ixto Tîrtûm wÿ nē inhmã ixàpkur xà hkwy gō pa ma mē hwÿr pry hã hkur o mō.

⁷ No ixte mē awÿr ixpôx nē tokyx mē akurûm ixkator nē hpãnhã ma nhãm krî hō hwÿr inhmôrja na inhmã hprãm kêt. Jakamã koja Tîrtûm kãm ja mex pa arî ri mē akôt ri ixpa hã ixtã mytwrÿ xohtô nē tokyx ma nhãm inhmôr kêt nē.

⁸ Kot paj kormã jar Epes kamã ri ixpa rãhã nhũm mē hkînh pê Pêtekos kato nē hapêx pa rî kormã ma Masetôn wÿr mō.

⁹ Na pa hte jar kormã mē kãm Jejus kapêr jarênh o ri mē hkôt ixpa nhũm mē ohtô nē inhmar o pa. Mē kãm mar prãm. Tã no nhũm mē hkwyjaja ohtô nē mē kêp ja omnuj nē nhũm mē hã ixkamã gryk nē ixtomnu o pa.

*Mē kot Ximotre ho mex ã mē harênh
Hapuhã Juãw 5*

¹⁰ Nē kwa koja Ximotre mēmo arîgro hã mē awÿr pōj ka mē omu nē ho mex nē. Nē mē amnhî nhôrkwÿ hwÿr awÿ kê mē akutã apkur o pa. Na hte ixpyrà nē Pahihti Jejus mã tanhmã amnhî nhîpêx to mex o pa.

¹¹ Kormã mē pahkînhã nyw tã kêr ka mē tee ri ja hã omu nē ri axpên mã tanhmã harênh to hkêt nē. Mē ãm akapêr mex pix o kãm akapêr. Nē koja akupÿn nojarê ka mē pry hã kãm apkur xà hkwy gō kê mex pê man akupÿn ixwÿr mō pa tokyx omu.

Kot paj jar mẽ pahkwỳjê mẽ akupỹn hpôx kamã ijamak o ixpa.

¹² Nẽ na pa hte xatã jar mẽ pahtõ Aporja ma mẽ awỳr mõi kaxyw mẽ awỳr hano. Kot jar mẽ pahtõ hkwyjê mẽ ma mẽ awỳr mõi kaxyw. Nom kormã. Koja xep mẽ jar tanhmã amnhĩ to hpa nẽ rĩ kormã ma mẽ awỳr mõi.

Kagà jatur xà kamã Pawre kot mẽmoj tă karõ

Epes 6.10-12; Sikũn Ximotre 1.7; Wam Pẽtre 5.8-9

¹³ E kwa kẽr ka mẽ arĩ amnhĩ wỳr Jejus kamã ajamak rãhã ho ri apa. Nẽ hamãr pẽ kutẽp tãm amnhĩ nhĩpẽx o ri apa. Nẽ amnhĩ kaxyw hkõt ajamxpẽr tỳx rãhã nẽ.

¹⁴ Nẽ mẽ amã axpẽn kĩnh pẽ tanhmã axpẽn to mex to.

¹⁵ Mãn ka mẽ ra Estepti mẽ hkwyjê jarẽnh ma. Mẽ hkumrẽxjaja na prem pika pẽ Gres kamã Kris kõt amnhĩ xunhwỳ. Tã xep mẽ ra Kris kõt hkwyjê ho mex o ri mẽ hkõt pa.

¹⁶ Kẽr ka mẽ ã mẽ kot amnhĩ nhĩpẽx anhỹr xwỳnhjê kapẽr ma nẽ hkõt ri amnhĩ nhĩpẽx o ri apa. Mẽ kot Kris mã mẽ ajamãr xwỳnh piitã kẽr ka mẽ kapẽr ma nẽ mẽ hkõt ri amnhĩ nhĩpẽx mex nẽ.

¹⁷ Nẽ ota Estepti nẽ Akajkre nẽ Putunatreta na mẽ ra jar põi. Pa mẽ Sostenes mẽ wa mẽ omu nẽ wa ixkĩnh nẽ. Te ixte mẽ apumunh nẽ ixkĩnh tỳxta pyrãk.

¹⁸ Na xep prem ma mẽ awỳr mõi nẽ tanhmã mẽ amã kapẽr to ka prem mẽ ama nẽ akĩnh nẽ. Tã mẽ ra amnẽ ixwỳr mõi nẽ tanhmã inhmã kapẽr mex to pa mẽ kuma nẽ ijaxwỳja ixkĩnh nẽ. Kwa kẽr pu mẽ ã mẽ kot mẽ panhĩpẽx anhỹr xwỳnhjê ho mex o papa.

19-20 Nē ota jar pika pê As kamã Kris kôt mẽ pahkwỳjaja piitã mẽ awỳr hpēr mẽ. Nē Akir mẽ hprō Prisireja wa. Nē wa ōrkwỳ kamã mẽ kot Tĩrtũm mã amnhĩ jarēnh kaxyw mẽ pikuprōnh xwỳnh piitã mẽ awỳr hpēr mẽ.

Nē kēr ka mẽ nhỹri axpẽn pumu nē mẽ apê Kris kôt mẽ ate axpẽn to atō nē atōx ã axpẽn mã akapēr mex nē akĩnh nē.

²¹ E kot paj kagà jatur xà kamã inhĩhkra ho mẽ amã amnhĩ nhĩxi nhĩpêx ka mẽ omu. Kojã inhãmã ixkapēr ã kagà xwỳnhhta ja hã kagà hkêt nē. Pa kot paj hipêx. Ixpê Pawre na pa ã amnhĩ nhĩxi nhĩpêx anē ka mẽ omu.

²² Nē kwa kēr ka mẽ arĩ amã Pahihti Jejus kĩnh o ri apa. Kojã mēhō kãm hkĩnh kêt hã kojã Tĩrtũm ja hã homnuj tỳx kumrēx.

E “maranat.” Mē pakapēr kãm na htem maranat jarēnh o: “Kwa tokyx akupỹn mẽ ixwỳr wrỳ Pahihti.” Anē.

²³ E kê Pahihti Jejus Krisja mẽ ato mex nē mẽ akutã nojarêt rãhã ho pa.

²⁴ Ixpyrà nē mẽ apê Jejus Kris kwỳ jakamã na pa hte inhãmã mẽ akĩnh nē.

Tã ãm ja pix. Ixpê Pawre na pa ã mẽ awỳr kagà nhĩpêx nē mēnh anē.

Tĩrtũm kapēr ã kagà nyw
New Testament in Apinayé (BR:apn:Apinayé)

copyright © 1999 Wycliffe Bible Translators, Inc.

Language: Apinayé

Translation by: Wycliffe Bible Translators, Inc.

Apinayé [apn], Brazil

Copyright Information

© 1999, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Apinayé

© 1999, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-21

PDF generated using Haiola and XeLaTeX on 18 Apr 2025 from source files
dated 29 Jan 2022

383a4e22-34cd-505f-9cc2-2f9921e7aa9f